

প্রত্যাখ্যান

শৈলজাপ্রসন্ন সংসারত্যাগী হইলেন; কোথায় গেলেন, কেহ জানিল না।

হিন্দু কুলবধূর বিষয়-বুদ্ধি বতই কেন প্রথম হউক না, সাধারণতঃ স্বাধীনভাবে আত্মপ্রকাশ করে না; তাহা পতির বা পুত্রের কাজের অন্তরালে থাকিয়া কার্য্য নিয়ন্ত্রিত করে, বাহিরের লোক শক্তির কেন্দ্রের সন্ধানও পায় না। কাজেই বত দিন খণ্ডর শাওড়ী বাঁচিয়া ছিলেন, তত দিন বাহিরের লোক কেহ বুঝিতেও পারে নাই, রায় মহাশয়ের অন্তঃপুরে বিষয়কার্য্যে দৃক কেহ আছেন। কিন্তু বৃদ্ধ রায় মহাশয় বিধাজীর পৈত্রিক সম্পত্তি সম্বন্ধে তাঁহাকে সময় সময় যে সব কথা জিজ্ঞাসা করিতেন, তাহাতেই বুঝিতেন, বধূর বিষয়বুদ্ধি অসাধারণ প্রথম। তাই কখন সময় তিনি জ্ঞাননার সম্পত্তি-সম্বন্ধীয় কথাও বধূর সঙ্গে আলোচনা করিতেন। তিনি পুত্রবধূকে ‘মা লক্ষ্মী’ বলিয়াই ডাকিতেন, এবং বলিতেন, “মা লক্ষ্মী সত্যই আমার ঘরের লক্ষ্মী।” বতর শাওড়ীর মৃত্যুর পর স্বামী বখন সংসারের কর্তা হইলেন, তখন বিষয়কার্য্যে বিধাজীর প্রভাব একটু একটু প্রকাশ পাইতে লাগিল। তাহার প্রধান কারণ, রায় মহাশয় মৃত্যুকালে বৃদ্ধ দেওয়ানকে বলিয়া গিয়াছিলেন, জটিল কাজে তিনি যেন ‘মা লক্ষ্মী’র পরামর্শ গ্রহণ করেন; কেন না, তিনি দেখিয়াছেন, অনেক ক্ষেত্রে জীলোকের সরল বুদ্ধির কাছে পুরুষের কুটিল বুদ্ধিকে পরাভব মানিতে হয়। বৃদ্ধ দেওয়ানও সময় সময় গৌরীপুরের জমীদারীর কথাই অহিলায় নানা বিষয়ে বিধাজী দেবীর পরামর্শ লইতেন।

এই সময় নীলকরের অত্যাচারপীড়িত প্রজারা এক দিন দলবদ্ধ হইয়া কাছারীতে আসিয়া বলিল, অত্যাচারে তাহাদের পক্ষে ভিটার বাস করা অসম্ভব হইয়াছে, জমীদার প্রতিকার না করিলে তাহাদের মান ইজ্জত সব যায়, তাহারা না বাইরা মরে। নীলকরের প্রবল প্রতাপের বিবর জমীদারের অজ্ঞাত ছিল না। তিনি অনেক ভাবিয়া চিন্তিয়া বলিলেন, “সবই জানি। কিন্তু উপায় কি? নীলকরের সঙ্গে ঝগড়া করিলে যে বাড়ীর একখানা ইটও রাখা দায় হইবে।”

প্রজারা নিরাশ হইল; কেহ কেহ কাঁদিয়া ফেলিল। সেই সময় যুদ্ধ দেওয়ান গোকুল সর্দারকে ইঙ্গিত করিয়া বাহির হইয়া গেলেন। গোকুল তাঁহার অনুসরণ করিল।

গোকুল ফিরিয়া আসিয়া অস্ত্র প্রজাদিগকে বলিল, “ভবে আর কি; চল বাড়ী বাই।” সকলে বাহিরে আসিলে সে বলিল, “বাবু ত বিদায় দিলেন। কিন্তু ভিটা ছাড়িয়া বাইব, একবার মাকে প্রণাম করিয়া বাইব।” এই বলিয়া সে অন্ধরের পথে অগ্রসর হইল, সকলেই তাহার সঙ্গ লইল। অন্ধরের উঠানে দাঁড়াইয়া গোকুল ডাকিল, “মা! মাঠাকরণ!” কালীর মা জমীদার-গৃহে আশ্রিতা যুজ্জা। সে দ্বিতলে দরদালানের একটা জানালার সম্মুখে আসিয়া বলিল, “কি গোকুল?”

গোকুল বলিল, “নীলকরের অত্যাচারে আমরা সব প্রজারা ভিটা ছাড়িয়া বাইতেছি; তাই একবার মাকে প্রণাম করিতে আসিয়াছি।”

কালীর মা বলিল, “তিনি জিজ্ঞাসা করিতেছেন, কর্তাকে সে কথ্য জানাইয়াছে ?”

“হাঁ। তিনি বলেন, নীলকরের সঙ্গে ঝগড়া করিলে বাড়ীর একখানা ইটও বজার রাখিতে পারিবেন না।”

বিধাত্রী দেবী স্বয়ং জানালায় সম্মুখে আসিলেন। যেন পীঠের উপর জগদ্ধাত্রী প্রতিমা প্রতিষ্ঠিত হইল। তিনি বলিলেন, “তবে কর্তাকে এই অনুরোধে আসিতে বল, আমি কাছারীতে যাই।” তাহার পর তিনি বলিলেন, “আমি জানি, আমি তোমাদের মা, তোমরা আমার এতগুলি সন্তান। তোমরা যদি আপনাদের মান ইচ্ছত রাখিতে না পার, তবে মার মান ইচ্ছত রাখিবে কেমন করিয়া ? তবে ত তোমাদের আগে আমাকেই দেশত্যাগী হইতে হয়। তোমরা কি অত্যাচার হইতে মাকেও রক্ষা করিতে পার না ?”

“হুকুম পাইলেই পারি। মা, যে খালের ঝগড়া তুমি মিটাইলে, সেই খাল লইয়া দুই ঘরের দাঙ্গা-হাঙ্গামায় এই গোকুল সর্দারই বরাবর কর্তাদের ‘সর্দার’ ছিল। বুড়া হইলেও এখনও কজীতে যে জোর আছে, তাহাতে লাঠীর জোরে কুঠীর পঙ্গপাল নিপাত করিতে পারি। চাই কেবল হুকুম।”

বিধাত্রী দেবী বলিলেন, “ইহার আবার হুকুম কি, গোকুল ? ঘরে আগুন লাগিলে আগুন নিবাইতে হয় ; সে জন্ত কি কখনও কাছারীর হুকুমের বা মার আদেশের অপেক্ষা রাখিতে হয় ? তবে আমি তোমাদের মা—আমি এই কথা বলিতেছি যে,

তোমরা যদি কোনও বিপদে পড়, তবে যতক্ষণ এ বাড়ীর একথানা ইট থাকিবে, ততক্ষণ তোমাদের উদ্ধারের চেষ্টার কোনও ক্রটি হইবে না।”

“তবে আর কাহাকেও ভয় করি না” বলিয়া গোকুল সাষ্টাঙ্গে প্রণাম করিল।

পাশেই গোকুলের ছেলে ছিল। সে বলিল, “কিন্তু যদি—”

সহসা গোকুল ভীরের মত সোজা হইয়া দাঁড়াইয়া ছেলেকে বলিল, “চুপ কর, ছোটলোকের বাচ্ছা। মার কথায় অবিশ্বাস! তিন দিন পাঠশালার যাওয়ার এই ফল।”

ছেলের মুখ লাল হইয়া উঠিল; কিন্তু সে উত্তর দিল না। তখনও বাঙ্গালীর ছেলে বাপের কথার উপর কথা কহিতে শিখে নাই।

প্রজারা যখন ফিরিয়া যাইতেছিল, তখন কর্তা কাহারীর বাগানদ্বার আসিয়া বসিয়াছিলেন—নবীন নাপিত তাঁহার দাড়ী কামাইবার আয়োজন করিতেছিল। গোকুল কর্তাকে প্রণাম করিয়া বলিল, “আজ যে—জমীর কাছে আসিবে, তাহার মাথা ভাঙ্গিব।”

কর্তা চিন্তিতভাবে বলিলেন, “তাই ত!”

গোকুল বলিল, “তাহাতে আর কি, কর্তা মহাশয়; এ মরা খালটার জন্ত পরসার লোভে প্রাণ দিতে গিয়াছি, আর যান ইজ্ঞতের জন্ত মার আদেশে প্রাণটা দিতে পারিব না?”

কর্তা জাতিতে লাগিলেন।

তাহার পর প্রজারা কি করিয়াছিল, সে ইতিহাসের কথা।
বাঙ্গালার প্রকৃত ইতিহাস যদি কখনও লিখিত হয়, অর্থাৎ, যুদ্ধ ও শক্তি, রাজা ও শাসনকর্তা, এই সকলের কথা বাদ দিয়া, যে ইতিহাসে জাতীয় জীবনের স্তরপরস্পরা বর্ণিত হয়, জাতির উন্নতি-অবনতির কার্য-কারণ-সম্বন্ধ নির্ণীত হয়, সেই ইতিহাস রচিত হয়, তবে তাহাতে দেখা যাইবে, বাঙ্গালার নীল-বিদ্রোহ জাতীয় জীবনের যুগলক্ষি। তখন একদিকে বাঙ্গালার ইংরাজ নীলকরের অনাচার, আর এক দিকে ইংরাজ-শাসনে দেশের লোকের অবিচলিত বিশ্বাস; এক দিকে আত্ম ক্রিতে দেশের লোকের প্রত্যয়, আর একদিকে মুষ্টিমেয় নীলকারের স্বার্থসিদ্ধির চেষ্টা। সেই সময় জাতীয় সাহিত্যে ও দেশের জনসাধারণের কার্যে নূতন ভাবের পরিচয় পরিস্ফুট হইয়া উঠিয়াছিল। সেই সময় দীনবন্ধুর 'নীলদর্পণ' রচিত হয়; সেই সময় বাঙ্গালার পল্লী-প্রান্তর মুখরিত করিয়া জনসাধারণ গান করিত—“নীল বানরে সোনার বাঙ্গালা কল্লো এবার ছারেখার”; সেই সময় হরিশের ‘হিন্দুপেট্রিয়টে’ নীলকরের অত্যাচারের প্রতিবাদ; আর সেই সময় দেশের জনসাধারণের সম্ভবতঃ কার্যে বাঙ্গালা হইতে নীলের চাষের বিলোপ। স্বদেশী আন্দোলনের সময় যেমন, তখনও তেমনই ভাবের বক্তা—আত্মমর্যাদারক্ষার জন্ত আগ্রহ বাঙ্গালী পুরুষের রহিরকনের আঁচীরে প্রহত হইয়াই প্রত্যাবর্তন করে নাই; পরন্তু অস্তঃপুরেও প্রবেশ করিয়াছিল। বাঙ্গাপুত্রের

জমীদার-পত্নী বিধাত্রী দেবী সেই ভাবের অভিব্যক্তিতে প্রাণ-দিগকে প্ররোচিত করিয়াছিলেন।

প্রবল বাতায় বেমন বনে বহু দিনের সঞ্চিত আবর্জনা উড়হিয়া লইয়া যায়, প্রবল বজ্রায় বেমন মরীতে বহু দিনের সঞ্চিত আবর্জনা ভালাইয়া লইয়া যায়, নীলের হাজামার ডেমনই বাজালা হইতে নীলকরের অত্যাচার দূর করিয়া দিল। তখনও বাজালার লোকের অন্নকষ্ট ছিল না। তাহার “ক্ষেতের চাল, ক্ষেতের ডাল, ক্ষেতের তেল, ক্ষেতের শুড়, বাগানের তরকারী, পুকুরের মাচ” ছিল। তখনকার মধ্যবিত্ত অবস্থাপন্ন গৃহস্থের কথা ‘নীলদর্পণে’ প্রতিবিম্বিত হইরাছে—“আমার পনর গোলা ধান, ষোল বিঘার বাগান, আমার কুড়িখানা লাজল, পঞ্চাশ জন মাইন্দার; পূজার সময় কি সমারোহ, লোকে বাড়ী পরিপূর্ণ, ব্রাহ্মণভোজন, কালালীকে অন্নবিভরণ, আত্মীয়গণের আহার, বৈষ্ণবের গান, আমোদজনক যাত্রা।” নীলকরের অত্যাচার যখন চুষপের মত দূর হইয়া গেল, তখন বাজালী আবার যে বাহার কাজে মন দিল, মুখে-শাস্তিতে বাস করিতে লাগিল।

বিধাত্রী দেবীর এক দিনের একটি কথার ভাঁহার নাম বাজালার তিনটি জেলার অনেকগুলি গ্রামে পরিচিত হইয়া গেল; লোক বলিল, “সবই ভগবানের ইচ্ছা। তিনি কাহাকে দিয়া কি কাজ করান, কে বলিতে পারে? নহিলে কত যে হুকুম দিতে পারিলেন না—গৃহিণী কি সে হুকুম দিতে পারিতেন?”

ও সব তাঁহারই লীলা।” কেহ বলিল, “হইবে না—কেমন বাপের মেয়ে?”

তাঁহার পর আরও বিশ বৎসর কাটিয়া গেল। বিধাত্রী দেবী পতি-পুত্রের সংসার লইয়া—দেবসেবা ও লোকসেবা দেখিয়া—অতিথি-অভ্যাগতের আদর যত্নের বন্দোবস্ত করিয়া দিন কাটাইতে লাগিলেন। সে দিনের সে কথা স্মৃতিমাজে পর্য্যবসিত হইল। কর্তা গৃহিণীর ব্যঙ্গবিদ্রুপে মধ্যে মধ্যে কেবল তাঁহার বিকাশ হইত। কর্তা কোনও দিন কোনও কাজে অসময়ে অন্তঃপুরে আসিলে গৃহিণী জিজ্ঞাসা করিতেন, “এখন যে?” কর্তা আসল কথাটা বলিবার পূর্বে বলিতেন, “কেন, আমার কি এ সময় বাড়ীর মধ্যে আসিতে নাই? আমি অন্যরে আসিলাম, তুমি কাছারীতে যাও।” প্রথম প্রথম বিধাত্রী দেবী স্বামীর এই কথায় কৃত্রিম কোপ প্রকাশ করিতেন—“আচ্ছা মানুষ! সেই যে এক কথা গের দিয়া রাখিয়াছ।” কর্তা বলিতেন, “সে কথা ভুলিলে যে, সোনা ফেলিয়া আঁচলে গের দেওয়া হইবে।” শেষাংশে গৃহিণী বলিতেন, “বাইবই ত—আর দিন কতক দেয়ী কর—রমাবাবুকে লইয়া আমি কাছারী করিতে বাইব। কি বল রমাবাবু?” এই কথা বলিয়া তিনি একমাত্র সন্তানের পুত্র রমারঞ্জনকে সুখ চুষন করিতেন। কর্তা কিন্তু হারিবার পাত্র নহেন; তিনি বলিতেন, “‘ও ভয়ে কম্পিত নয় আমার হৃদয়।’ তুমি তোমার নুতন কর্তাকে লইয়া কাছারী করিতে বাইবে; আর আমি আমার নুতন গৃহিণীকে লইয়া রোজই

কাছারী করি।" এই নূতন গৃহিণী গৌরী—রমারঞ্জনর দিদি।
কর্তার কোলে সে মৌরশী বন্দোবস্তে কারেম মোকাম হইয়াছিল।

সেই স্নেহের সংসারে বিধাত্রী দেবীর দিন কাটিতেছিল।
কিন্তু তিনি যে কেবল সংসারের বন্দোবস্ত লইয়াই—দেবসেবা ও
পূজাদি লইয়াই—নাতি নাতিনৌকে লইয়াই—পতি, পুত্র, পুত্রবধু
লইয়াই ব্যস্ত থাকিতে পারিতেন, তাহাও নহে। বৈষয়িক
অনেক বিষয়ে কর্তা তাঁহার সঙ্গে পরামর্শ করিতেন। কিন্তু তাহা
কর্তা জানিতেন, আর তিনি জানিতেন। সম্পত্তির সব সংবাদ
যে তিনি নথ্যদর্পণে দেখিতেন, তাহা আর কেহ জানিত না।
যেমন নদীর প্রবাহে সহস্র সহস্র লোক উপকৃত হইলেও কেহ
গিরিগাত্রে লুক্কায়িত উৎসের সন্ধান রাখে না, তেমনই তাঁহার
পরামর্শে আরক্ত কার্য্যে প্রজাদের অনেক উপকার হইলেও সে
কার্য্যের কারণ তাহার জানিতে পারিত না। কেবল তাহার
কর্তার অনেক কাজেই প্রজার প্রতি স্নেহ দয়ার পরিচয় পাইত,
কিন্তু সে স্নেহ দয়া যে মাতৃহৃদয়ের কোমলতা-মন্বাকিনী হইতে
প্রবাহিত হইয়া পুরুষের কঠোরতা দ্বিধা ও সরস করিয়াছে,
তাহা বুঝিতে পারিত না। কিন্তু রায়-পরিবারের অন্তঃপুর হইতে
প্রবাহিত সেই স্নেহধারার প্রজারা দ্বিধা হইত।

পরিবারে কোথাও স্নেহের ও শান্তির বিন্দুমাত্র অভাব ছিল
না। লোকে বলিত, "সোনার সংসার। গৃহিণীর ওণে কোথাও
কোনও অভাব নাই।"

সহসা এই সংসারে বিপদের বজ্রপাত হইল। ম্যালেরিয়া

মহামারীর আকারে গ্রামে দেখা দিল, এবং বজ্র যেমন সর্বোচ্চ বৃক্ষকেই দগ্ধ করে, তেমনই প্রথমে রায়-পরিবারের চূড়া চূর্ণ করিয়া দিল। রায় মহাশয়ের লোকান্তরের পর—পিতার আত্মের জের মিটাইবার পূর্বেই—পুত্র পীড়িত হইলেন। গৃহিণী সকলকে লইয়া চিকিৎসার জন্য কলিকাতায় গেলেন। কিন্তু চিকিৎসায় কোনও ফল ফলিল না। দুই মাসের মধ্যে পতি পুত্র হারাইয়া বিধাতী দেবীর পক্ষে কুসুমাস্তৃত সংসার কণ্টকাকীর্ণ হইয়া গেল—সাজান সংসার আশান হইল!

২

বিশ বৎসর পূর্বে বিধাতী দেবীর যশ অন্দর হইতে বাহিরে ব্যাপ্ত হইরাছিল—বিশ বৎসর পরে অত্যন্ত ঘটনার অপ্রত্যাশিত সংঘটনে আবার তাহাই হইল। বিশ বৎসর পূর্বে তিনি কুটিরা-ছিলেন জরে—বিশ বৎসর পরে কুটিলেন পরাজয়ে; সেবার কুটিরাছিলেন ভাবে—এবার কুটিলেন অভাবে। এ পরাজয় আত্মের কাছে, অভাব জীবন-সর্বস্বের। পতিপুত্র-পারিত্যক্ত সংসার লইয়া তাঁহাকে ব্যস্ত হইতে হইল। রমার ও গৌরীর দিকে চাহিয়া তিনি শোক-বিস্কৃত-হৃদয়ে বল বাঁধিলেন—সংসার দেখিতে হইবে, সম্পত্তি রক্ষা করিতে হইবে, রমাকে ও গৌরীকে ‘মাতুষ’ করিতে হইবে, বিধবা পুত্রবধূকে ধর্মকর্ম শিক্ষা দিতে হইবে। তিনি আ দেখিলে সব নষ্ট হইবে, রমার ও গৌরীর

অবস্থ হইবে। তাই প্রবল চেষ্টায় শোকের আকুলতা সংঘত করিয়া, ক্ষমরে রাবণের চিতায় দাহ-বজ্রণা সহ করিয়া, তিনি উঠিয়া বসিলেন। তাঁহার ব্যথা বুঝিল কালীর মা; আর বুঝিলেন, বৃদ্ধ দেওয়ান। দেওয়ানজী দীর্ঘনিশ্বাস ত্যাগ করিয়া বলিলেন, “ভগবানের লীলা কে বুঝিবে? এ যে শোকেরও অবসর দিলেন না।”

দেওয়ানজী জানিতেন—বিধাত্রী দেবী সম্পত্তির সংবাদ জানিতেন; কিন্তু সব সংবাদ যে তিনি নখদর্পণে দেখিতেন, তাহা তিনিও জানিতেন না। এখন তিনি দেখিলেন, বিধাত্রী দেবী সবই জানেন। বিধাত্রী দেবী দীর্ঘনিশ্বাস ত্যাগ করিয়া মনে মনে বলিলেন, “যাহা বলিয়াছিলাম, হয়, তাহাই হইল! রমাকে লইয়া আমাকেই কাছারী করিতে হইল!” ‘কাছারী করিবার’ আরও একটা কারণ উপস্থিত হইল। জেলার ম্যাজিষ্ট্রেটের আদেশে একজন ডেপুটী ম্যাজিষ্ট্রেট আসিয়া বিষয়ের তার কোর্ট-অব-ওয়ার্ডসে লইবার প্রস্তাব জানাইলেন। বিধাত্রী দেবী তাহাতে অসম্মত হইলেন। তখন কোর্ট-অব-ওয়ার্ডসের অধীন নাবালক জমীদারদিগকে এক স্থানে রাখা হইত। তাহাতে তাঁহার আপত্তি ছিল। রমাকে ছাড়িয়া তিনি হয় ত থাকিতে পারিতেন—বখন এত সহিরাছে, তখন তাহাও হয় ত সহিত; কিন্তু পুত্রবধু কি লইয়া থাকিবে? তাহাকে যে ছেলে মেয়ে দিয়াই ভুলাইয়া রাখিতে হইবে, আর ধীরে ধীরে সংসারের কাজ শিখাইতে হইবে। বিধাত্রী দেবী বলিলেন, গৌরীপুরের জমিদারী

তাঁহার, আর তাঁহার খণ্ডরের নির্দেশানুসারে রাজাপুর জমীদারীর যে অংশ দেবোত্তর, তাহারও তিনিই আজীবন সেবাইত। সে সব বাদ দিলে বাহা অবশিষ্ট থাকে, কোর্ট-অব-ওয়ার্ডস তাহা সামান্য বলিয়া লইতে সন্মত হইলেন না। বিধাজী দেবী নিশ্চিত হইলেন; প্রজাদিগকে কি তিনি পরের হাতে সঁপিয়া দিতে পারেন?

পুত্রবধূকে এবং রমাকে ও গৌরীকে তিনি সদা সর্বদা কাছে রাখিতেন; একত্র উপবেশন, একত্র শয়ন; সর্বদা সকলে এক সঙ্গে থাকিতেন। বাহারা তাঁহার কার্যের প্রকৃত তাৎপর্য বুঝিল না, তাহারা বলিল, “শক্ত মেয়ে বটে! কিন্তু ঐ রমা গৌরীই ভরত মুনির যুগশি শু হইবে।” তাহারা বিধাজী দেবীকে চিনে নাই। এই সব কাজের মধ্যে তিনি সর্বদাই ইষ্টদেবতাকে ভাবিতেন—“পারের তরী ঘাটে আসিতে যে কয় দিন বিলম্ব হয়, সে কয় দিন অনন্তকর্ম্ম হইয়া তোমাকেই ডাকিবার অবসর দাও।” শোকে শান্তিলাভের জন্য তাঁহার পিতাও ধর্ম্মের আশ্রয় লইয়াছিলেন। তিনি শান্তি লাভ করিয়াছিলেন কি? কিন্তু তিনিও কতবার প্রতি কর্তব্য অসম্পূর্ণ রাখিয়া আত্মোন্নতির জন্য সংসার ত্যাগ করা অকর্তব্য বিবেচনা করিয়াছিলেন। এখন পিতার দৃষ্টান্ত কত! সর্বদা স্মরণ করিতেন। পিতার আদর্শে কত! আপনাকে অনুপ্রাণিত করিতেন। যে পিতা কতকে কোনও দিন মাতার অভাব অনুভব করিতে দেন নাই, বাহার নিষ্কলঙ্ক চরিত্র তাঁহার দেবদেবেরই পরিচায়ক ছিল, তিনি কর্তব্যে

অটল, এবং ধর্ম্মে অবিচলিত ছিলেন, সেই পিতাকে বিধাত্রী দেবী দেবতা জানেই পূজা করিতেন। প্রতিদিন দেবপূজা শেষ করিয়া প্রণামান্তে তিনি পিতৃমূর্ত্তি ধ্যান করিয়া পিতাকে প্রণাম করিতেন। এখন তিনি পিতার উদ্দেশে বলিতেন, “যেন তোমার কত্তা বলিয়া গর্ব্ব করিবার উপযুক্ত হই।”

পর বৎসরও যখন বর্ষার জল সরিতে না সরিতে ম্যালেরিয়া দেখা দিল, তখন বুঝা গেল—এই ব্যাধি পথভূলা অতিথিমান্ন নহে, বৎসর বৎসর বার্ষিক আদায় করিতে আসিবে। তখন বিধাত্রী দেবী দুইটি কাজ করিলেন; স্বামীর নামে গ্রামে একটি দাতব্য চিকিৎসালয় প্রতিষ্ঠিত করিলেন, আর কলিকাতায় একখানি বাড়ী কিনিলেন। বর্ষার পর কম মাসের অন্ত পুত্রবধূকে এবং পৌত্রপৌত্রীকে লইয়া তথায় বাস করিবেন। এ দিকে রমাকে ও গৌরীকে লেখাপড়া শিখাইবারও সময় উপস্থিত হইল। সে বিষয়ে তিনি যে ব্যবস্থা করিলেন, তাহাও তাঁহার তীক্ষ্ণবুদ্ধির পরিচায়ক। তিনি পুত্রবধূকে তাহাদের প্রথম শিক্ষা দিবার উপযুক্ত শিক্ষা দিতে প্রবৃত্ত হইলেন। কলিকাতায় তিনি পুত্রবধুর অন্ত শিক্ষারিত্রী নিযুক্ত করিয়া তাঁহাকে ইংরাজী ও বাঙ্গালা সাহিত্য পড়াইতে লাগিলেন; শিল্পকাজ শিখাইতে লাগিলেন। এ দিকে বিষয়কর্ম্মের আলোচনাকালে তিনি পুত্রবধূকে সর্ব্বদা সঙ্গে রাখিতেন। সংসারের কাজও তাঁহাকে দেখাইতেন।

বিস্তার বিধাত্রী দেবীর অসাধারণ আদর ছিল। সে ভাবও তিনি তাঁহার পিতার নিকট হইতে পাইয়াছিলেন। তাঁহার পিতা

করিতেন, “বিভাই পুরুষের ভূষণ।” কত পিতার কাছে চাপক্য-
রোক কর্তব্য করিয়াছিলেন—‘স্বদেশে পুণ্যতে রাজা, বিধান
সর্বত্র পুণ্যতে।’ আর ‘কতাপোষং পালনং শিক্ষণীয়াতিব্রতঃ’
বলিয়া চৌধুরী মহাশয় কতাকেও শিক্ষা দিতে কার্পণ্য করেন
নাই। সেই শিক্ষা কতাকে সংসারে সব কাজের উপযুক্ত করিয়া
গড়িয়া তুলিয়াছিল। পোত্র-পৌত্রীর বিদ্যাশিক্ষার জন্য তিনি
অকাতরে অর্থব্যয় করিতেন, এবং আপনি তাহাদের শিক্ষার উন্নতি
লক্ষ্য করিতেন। চর্চায় অভাবে তাঁহার বিদ্যা নিশ্চয় হইয়াছিল
বটে, কিন্তু প্রাথমিক শিক্ষার উন্নতি তিনি বেশ বুদ্ধিতে পারিতেন।
রমায় ও গৌরীর শিক্ষার উন্নতিতে তিনি পরম আনন্দ লাভ
করিতেন।

কালের মত ভিক্ষুক আর নাই; তাহার বিন্দু-প্রলেপে
আমাদের হৃদয়ে শোক ছুঁথের ক্ষতও দূর হয়; যে ক্ষত সারিবার
নহে, তাহারও বেদনা-বন্ত্রণা প্রশমিত হয়। বিধাতী দেবীরও
তাহাই হইয়াছিল। রমা গৌরীকে লইয়া তাঁহার সময় সময়
হাসির কারণে সমুজ্জ্বল হইত। বিশেষ তিনি তাহাদের প্রতি
আপনার কর্তব্য বিধাতার নির্দিষ্ট মনে করিয়া কাজ করিতেন।
সংসার হইতে বাহারা গিয়াছিলেন, সংসারে বা বিধাতী দেবীর
হৃদয়ে তাঁহাদের স্থান পূর্ণ হইল না বটে, কিন্তু বাহারা ছিল,
তাহাদের লইয়া সংসার আবার নূতন করিয়া গড়িতে হইল।

পুত্রবধূর প্রতি বিধাতী দেবীর মেহের সীমা ছিল না।
সংসারের সুখের আশ্রয় পাইতে না পাইতে তাঁহার পক্ষে জীবন

হৃৎকমর হইরাছে রলিরা বিধাত্রী দেবী সর্ম্মদা তাঁহাকে স্নেহে দীভল করিতে প্রয়াস পাইতেন। তাঁহার গির্জালয়ের কেহ আগিলে, তিনি পরম বদ্বৈ থাকিতেন। আগন্তকরা সকলেই বে আপম্ম-দেব আখীরকে-স্থপনামর্শ দিতেন, এমন নহে; কিন্তু তাহা জানিরাও বিধাত্রী দেবী-তাঁহাদিগকে আদয়ে আশ্যারিত করিতেন। ক্রমে তাঁহাদের প্রামর্শে পুত্রবধু বে শাতুড়ীর প্রাধাত্তে সময় সময় একটু বিরক্তি-চাঁকল্য গোপন করিতে পারিতেন না, তিনি তাহাও লক্ষ্য করিতেন। তিনি মনে মনে হাসিতেন; সবই পুত্রবধুর, লংসার তাঁহার, পুত্রকন্তা তাঁহার; তিনি ত তাহাদের অন্তই আত্মও সংপারের বন্ধনে বদ্ধ হইরা আছেন; তিনি ত এ বন্ধন হইতে মুক্ত হইতে পারিলেই কৃতার্থ হইবেন। তিনি তাহাতে হৃৎখিত হইতেন না। কিন্তু তিনি যখন লক্ষ্য করিতেন, তাঁহার ব্যবহারে তাহার মাতা বিরক্তি প্রকাশ করিলে, রমার নয়নে বেবনাকান্তর দৃষ্টি ফুটিয়া উঠিত, তখন তাঁহার বুকের মধ্যে একটা দারুণ মাতকা আগিয়া উঠিত—শুভ্র স্থানটা স্নেহে পূর্ণ করিবার চেষ্টা, রমাকে বন্ধে চালিয়া ধরিবার একটা প্রবল কামনা তাঁহাকে বিচলিত করিতে প্রয়াস পাইত। কিন্তু পাছে রমা তাহা বুঝিতে পারে, সেই ভয়ে তিনি সে ভাব ফুটিতে দিতেন না। রমা তাহা বুঝিতে পারিত কি না, জানি না; কিন্তু সময় সময় তাঁহার মনে হইত, সূর্য্যাকিরণ যেমন স্বচ্ছ হৃদের নিয়ন্তল পর্য্যন্ত ভেদ করে, রমার দৃষ্টি ভেদনই তাঁহার হৃদয়ের তলদেশ পর্য্যন্ত দেখিতে পাইতেছে। সাম্প্রতিক, শৈশবে শোকের সংসারে বর্দ্ধিত হইরা রমারজন-

বালমূল্য চাকল্য পরিহার করিয়াছিল। তাহার ব্যবহারে গাভীরা ও চিত্তা সপ্রকাশ থাকিত। বিশেষ সে সর্বদা ছারার মত পিতা-মহীর অনুসরণ করিত, তাঁহার স্নেহে সে এমনই পরিতৃপ্তি লাভ করিত যে, তাহার পক্ষে সংসারে আর কাহারও প্রয়োজন অনুভূত হইত না। পোস্ত্রী গোরী যে তাহার মাতার অধিক অনুরক্ত হইয়াছিল, তাহাও বিধাত্রী দেবীর তীক্ষ্ণ দৃষ্টি অতিক্রম করিতে পারিত না।

বিধাত্রী দেবী লক্ষ্য করিতেন, প্রকৃতি পুত্রকে পিতার ও কন্যাকে মাতার অনুরূপ করিয়া গঠিত করিয়াছেন। রমার মুখে যেমন, ব্যবহারেও তেমনই তিনি তাঁহার মৃত পুত্রের ছবি দেখিতে পাইতেন। সে তেমনই স্থির—ধীর—উদার—সহদর, তেমনই বুদ্ধিমান, বিবেচক, কর্তব্যনিষ্ঠ, আজ্ঞানুবর্তী। আর গোরী তাহার মাতার মত একটু চঞ্চল, ক্ষমতাশ্রির, সঙ্কীর্ণ স্বার্থের বশবর্তী। কিন্তু পোস্ত্র পোস্ত্রীতে তাহার স্নেহের তারতম্য ছিল না। তাহার দুই জন তাঁহার দুই নয়ন, দুই জনই সমান। রমাকে অশিক্ষিত করিবার জন্য তাঁহার আগ্রহের কারণ, তাহার উপর বংশের বশ ও সম্পদ নির্ভর করিতেছে; সে কুলগ্রন্থীপ বংশের শিবরাত্রির সলিতা; বিশেষ সে অল্প বয়সে অর্থ ও প্রভুত্ব লাভ করিবে; অশিক্ষিত না হইলে সে সম্পদ তাহার পক্ষে বিপদে পরিণত হইতে পারে। গোরীকে অশিক্ষিত করিবার জন্য তাঁহার আগ্রহের কারণ—অল্প দিনের মধ্যেই তাহাকে পরের ঘর করিতে যাইতে হইবে; বত সংবাদ লইয়াই মেয়ের বিবাহ দেওয়া বাড়ক

না, তাহার মধ্যে অনিশ্চয়ের অনেকটা অবসর থাকেই ; কারণ, অজ্ঞতার অন্ধকার সম্পূর্ণরূপে দূর করিয়া পরের সংসারের সবটা দেখা যায় না । বিশেষ জ্বীলোককে স্বামীর প্রেম, শাশুড়ীর স্নেহ, দেবরাদির ভালবাসা, এ সব নিজগুণে লাভ করিতে হয় । তাহাই জ্বীলোকের নিয়তি । সেই জন্ত তিনি যেন রমার অপেক্ষাও গৌরীর জন্ত অধিক চিন্তিত হইতেন ; সর্বদা তাহাকে সহপদেশ দিতেন । তাঁহার সেই আগ্রহের আতিশয্য যে সময় সময় গৌরীর ও গৌরীর মাতার কাছে ‘বাড়াবাড়ি’ বলিয়া বিবেচিত হইত, তাহাও তিনি জানিতেন ; কিন্তু জানিয়াও আপনার কর্তব্যে একনিষ্ঠ থাকিতেন ।

গৌরীর বয়স যখন দশ বৎসর হইল, তখনই বিধাত্রী দেবী দেওয়ানজীকে বলিলেন, “এখন হইতে উপযুক্ত পাত্রের সন্ধান করা ভাল ।” দেওয়ানজী বলিলেন, “ভাল—ঘটক দেখি ; কিন্তু আর এক বৎসর বাইলে ভাল হয়, সখলের মধ্যে ত ঐ ছই শুঁড়া ।” বিধাত্রী দেবী দীর্ঘশ্বাস ত্যাগ করিলেন ; “কিন্তু মেয়ে, রাখিবার ত নহে । দেখিতে দেখিতে বৎসর কাটিবে ।”

বাস্তবিক, গৌরীর জন্ত উপযুক্ত পাত্রের সন্ধানে তিনি চিন্তিত হইলেন । তাহার মাতা যখন তাঁহার আত্মীয়দিগকে রূপে গৌরীর উপযুক্ত এবং ধনবান্ পাত্রের সন্ধান করিতে বলিলেন, তাহার বহু পূর্বে হইতেই বিধাত্রী দেবী সে বিষয়ের আলোচনা করিতেছিলেন । পুত্রবধূর পিজালয়ের লোক বলিল, “গৌরীর বিবাহের আবার ভাবনা !” অনেকেই আপনার ঘরে গৌরীকে ও সঙ্গে সঙ্গে অনেক টাকা আনিবার কল্পনা করিলেন । কিন্তু ‘উপযুক্ত পাত্র’

সম্মুখে পুত্রবধূর মতে ও শাশুড়ীর মতে ঐক্য হইল না। পুত্রবা-
মনে করিতেন, রূপবান্ ও ধনবান্ জামাতাই উপযুক্ত ; শাশুড়ী
মনে করিতেন, পুরুষের বিদ্যা ও চরিত্রই রূপ, কেবল কুরূপ ন
হইলেই হইল ; ধনের দিকে তাঁহার লক্ষ্য ছিল না, ধনার্জন
পুরুষের আয়ত্তাধীন। কিন্তু তিনি মনে করিতেন, বংশ ও পরিবার
ভাল দেখিয়া গৌরীর বিবাহ দিবেন, কি জানি, যদি তাহার কষ্ট
হয়। তাহার মাতা ভাবিতেন, অর্থের বলে তাঁহার কন্তা স্বশুর-
বাড়ীতে প্রাধান্ত ও প্রভুত্ব লাভ করিবেই। ইহাতে কিন্তু বিধাতী
দেবী বলিতেন, “তাঁহা নহে, রাজকন্তা হইলেও মেয়ে স্বশুরবাড়ীতে
সকলের অধীন ; তাহাকে নিজ গুণে জরী হইতে হয়।” কিন্তু
এই কথায় কালীর মা এক দিন যখন বলিয়াছিলেন, “বোমা গরীবের
মেয়ে, তাই টাকার মর্যাদা অধিক কুঞ্জন,” তখন বিধাতী দেবী
বিরক্তি প্রকাশ করিয়া বলিয়াছিলেন, “আহা ! এখনও ছেলেমানুষ,
সংসারে দেখিয়া ও ঠেকিয়া নিখিতে হয় ; তাঁহা হয় নাই বলিয়াই
বোমা ভুল করিতেছেন।” অনেক দ্বিবে বিধাতী দেবী পুত্রবধূর
মতের জন্য আপনার মত ত্যাগ করিতেন, কিন্তু গৌরীর জন্য
পাত্রনির্বাচনের মত অত্যাবশ্যক বলিয়া তিনি তাঁহা করিতে
পারিলেন না। তিনি বুঝিলেন, এ ক্ষেত্রে তাঁহা করিলে তিনি
কর্তব্যভ্রষ্ট হইবেন।

তথাপি যখন পুত্রবধূর সঙ্গে মতভেদ প্রবল হইয়া উঠিল, তখন
তিনি চিন্তিত হইলেন ; তাঁহার মনে সন্দেহের ছায়া পড়িল।
শেষে তিনি ইষ্টদেবতার উদ্দেশে, মনে মনে প্রার্থনা করিলেন,

“মানুষের পক্ষে ভ্রম অতিক্রম করা অসম্ভব, আত্মশক্তিতে অতি-প্রত্যয় মানুষকে ভ্রান্ত করে। তোমরা আমার দৌর্বল্য অবগত আছ, আমাকে কর্তব্য-পথ দেখাইয়া দাও। আমি যেন গোরীর পাত্নিনীকীচনে ভুল না করি।” তিনি একান্তচিত্তে প্রার্থনা করিলেন; কিন্তু কোনও উত্তর পাইলেন না। দিবালোক-বিকাশের পূর্বে সমুদ্র যেমন অন্ধকার হইয়া থাকে, আশঙ্কার অনিশ্চিতভাবে তাঁহার হৃদয় তেমনই অন্ধকার হইয়া রহিল। আর কেহ তাহা লক্ষ্য করিল কি না, জানি না—কিন্তু রমা তাহা লক্ষ্য করিল। অপরাহ্নে সে আসিয়া পিতামহীর কাছে দাঁড়াইল। বিধাত্রী দেবী জিজ্ঞাসা করিলেন, “রমাবাবু, আজ বেড়াইতে যাও নাই?” সে বলিল, “না।” তিনি জিজ্ঞাসা করিলেন, “কেন?” কোনও উত্তর না দিয়া সে তাঁহার কাছে বসিল, তাহার পর তাঁহার কোলে মাথা রাখিয়া শুইয়া পড়িল। তিনি তাহার কেশ মধ্যে অঙ্গুলি-সঞ্চালন করিতে লাগিলেন।

নিকটে আর কেহ ছিল না। রমা বলিল, “ঠাকুরমা, আজ কয় দিন হইতে তুমি কি ভাবিতেছে?” বালক যে তাঁহার চিন্তার ভাবও লক্ষ্য করিয়াছে, তাহাতে বিধাত্রী দেবী বিস্মিত হইলেন; কিন্তু বলিলেন, “ভাবনা কি, রমা?” রমা পিতামহীর মুখের দিকে চাহিল, তাহার বড় বড় চক্ষুদ্বয়ে অশ্রু দেখা দিল—পিতামহী তাহাকে আপনার চিন্তার কারণ জানিতে দিবেন না। বিধাত্রী দেবী আর থাকিতে পারিলেন না—স্বামীর ভালবাসা, পুত্রের ভক্তি, সে সবই কি এই বালকের মূর্ত্তি পরিগ্রহ করিয়া আবিভূত

তাহাই বলিয়া আমার সোনার কমল কৰ্মনাশার জলে ভাসাইয়া দিতে পারিব না।” অনেক ধনীর ঘরের সম্বন্ধ তাঁহার পছন্দ হইল না। পুত্রবধূর পিতৃভাগ্যের সকলে বিরক্ত হইয়া গৌরীর মাকে বলিলেন, “না—বাছা, আমরা আর ইহার মধ্যে নাই। তোমার শান্তদীর বুঝি যে কি, তাহা আমরা বুঝি না। তাঁহার বিশ্বাস, তিনি যেমন বুঝেন, তেমন আর কেহ বুঝে না।” পুত্রবধূ বিরক্তি গোপন করা দুঃসাধ্যক্রমে অনাবশ্যক মনে করিতে লাগিলেন। বিধাত্রী দেবী সে সব গ্রাহ্যই করিলেন না।

বহু সম্বন্ধের প্রস্তাব ত্যাগ করিবার পর একটি প্রস্তাবে বিধাত্রী দেবীর একটু আগ্রহ লক্ষিত হইল। পাত্ররা দুই ভাই, এক ভগিনী; ভগিনী জ্যেষ্ঠা, পাত্র সর্বকনিষ্ঠ। ভগিনীপতি হাইকোর্টের উকীল, ওকালতীতে বশ অর্জন করিয়াছেন। জ্যেষ্ঠ ভ্রাতা এটর্নী হইবার জন্য প্রস্তুত হইতেছে—আর এক বৎসর অবশিষ্ট আছে। পাত্র ওকালতী পরীক্ষা দিয়াছে, এখনও কল বাহির হয় নাই। ছেলে দুইটি ‘হীয়ার টুকরা’; বিশেষ, পাত্র; সে সব পরীক্ষার সর্বোচ্চ স্থান অধিকার করিয়াছে। সংসারে কেবল মা। স্বামী ডাক্তার ছিলেন, অপেক্ষাকৃত অল্প বয়সে বশের মন্দিরের সোপানেই তাঁহার মৃত্যু হয়। তিনি বাহা রাখিয়া গিয়াছিলেন, তাহাতেই বিধবা পুত্রদ্বয়কে ‘বাহুব করিয়াছেন’। গৌরীর মা ঘটকীকে জিজ্ঞাসা করিলেন, “ছেলে দেখিতে কেমন?” ঘটকী বলিল, “বাছা—ছেলে কার্তিক; তবে বর্ণ তোমার মেয়ের বর্ণের মত অত সুন্দর নহে।”

গৌরীর মা বলিলেন, “কেন—আমি ত বলিয়াই দিয়াছি, আমি সেরা সখন্ধ চাহি।” বিধাত্রী দেবী বলিলেন, “পুরুষের রূপ বিড়ায়, তবে কুরূপ না হয়।” ঘটকী বলিল, “সে ত মা, তোমরা দেখিয়াই লইবে। ঘটকীর কথায় ত আর কাজ করিবে না।” গৌরীর মা জিজ্ঞাসা করিলেন, “পরসায় কেমন?” ঘটকী কবুল জবাব দিল, “সে, ছেলের মা স্পষ্টই বলিয়া দিয়াছে—আমার থাকিবার মধ্যে দুই ছেলে, আর মাথা গুঁজিবার বাড়ীটুকু। ছেলেরা বিবাহ করিতেই চাহে না; বলে—‘গরীবের ঘরে কে মেয়ে দিবে?’ আমি বলি, ‘আমি গরীবের মেয়েই আনিব। কিন্তু আমি আর পারি না; বধূদের হাতে সংসার সঁপিয়া দুই দণ্ড ভগবানের নাম করিবার অবসর করিয়া দাও।’ তাই অনেক বলার ছেলেরা স্বীকার হইয়াছে। দুই ছেলের বিবাহ এক সঙ্গে হইবে—বড়র ঠিক হইয়াছে। সে মেয়ের বাপও বড়মাহুষ; ঐ ছেলে দেখিয়া কুঁকিয়াছেন। এখন সব কথাই ভাবিয়া বলিলাম। তোমরা যেমন ভাল বুঝিবে, তেমনই কাজ করিবে।”

গৌরীর মা বিরক্তি-বাঞ্ছক-স্বরে বলিলেন, “এই সখন্ধ!” ঘটকী বলিল, “হাঁ, মা, এই সখন্ধ। আমরা—ঘটক-ঘটকীরা একটু বাড়াইয়াই বলি। কিন্তু ছেলের মা আমাদের বলিয়া দিয়াছে—‘ঘটক ঠাকুরণ, আমার বাহা নাই, তাহা আছে বলিয়া আমি লোককে ঠকাইতে পারিব না। আমি যেমন বলিয়া দিয়াছি, তুমি তেমনই বলিবে।’ বিশেষ, তোমাদের এ সখন্ধ, তাহাড়াও

পছন্দ করিবে কি না, জানি না।” বাহার সম্বন্ধে মধ্য হুই ছেলে, আর একথানা বাড়ী, সে সম্বন্ধ পছন্দ করিবে কি না সম্বন্ধ ! আহত অভিমানে গৌরীর মা জিজ্ঞাসা করিলেন, “কেন—আমাদের অপরাধ ?” ঘটকী বলিল, “অপরাধের কথা নহে, মা ; তাহারা বলে, ‘বড়মানুষের ঘরে কাজ করিব ? সমানে সমানে নহিলে কুটুখ-কুটুখিতার স্মৃতি হয় না। তা’ বড়রও ‘বড়মানুষের’ ঘরেই সম্বন্ধ পাকা হইল।”

বধুর ব্যবহারে বিধাত্রী দেবী একটু বিস্মিত হইলেন। মানুষ টাকার এত গর্ব করে কেন ? বিশেষ, মধ্যবিত্ত গৃহস্থের সংসারে, জন্মগ্রহণ করিয়াও বোমা টাকাকেই এত বড় করেন কেমন করিয়া ? তিনি বলিলেন, “টাকার কথা তুলিতে নাই। কথায় বলে, ‘জীভাগো ধন।’ আমার দিদিমণির কপালে টাকার অভাব হইবে না। পুরুষ মানুষের টাকা উপার্জন করিতে কতক্ষণ ? মানুষ টাকা করে—টাকা কখনও মানুষ করিতে পারে না। সম্বন্ধের কাগজ আনিয়াছ কি ?” “এই যে বাছা!”—বলিয়া ঘটকী অঞ্চলে বদ্ধ ‘কমলাকান্তের দপ্তর’ হইতে তিনখানা কাগজ লইয়া বলিল, “দেখ মা, কোন্‌খানা।” গৌরীর মা প্রথমখানার নাম পড়িতেই ঘটকী বলিল, “ওখানা নহে—ও বৈভবের।” তিনি দ্বিতীয়খানা লইয়া পড়িলেন—“পাত্রের নাম—ঐমান্‌ সুশীলচন্দ্র বন্দ্যোপাধ্যায় ; পাত্র এম্‌.এ, পরীক্ষায় সর্ব-প্রথম স্থান—” ঘটকী বলিল, “হাঁ—ঐখানা।” বিধাত্রী দেবী একজন দাসীকে সেখানা দিয়া বলিলেন, “ঐখানা সরকার

মহাশয়কে দিয়া নকল করাইয়া আন।” পুত্রবধূ এ সম্বন্ধে শান্তভীর মত দেখিয়া বিস্মিত ও বিরক্ত হইলেন; কিন্তু কিছু বলিলেন না—এখনও সময় আছে।

ঘটকী চলিয়া যাইবার পর বিধাত্রী দেবী একজন চাকরকে বলিলেন, “দেখিয়া আর, দেওয়ানজী মহাশয় একবার আসিতে পারেন কি না।” ভৃত্য আসিয়া সংবাদ দিল, দেওয়ানজী আসিয়াছেন। দেওয়ানজী বৃদ্ধ হইয়াছেন—আর কাজ করিতে পারেন না; কিন্তু বিধাত্রী দেবী তাঁহাকে কাজ ছাড়িতে দেন নাই। তিনি অনেক সময় আপনার বাড়ীতেই থাকেন—পূর্ণ বেতন পায়েন, প্রয়োজন হইলে তাঁহাকে আনান হয়। কেবল যে কয় মাস বিধাত্রী দেবী কলিকাতায় থাকেন, সে কয় মাস দেওয়ানজীও কলিকাতায় থাকেন—শরীর ভাল থাকে, নিত্য গল্পালাপও হয়।

বিধাত্রী দেবীর আদেশে ভৃত্য সম্বন্ধের কাগজখানা দেওয়ানজীকে দিল। বিধাত্রী দেবী বলিলেন, “দিদিমণির জন্ত এই একটা সম্বন্ধ আসিয়াছে, ইহার সন্ধান আপনাকেই লইতে হইবে। ঘটকীর বর্ণিত সব বিবরণ তিনি দেওয়ানজীকে জানাইলেন। দেওয়ানজী পিরানের পকেট হইতে চশমা বাহির করিয়া চক্ষুস্থান হইলেন, এবং কাগজের লেখা পাঠ করিয়া বলিলেন, “মা, বোধ হয় একটা ঠিকানা করিতে পারিব। পাজের ভগিনীপতিকে আমি জানি। সুন্দরগঞ্জের চরের মোকদ্দমার ‘ঐনাথ দাস মহাশয়ের সঙ্গে ইনি আমাদের ‘জুনিয়র’ উকীল

ছিলেন। আমি তাঁহাকে কাগজপত্র বুঝাইয়া দিয়াছিলাম—
তিনি দাম বাবুকে আর ব্যাবিষ্টার ‘সাহেব’কে বুঝান। খুব ধারাল
উকীল। বলেন ত তাঁহার কাছেই যাই।” বিধাত্রী দেবী
বলিলেন, “আমি জীলোক—আমি কি ও সব জানি। যাহা
করিতে হয়, আপনি করিবেন।” “আচ্ছা মা, তাহাই হইবে।
ক্ষেত্রনাথকেও সঙ্গে লইয়া যাইব।” বলিয়া দেওয়ানজী বিদায়
লইলেন। ক্ষেত্রনাথই এখন দেওয়ানের কাজ করেন; তিনি
দেওয়ানজীর অধীনে কাজ করিয়া কাজ শিখিয়াছেন, তাঁহারই
হাতে গড়া।”

সেই দিনই সন্ধ্যার পর বিধাত্রী দেবী সন্ধ্যা-আফ্রিক শেষ
করিয়া উঠিলে ভৃত্য আসিয়া সংবাদ দিল, দেওয়ানজী মহাশয়
একবার দেখা করিবেন। তিনি ‘সন্ধ্যা’ সারিয়া আসিবেন।

দেওয়ানজী আসিয়া বলিলেন, “মার অদৃষ্টে ছয় আনা কাজ
হাসিল করিয়া আসিয়াছি।” বিধাত্রী দেবীর প্রশ্নের উত্তরে
তিনি জানাইলেন, উকীল বাবুর বাড়ীতে তিনি পাত্রটিকেও
দেখিয়াছেন, তাহার সঙ্গে আলাপও করিয়াছেন। বিধাত্রী দেবী
জিজ্ঞাসা করিলেন, “ছেলে দেখিতে কেমন?” দেওয়ানজী
বলিলেন, “ছোট মাঠাকুরাণীর উপযুক্ত, রূপে শতে এক—শুণে
হাজারে এক।” বিধাত্রী দেবী বলিলেন, “কিন্তু আমি যে
শুনিয়াছি, বর্ণ আমার দ্বিবিমণির বর্ণের সমান নহে।” দেওয়ানজী
বলিলেন, “আমার বুড়া মানুষের চোখ, অত সূক্ষ্ম প্রভেদ আর
বুঝিতে পারি না, ততটা ঠাহর হয় না। তবে বোধ হয়, মার

আমার বর্ষ ছুধের ফেনার গোলাপের আভা, পাত্তের বর্ণ সোনার আভা। তবে পুরুষ মানুষের বর্ষ যতই কেন পরিষ্কার হউক না—
 বার মত যত্নের মেয়ের বর্ণের মত থাকে না।” বিধাত্রী দেবী
 দেওয়ানজীর প্রথম কথার মনে মনে একটু হাসিলেন—বুড়ার
 দৃষ্টিতে অতিরিক্ত প্রত্যয় না থাকিলে তিনি তাহার উপর নির্ভর
 করিতেন না, বুড়ার ঠাহরের পরিচয় তিনি পাইয়াছেন। দেওয়ানজী
 কর্তার আদেশে বর্ষাধিককাল মেয়ে বাছাই করিয়া পুত্রবধূর
 নির্বাচন করিয়াছিলেন—আর সব সন্ধান লইয়া তিনি তখনই
 বলিতেছিলেন—“কিন্তু গোলাপেও কাঁটা থাকে, তবে মানুষের
 প্রকৃতি শিক্ষার বশ।”

বিধাত্রী দেবী জিজ্ঞাসা করিলেন, “ছেলের কথা কি বলেন?”
 দেওয়ানজী উত্তর দিলেন, “মনে হইল ‘মানুষ’ হইবে।” বিধাত্রী
 দেবী বলিলেন, “তবে সব সন্ধান লউন।”

দেওয়ানজী সন্ধান লইয়া সম্বন্ধ পছন্দ করিলেন। কথাবার্তা
 অগ্রসর হইতে লাগিল। শেষে বিধাত্রী দেবী বলিলেন, “গোঁরীর
 বিবাহ তিনি নিজে ঘর-সংসার না দেখিয়া দিতে পারিবেন না।”
 দেওয়ানজী তাহারও ব্যবস্থা করিলেন। বিধাত্রী দেবী পুত্রবধূকে
 সঙ্গে লইয়া গোঁরীর ভাবী ঘর দেখিতে গেলেন। সম্বন্ধটা বে
 ঠাহার মনের মত হয় নাই, সেটা আর একবার জানাইয়া দিবার
 ক্ষমতা গোঁরীর মা বলিলেন, “তা মা, আপনি দেখিয়াই বাহা হয়
 করুন।” কিন্তু শাওড়ীর কথা ও আপনার কোতুলক তিনি
 এড়াইতে পারিলেন না।

বিধাত্রী দেবী পাঁচা গৃহিণীর মত বাড়ীর সাজসজ্জা হইতে পাত্রের মাতার কথাবার্তা সব লক্ষ্য করিলেন। তাঁহার সমস্ত দৃঢ় হইল—তিনি গৌরীর উপযুক্ত পাত্র পাইয়াছেন। পাত্রের মাতা বলিলেন, “মা, আপনি সব দেখিলেন। ধনীর মেয়ে ঘরে আনিতে আমার যেমন সঙ্কোচ হয়—গরীবের ঘরে মেয়ে দিতে আপনারও অবশ্য তেমনই সঙ্কোচ হইবে। আমি অনেক ভাবিয়া, মেয়ে-জামাইয়ের সঙ্গে পরামর্শ করিয়া তবে সাহস পাইয়াছি। আমি কোনও কথা গোপন করিতে চাহি না। আপনি ভাল করিয়া বিবেচনা করিয়া যে হয় উত্তর দিবেন।”

পাত্রের মাতার এই স্পষ্টোক্তি বিধাত্রী দেবীর বড় মিষ্ট বোধ হইল। ‘গৌরীর মা কিন্তু মনে করিলেন, অতটা বিনয় কেবল তাঁহার শাশুড়ীর মন ভুলাইবার জন্য। বড়মামুষের ঘরে কাজ করিতে সঙ্কোচ! বলে, ‘সেধো! খাবি?—না, হাত ধুয়ে বসে আছি।’

ইহার পর বিবাহের আয়োজনের পক্ষ পড়িল। কলিকাতার বিবাহ হইবে, কিন্তু উৎসবের আনন্দ হইতে বিধাত্রী দেবী গ্রামের লোককে বঞ্চিত করিতে পারিবেন না। স্মৃতরাং বিবাহের পর তিনি নাতিনী নাতজামাই লইয়া গ্রামে যাইবেন; উৎসব তথায় হইবে; শেওয়ানজী মণ্ডর হইতে পুরাতন কর্দ বাহির করিয়া তাহার কালোচিত পরিবর্তন করিতে লাগিলেন; গহনার ফর্দের বিচার হইতে লাগিল; কাপড়ের নমুনা দেখা চলিতে লাগিল, ইত্যাদি।

যখন আশীর্বাদের দিন দেখিবার জন্ত পুরোহিত-ঠাকুরকে বলা হইল, তখন একদিন বধূঠাকুরাণী তাঁহার খাস দাসীকে বলিলেন, “আমি বাহা মনে করিয়াছিলাম, তাহাই। ছেলের মা, গৃহিণীকে ‘গুণ’ করিয়াছে, পাশকরা ছেলে এখন গড়াগড়ি দায়—পরসা নহিলে কিছুই হয় না। ঐ রমার মাষ্টারও ত এম্-এ, পাশকরা।” সেই দিন দাসী দেওয়ানজী মহাশয়কে জানাইল, “বধূঠাকুরাণী বলিলেন, আপনি রমাগৌরীর মঙ্গলই দেখেন। গৌরীর এ সম্বন্ধ কি মনের মত হইল?” দেওয়ানজী কথাটা শুনিয়া বিচলিত ও ব্যথিত হইলেন। পুত্রবধুর সঙ্গে তাঁহার মতভেদের কথা বিধাত্রী দেবী এমনই গোপন রাখিয়া-ছিলেন (তিনি মনে করিতেন, মাতে মেয়েতে মতভেদ হইলে তাহা আর কাহারও জানিবার নহে) যে, দেওয়ানজী বুঝাফেরেও তাহার আভাস পান নাই। আজ এই কথায় তিনি একটু শঙ্কিত হইলেন—তবে কি সংসারে অশান্তির বিষ প্রবেশ করিয়াছে? তিনি সেই দিনই বিধাত্রী দেবীর সঙ্গে দেখা করিয়া জিজ্ঞাসা করিলেন, “সব ব্যবস্থা ত স্থির হইল। কিন্তু একটা কথা—বধূঠাকুরাণী এ সম্বন্ধ সম্বন্ধে কি বলেন?” দেওয়ানজীর প্রশ্ন শুনিয়াই বিধাত্রী দেবী বুঝিলেন, কথাটা আর গোপন নাই। তিনি বলিলেন, “বধুমাতা ‘ছেলে মানুষ’, তিনি বাহাই কেন বলুন না, আপনি কি বলেন—টাকা দেখিব, না মানুষ দেখিব? দাঁড়ি-পাল্লার কোন্ দিক্ অধিক ভারী?” দেওয়ানজী উত্তর করিলেন, “আমরা গরীব লোক, আমাদের টাকার দিক্‌টাই

গৌরীর বিবাহের পর দিন ‘বর-কনে বিদায়’ হইয়া গেল।

বিধাত্রী দেবী এতক্ষণ প্রবল চেষ্টার আপনাকে স্থির রাখিতে পারিয়াছিলেন। উৎসবের আনন্দের মধ্যে তাঁহার শূণ্য বুকের মধ্যে যে ব্যথা মুহূর্তে মুহূর্তে প্রবলতর হইয়াছিল, তিনি যেন তাহা আর সহ্য করিতে পারিতেছিলেন না। স্মৃতি কেবলই তাঁহার শোকক্ষেতে ক্ষার নিক্ষেপ করিতেছিল। শেষে যখন বর কন্ডা আশীর্বাদে সমর স্তম্ভের হাতে গৌরীর হাত দিয়া তাঁহাকেই বলিতে হইল—“এত দিন গৌরী আমার ছিল, আজ তোমাকে দিলাম”—তখন তাঁহার মনে হইল, তিনি ভাগিয়া পড়িবেন, আর স্থির থাকিতে পারিবেন না। তাঁহার বুকের মধ্যে পূত্রহারা জননীর শোক-বেদনা ফুকারিয়া কাঁদিয়া উঠিতে লাগিল। আজ কোথায় সে—তাঁহার বকের রক্ত—স্নেহের সঞ্চল, যে তাঁহার কন্ডাকে জামাতার হস্তে সমর্পিত করিবে? সে কোথায়? আর কোথায় তিনি—তাঁহার শোকবেদনবিক্ত জননী! হায় দেবতা, এ কি তোমার বিধান! তবুও তিনি প্রবল বলে আপনাকে স্থির রাখিয়া, যেন যন্ত্রচালিতবৎ সকল কর্তব্য সম্পন্ন করিলেন। কিন্তু চারি দিকের লোক জন, কাজ—সে সব যেন তিনি আর লক্ষ্য করিতে পারিতেছিলেন না, অশ্রু যেমন তাঁহার দৃষ্টিপথ রুদ্ধ করিতেছিল, বেদনা তেমনই তাঁহার অনুভূতি অস্পষ্ট করিতেছিল। ‘বর-কনে বিদায়’ হইয়া গেলে তিনি আপনার কক্ষে বাইরা রিক্ত

হৃদয়ভালে পড়িলেন—মনের শক্তি ও শরীরের শক্তি এক সঙ্গে ভাঙিয়া পড়িল। তাঁহার ব্যথিত হৃদয়ের সঞ্চিত বেদনা—পুঞ্জীভূত রোদন একটীমাত্র আর্তনাদে আত্মপ্রকাশ করিল—“বাবা !” তিনি আর তাহার বিকাশ রুদ্ধ করিতে পারিলেন না।

তখন পার্শ্বের কক্ষে গৌরীর মা চক্ষুর জল মুছিতে মুছিতে রমাকে গৌরীর বাড়ী পাঠাইবার আয়োজন করিতেছিলেন। রমার সাজসজ্জা তিনি পূর্বেই বাহির করিয়া রাখিয়াছিলেন। গৌরী পহুছিলে তাহার কেমন আদর হয়, রমা তাহা দেখিয়া আসিবে। তিনি রমাকে সেই সব কথা বলিতেছিলেন। এমন সময় পার্শ্বের ঘরের আর্তনাদ শ্রুত হইল। গৌরীর মার জ্যেষ্ঠাইমা বলিলেন, “আজ শুভ দিন, আজ না কাঁদিলে হইত না ?” গৌরীর দিদিমা বলিলেন, “আহা, আজ শোক যে নূতন হইয়া উঠে।” বিধবা হুহিতার জননী তিনি—তাঁহার নয়ন অশ্রুপূর্ণ হইয়া উঠিল।

রমা দ্রুতপদে কক্ষ ত্যাগ করিল। যে বেদনার পিতামহীর মুখে বাতনার ভাব ফুটিয়া উঠিয়াছিল, উৎসবানন্দের মধ্যে আর কেহ তাহা লক্ষ্য করে নাই ; কিন্তু রমা লক্ষ্য করিয়াছিল। সে সেই বেদনার এমনই বিকাশের অন্তর্গত উৎকর্ষ হইয়া ছিল। পিতামহীর আর্তনাদ তাহার শ্রবণগোচর হইবামাত্র সে দিদির বাড়ী বাইবার অন্ত মার উপদেশ ভুলিয়া গেল—ছুটিয়া বাইয়া ঠাকুরমার কাছে শুইয়া তাঁহার কণ্ঠলগ্ন হইয়া কাঁদিতে লাগিল। বিধাজী দেবী তাহাকে বক্ষে টানিয়া লইলেন। তিনি পুত্রহারা—সে পিতৃহারা ; কাহার দুর্ভাগ্য অধিক—কাহার বেদনা অধিক ?

রমাকে বুকের কাছে লইয়া তাঁহার কত কথা মনে হইতে লাগিল। এক দিন তাহার পিতাও এতটুকুই ছিল—এমনই তাঁহার ছায়ার মত থাকিত, তাঁহাকে ছাড়িয়া থাকিতে পারিত না। একবার মনে হইল, বুঝি এ সেই—তিনি তাহাকেই বক্ষে ধরিয়া আছেন—এত দিনের, এত বৎসরের এই শোক, এই ব্যথা, এ সব দুঃস্বপ্ন—সত্য নহে। কিন্তু তখনই সে ডুল ভাঙ্গিয়া গেল—বুকে যে চিতানল, তাহা ত নির্বাপিত হইবার নহে। তবে এও সেই—তাঁহার সেই অমূল্য নিধি—সেই স্নেহের সর্বস্ব, সেই স্নেহবন্ধনেই বদ্ধ আছে। তিনি স্নেহের আবেগে রমাকে আরও কাছে টানিয়া লইলেন—যেন সে শোকের ক্ষতে স্নিগ্ধ ভেষজ।

বেদনার আবেগোচ্ছ্বাস প্রশমিত হইবার পর বিধাত্রী দেবী উঠিয়া বসিলেন—রমার চক্ষু মুছাইয়া দিলেন। তাহার পর তিনিই উত্তোগ করিয়া তাহাকে দিদির বাড়ী পাঠাইয়া দিলেন, এবং সে কিরিয়া আসিলে নানা কথা জিজ্ঞাসা করিলেন।

সঙ্কারণ পর দেওয়ানজী প্রভৃতিকে ডাকাইয়া তিনি কুলশয্যার ত্ত্বের কর্দ ঠিক করিলেন—কত জন লোক যাইবে, কিরূপ কি ব্যবস্থা হইবে, সব স্থির করিলেন, দ্রব্যাদি বাহাতে যথাকালে পহুছে, তাহার জন্ত উপদেশ দিলেন।

পর দিন তত্ত্ব পাঠাইয়া সরকার প্রভৃতির প্রত্যাবর্তন পর্য্যন্ত তিনি বসিয়া রহিলেন, এবং তাহার কিরিয়া যখন জানাইল, ‘কুটুম বাড়ী’ সকলেই তত্ত্বের প্রশংসা করিয়াছে, তখন যেন নিশ্চিন্ত হইলেন।

তাহার পর 'বর-কনে' গ্রামে লইয়া যাইবার ব্যবস্থা। তিনি পুত্রবধূকে বলিলেন, "বোমা, আমি আগে যাই—সব গোছগাছ করিয়া রাখি, তুমি মেয়ে জামাই লইয়া যাইবে; বরং বেহাইন ঠাকরুণ আমার সঙ্গে চলুন, দুই জনে পরামর্শ করিয়া কাজ করিব।" গৌরীর মা এ প্রস্তাবে সাগ্রহে সন্মতি দিলেন; কেন না, ইহাতে তিনি শাশুড়ীর আওতাছাড়া হইয়া কর্তৃত্ব করিবার অবসর পাইলেন। যাইবার সময় কিন্তু সব বিষয়ের বন্দোবস্ত এমন ভাবে করিয়া গেলেন যে, পুত্রবধূর কর্তৃত্ব-প্রকাশের বড় অবসর রহিল না। শেষে তিনি জিজ্ঞাসা করিলেন, "বোমা, রমা বাবু আমার সঙ্গে যাইবেন, না তোমার সঙ্গে যাইবেন?" বোমা কিছু বলিবার পূর্বেই তাহার মা ঠাট্টা করিয়া বলিলেন, "গৃহিণী কি আর কর্তাকে ছাড়িয়া যাইবেন?" বিধাত্রী দেবীও হাসিয়া বলিলেন, "হাঁ—বাড়ীর কর্তার কি আগে বাড়ী না গেলে ভাল দেখায়। বিশেষ আমার এই শেষ কাজ, কর্তা গৃহিণী পরামর্শ করিয়া করাই ভাল। তবে কি না কর্তা এবার দোটানায় পড়িলেন।" বেহাইন বলিলেন, "সে ভয় নাই, বেহাইন; দুই দিনে তোমার কর্তাকে পর করে, এমন সাধ্য কাহারও নাই। কিন্তু শেষ কাজ—রমার বিবাহ নহিলে হইবে না।" বিধাত্রী দেবী বলিলেন, "সে আশীর্বাদ আর করিও না, বেহাইন! এইবার আমার ছুটি।"

গ্রামে উৎসবের শ্রোত বহিল—কোনও দিকে কোনরূপ ক্রটি হইল না। কিন্তু সেই উৎসবের আনন্দালোকের মধ্যে ভবিষ্যতের

দিকে যে ছায়া পড়িল, তাহা বিধাত্রী দেবীও লক্ষ্য করিতে পারিলেন না। লক্ষ্য করিল—কেবল স্ত্রীল। বিধাত্রী দেবীর ব্যবহারে আর তাহার শাণ্ডীর ব্যবহারে স্ত্রীল একটু প্রভেদ লক্ষ্য করিত। তাহার প্রতি বিধাত্রী দেবীর স্নেহ যেন শতধারায় উচ্ছ্বসিত হইয়া উঠিল—তাঁহার সকল ব্যবহারে তাহা আত্মপ্রকাশ করিত। শাণ্ডীর ব্যবহারে সে তাহা পাইত না। সে মনে করিত, তাহা হয় অতিসংঘমের ফল, নহে ত স্নেহের অপূর্ণতার পরিচায়ক। সে তাহা অতিসংঘমের ফল বলিয়াই ধরিয়া লইতে চেষ্টা করিত—শাণ্ডীর কর্তৃত্ব-চালিত সংসারে গৌরীর মা হয় ত জামাতার প্রতি স্নেহ প্রকাশ করিতে একটু দ্বিধা অনুভব করেন। কিন্তু গৌরীর মার প্রগল্ভা জোঠাইমার অসতর্ক কথায় এক দিন তাহার সে ভাব দূর হইয়া গেল। তিনি কথায় কথায় গৌরীর মাকে বলিলেন, “তা, মা, তুমি মনে হুঃখ করিও না—রূপে তোমার গৌরীর মত না হউক, জামাই দেখিতে শতে এক জন; আর পরসী? সে বেহাইন ঠিকই বলিয়াছেন, মেয়ের কপালে থাকে, টাকার অভাব হইবে না।” স্ত্রীল সে কথা শুনি। কোনও কোনও কথা জলের উপর জলবিন্দুর মত পড়ে,—একটু চাঞ্চল্য সৃষ্টি করে, তাহা অচিরে মিলাইয়া যায়; আবার কোনও কোনও কথা শীশার গুলির মত পড়ে—জলে ডুবিয়া যায় বটে, কিন্তু নষ্ট হয় না, বটনার জাল সময় সময় তাহা জড়াইয়া তুলিয়া জীবনের কূলে ফেলে। এই কথাও স্ত্রীল ভুলিল না—তাঁহার শাণ্ডী রূপে ও ধনে যেমন জামাতা চাহিয়াছিলেন, সে তেমন হয়

নাই। তবে কি সে জীবনে ভুল করিল? প্রথমেই সে ধনীর
 দ্রুহিতা বিবাহ করিতে ভয় পাইয়াছিল। তাহার আশঙ্কাই কি
 তবে সত্য হইল? সে রাত্রিতে সে ঘুমাইতে পারিল না। তাহার
 পার্শ্বে নিদ্রিতা স্নানরী পদ্মীর মুখে চাহিয়া ভাবিল—মার মনের
 ভাব যে কল্পার মনেও প্রতিবিম্বিত হইবে না, তাহাই বা জানিব
 কি করিয়া? নবোন্মেষিত যৌবনে প্রথম প্রণয়বিকাশের কালে
 এমন সন্দেহ অশেষ যন্ত্রণার কারণ। বসন্তের বাতাসে যখন ফুল
 ফুটিয়া উঠে, তখন যদি সহসা তুষারপাতে বসন্তশোভা বিলীন হয়,
 তবে সে বড় দুঃখের। বিনিদ্র স্নানরী বুঝিল, যত দিন গৌরী
 তাহার প্রেমে এই সন্দেহ-চিহ্ন ধোত করিয়া দিতে না পারিবে,
 তত দিন তাহাকে এই বেদনা-চিহ্ন বহন করিতে হইবে। জীবনে
 সে চিহ্ন অপনীত হইবে কি? সে দীর্ঘনিশ্বাস ত্যাগ করিল।
 যখন শিক্ষিত যুবক বিবাহিত জীবনের দায়িত্ব গ্রহণ করে, তখন
 সে সুখশান্তিময় সংসার-রচনার আশায় সে দায়িত্ব গ্রহণ করিতে
 সাহস করে। জীবনে সুখ, শান্তি, সম্ভান লাভ করিয়া যত্ন হইবার
 আশা করে। তাহার কল্পনা তাহার জন্ত নন্দনের রচনা করে;
 তাহার পর স্বামী-স্ত্রীর প্রেমসঞ্জাত শক্তি সে কল্পনা বাস্তবে পরিণত
 করিতে পারে। প্রেম বিরাট সেতুর মত উভয়ের হৃদয় যুক্ত করে।
 কিন্তু যে স্থলে সেই সেতুর কোনও অংশে—কোনও একটা কীলকে
 মরিচা ধরিবার অবকাশ থাকে, সে স্থলে সর্বনাশ সংঘটিত হইতে
 পারে। অতর্কিতভাবে শ্রুত এই কথাটি সেইরূপ সর্বনাশের
 অবকাশ প্রদান করিবে কি না, কে বলিতে পারে? কিন্তু

সুশীলের সে সন্দেহ সুশীল ব্যতীত আর কেহ জানিতে পারিল না। সে বনকে প্রবোধ দিবার চেষ্টা করিল—কিন্তু প্রবোধ শাস্ত করিতে পারিল না।

সুশীল কলিকাতায় ফিরিবার জন্য ব্যস্ত হইল। তাহাকে দেখিয়া বিধাজী দেবীর মনে হইল, বোধ হয়, তাহার শরীর ভাল নাই। তিনিও তাহাকে অধিক দিন থাকিবার জন্য জিব করিলেন না। দশ দিনের মধ্যে সে ফিরিয়া গেল। দ্বন্দ্বের প্রেমাত্মভূতির আনন্দের সঙ্গে সন্দেহের বেদনা গইয়া গেল।

কলিকাতায় ফিরিয়াই বিধাজী দেবী সুশীলের মাতার সহিত সাক্ষাৎ করিলেন। তিনি বলিলেন, “সুশীল উকীল হইল—উপার্জন এক দিনে হয় না, বিশেষ তাহাকে হাইকোর্টের একটা পরীক্ষা দিতে হইবে; কিন্তু খরচ বাড়িল; এখন সংসারের ভাবনা সুশীলের মারও যেমন, তাঁহারও তেমনই। তিনি সুশীলকে মাসে এক শত টাকা করিয়া দিবেন।” সুশীলের মা সহসা প্রস্তাবের উত্তর দিতে পারিলেন না; বলিলেন, “মা, টাকাকড়ির কথা—আমি ছেলেদের জিজ্ঞাসা না করিয়া কিছু বলিতে পারি না। তাহারা বাহা বলিবে, তাহাই কুইবে। এখন তাহারা বড় হইয়াছে।”

সুশীলের মা যখন পুত্রদ্বয়কে এই প্রস্তাব জানাইলেন, তখন সুশীলের মুখ পাণ্ডুবর্ণ হইয়া গেল। এই প্রস্তাবে তাহার প্রতি অহুকম্পা এবং তাহার স্বপ্নরবাজীর শ্রেষ্ঠ প্রতিপন্ন করিবার চেষ্টা নাই ত? সে বলিল, “মা, পরের পরসার উপর নির্ভর

করিয়া কাজ নাই—আপনার যাহা পাই, তাহাতেই সন্তুষ্ট থাকিব।” তাহার স্তাবস্তর স্বীকা করিয়া তাহার মাতা বলিলেন, “তোমার ইচ্ছা না হয়—লইয়া কাজ নাই। কাল তুমি ও নিমন্ত্রণ থাইতে বাইবি, সেই সময় তোমার দিদিশাপুতীকে বলিয়া আসিস। আমি বলিতে পারিব না—তাঁহার কথা এমন মিষ্ট যে, ‘না’ বলিতে পারা যায় না।”

পর দিন স্নানীয় খণ্ডরালয়ে যাইলে যখন নিকটে আর কেহ ছিল না, তখন বিধাজী দেবী তাহার নিকট সে প্রস্তাব করিলেন। সে প্রস্তাবে অস্বীকৃত হইলে তিনি স্নেহের দ্বারা তাহার যুক্তি খণ্ডিত এবং আপত্তি নিরস্ত করিলেন, এবং শেষে বলিলেন, “তবুও যদি তোমার কোনও আপত্তি থাকে, তুমি এ টাকা গৌরীর মেয়ের বিবাহে গৌরীর বুড়া ঠাকুরমার যৌতুক বলিয়া নিও ; কিন্তু, দাদা, আমার কথা রাখ—আমার মনে কষ্ট দিও না।” তাঁহার কথার ও ব্যবহারে স্নানীয় তাহার প্রতি দয়ার বা আপনার ধনগর্ভবিকাশচেষ্টার কোনও পরিচয়ই পাইল না। গৃহে কিরিয়া সে তাহার মাতার সহিত সেই কথার আলোচনা-কালে বলিল, “মা, আমিও হারিয়া আসিলাম। কিন্তু ভাল হইল না।”

এই মাসহারার ব্যবস্থা বিধাজী দেবী পূজাবধূকে জানাইলে তিনি বলিলেন, “এক শত টাকায় কি হইবে?” তাঁহার কথায় যে খোঁচাটুকু ছিল, বিধাজী দেবী তাহা বুঝিলেন—যে ঘরে কাজ করা হইয়াছে, তাহাকে এক শত টাকা দিয়া গৌরীর উপযুক্ত

খণ্ডরবাড়ী করা অসম্ভব। অথচ রমাকে ও গৌরীকে তিনি কোনও দিন বিলাসে লালিতপালিত করেন নাই, তিনি বিলাসের বিরোধী ছিলেন। বাহা হউক, বোমার কথার প্রচুর আঘাতটুকু তিনি গ্রহণ করিলেন না; কেবল ভবিষ্যতে কর্তব্য সম্বন্ধে ইঙ্গিত-প্রকাশের অভিপ্রায়ে বলিলেন, “দিবার দরকার হইলে সুযোগও পাওয়া যাইবে। এখন অধিক দিবার প্রস্তাব করিলে তাহারা মনে করিবে, আমরা ‘বড়মামুসী’ দেখাইতেছি। তাহা হইলে তাহারা এ প্রস্তাবে সম্মত হইত না।” বোমা কথাটার স্পষ্ট জবাব দিলেন না; কিন্তু মনে মনে বলিলেন, “তাহারা পাইবার আশাতেই এ ঘরে কাজ করিয়াছে।”

এই বিষয়ে পূত্রবধূর সঙ্গে বিধাত্রী দেবীর মতান্তর ঘটিতে লাগিল। গৌরীর মা ধনের প্রাধান্তে মেয়ের খণ্ডরবাড়ীকে বড় করিবার কল্পনা করিলেন; বিধাত্রী দেবী সে কল্পনাকে মনে স্থান দান করিতে অসম্মত হইলেন। তৎসম্বন্ধে উভয়ের মতের প্রভেদ আত্মপ্রকাশ করিতে লাগিল। ছয় মাস পরে যখন গৌরী ‘ঘর করিতে’ গেল, তখনও তাহাই হইল। তাহার মা বলিলেন, “মেয়ের সঙ্গে দুই জন ঝি দিবেন।” বিধাত্রী দেবী বলিলেন, “এক জন মাত্র ঝি যাইবে—সেও স্থায়ী হইয়া নহে; তাহার মা গৌরীর শান্তি কল্পনা ব্যবস্থা করেন, তাহা দেখিয়া তবে তাহাকে স্থায়ী করা না করার কথা বিচার করা যাইবে। কারণ, মেয়ের স্বাচ্ছন্দ্যই দেখিতে হইবে—‘বড়মামুসী’ দেখাইয়া কুটুম্বের সঙ্গে লব্ধ তত্ত্ব করা সুবুদ্ধির কাজ নহে।” অবশ্য বিধাত্রী দেবীর

কথাই বজায় থাকিল; কিন্তু তিনি বুঝিলেন, ক্রমে ব্যাপার জটিল হইয়া উঠিতেছে।

কাশীধামে গোবীপুত্রে চৌধুরীদিগের একখানি বাড়ী ছিল। বিধাত্রী দেবী বাড়ীটা সর্বদাই অসংস্কৃত রাখিতেন; আত্মীয় কুটুম্ব যখন চাহিত, তাহাকেই বাসের অনুমতি দিতেন। এইবার বাড়ীর আবার সংস্কার হইল। তাহার পর তিনি কাশীবাসের ব্যবস্থা করিতে প্রবৃত্ত হইলেন। তিনি সম্পত্তির ও সংসারের আর ব্যয়ের পাকা ব্যবস্থা করিলেন যে, কেহ কিছু নষ্ট করিতে না পারে। গোবীপুত্রে সম্পত্তিতে তাঁহার অধিকার এবং শ্বশুরের ও স্বামীর ব্যবস্থানুসারে যাত্রাপুত্রে জমীদারীতে তাঁহার কর্তৃত্ব তিনি ত্যাগ করিলেন না; কেবল উইল করিলেন—তাঁহার মৃত্যুর পর সব রমারঞ্জন।

চুর্গোৎসবের পর তিনি গ্রাম হইতে যাত্রা করিলেন। প্রজারা বলিল, “এত দিনে আমরা মাতৃহীন হইলাম।”

দেওয়ানজী বলিলেন, “এইবার আমার ছুটির দরখাস্ত মঞ্জুর করুন, মা!” বিধাত্রী দেবী উত্তর করিলেন, “আমি আর বহল বরখাস্তের মালিক নহি। এখন বোমা সব দেখিবেন।” তবে দেওয়ানজী বুঝিলেন, প্রকারান্তরে তাঁহার ছুটীই হইল। কারণ, বুড়ার বুদ্ধি কাজে লাগাইবার যোগ্যতা বিধাত্রী দেবীরই ছিল, সকলের থাকে না।

কর্মচারীরা বলিল, “কি জানি—কি হয়!”

সম্পত্তির, সংসারের, দেব-সেবার, অতিথি-সেবার, রমার ও

গৌরীর সব ব্যবস্থা বিধাত্রী দেবী পুত্রবধূকে বুঝাইয়া দিলেন। তাহার পর বিশ্বনাথের চরণে আশ্রয়বেশন করিবার জন্ত যাত্রা করিলেন।

আশ্রিতাদিগের মধ্যে কেহ কেহ তাঁহার সঙ্গে গেল। কালীর মা প্রাচীনা হইয়াছিল, সে সঙ্গে গেল। সে না কি বাইবার সময় তাহার বহিনবিকে বলিয়াছিল, বৌবার সঙ্গে মতান্তরের জন্তই গৃহিণী এত দীর্ঘ কাশীবাসে চলিলেন।

৫

ঋতুরবাড়ীতে গৌরীর আদর বড়ের বিন্দুমাত্র ক্রটি ছিল না। তাহার শাশুড়ী মুখে বাহা বলিয়াছিলেন, মনেও তাহাই ভাবিতেন; বধূরা 'ছেলেমানুষ', মুখে লালিতাপালিতা, পাছে তাহাদের কোনও অসুবিধা হয়, সেই জন্ত তিনি তাহাদিগকে সংসারের কোনও কাজ করিতে দিতেন না; যে কাজ তাহারা সখ করিয়া করিতে চাহিত, কেবল তাহাই তাহারা করিতে পাইত। সে বিষয়ে গৌরীর মাতা গৌরীর অপেক্ষা অধিক বুদ্ধির পরিচয় দিয়াছিল; সে জিদ করিয়া কাজ করিত; গৌরীর সে বিষয়ে তেমন আগ্রহ দেখা যাইত না। বিধাত্রী দেবী তাহাকে যত আদরেই রাখিয়া থাকুন না, সর্বদাই কাজ করিতে উপদেশ দিতেন, এবং শিখাইতেন। গৌরী যখন 'কর করিতে' যায়, তখনও তিনি তাহাকে সে বিষয়ে বিশেষ সহপদেশ দিয়াছিলেন। কিন্তু গৌরীর

মাতার ভাবটা গোঁরীতে সংক্রান্ত হইয়াছিল। মা যে সর্বস্বাই মনে করিতেন, গোঁরীর খণ্ডরবাড়ী তাঁহার মেয়ের উপযুক্ত হয় নাই, মেয়ে তাহা জানিত। সে পিতামহীকে সংসারের সব কাজ করিতে দেখিয়াছিল, এবং আপনার সংসারের কাজ আপনি করা যে অপমানজনক নহে, তাহাও বুঝিত; কিন্তু তাহার মা তাহাকে বুঝাইয়াছিলেন, সে ত আর সংসারের কর্তা নহে, কাজেই যে সংসারে কির অভাবে বাড়ীর বধূকে সংসারের কাজ করিতে হয়, সে সংসারে কাজ করা বধূর পক্ষে অপমান ব্যতীত আর কিছুই নহে। তাই গোঁরী কাজ করিতে আগ্রহ প্রকাশ করিত না। তাহাতে তাহার শাশুড়ী কিছুই মনে করিতেন না; কিন্তু শুলীল বিরক্ত হইত। বিশেষ শাশুড়ীর যে মতের বিষয় সে জানিতে পারিয়াছিল, তাহাতে সে গোঁরীর ব্যবহারে সন্দেহ করিত, সেও মনে করিতে আরম্ভ করিয়াছে, খণ্ডরবাড়ী তাহার মত ধনী কস্তার উপযুক্ত হয় নাই। এইরূপ বিশ্বাস যুবকের পক্ষে যেমন কষ্টকর, তাহার ভালবাসার পক্ষে তেমনই মারাত্মক। ইহা সসর্প গৃহে বাসের অপেক্ষাও ভয়ানক, চক্ষুতে বালু লইয়া কাজ করার অপেক্ষাও কষ্টকর। সে বাহাই হউক, খণ্ডরবাড়ী যে গোঁরীর কোনরূপ অঙ্গবিধা হইতেছে, এমন কথা বলিবার অবকাশ তাহার মাতাও পাইলেন না।

এইরূপে এক বৎসর কাটিল। সেলে শুলীলকুমারের পরিবারে একটা দারুণ ছরটনা ঘটিল। সকললে একটা মামলা করিতে বাইয়া তাহার ভগিনীপতি অর লইয়া আসিয়াছিলেন। ক্রমে

তাহা প্রবল হইলে ডাক্তারেরা রক্ত-পরীক্ষায় তাহার নিদান নির্ণয় করিলেন—কালাজ্বর। দীর্ঘ ছয় মাস সর্ববিধ চিকিৎসা চলিল ; কিন্তু কিছুতেই কিছু হইল না। জরে পড়িবার কিছুদিন পূর্বে তিনি অনেক টাকা খরচ করিয়া মেয়ের বিবাহ দিয়াছিলেন, ব্যয়সাধ্য চিকিৎসার খরচ কুলাইতে অবশিষ্ট সঞ্চিত অর্থ ফুরাইয়া গিয়াছিল। কাজেই তাঁহার মৃত্যুর পর সুশীল ও তাহার ভ্রাতা দ্বিধাকে আপনাদের সংসারভূক্তা করাই সম্ভব ও কর্তব্য বিবেচনা করিল।

সুশীল হাইকোর্টের বিশেষ পরীক্ষায় উত্তীর্ণ হইয়াও ভাল করিয়া ওকালতী আরম্ভ করিতে পারে নাই ; ভগিনীপতির চিকিৎসার ও শুশ্রূষার জন্য বিব্রত ছিল। দ্বিধাকে সংসারভূক্তা করিবার পর সে-ই জিদ করিল, বড় ভাগিনেরকে বিলাতে পড়িতে পাঠাইবে। ছেলেকে বিলাতে পাঠাইবার সব ব্যবস্থা তাহার ভগিনীপতিই করিয়াছিলেন—কিন্তু কল্পনা কার্যে পরিণত হয় নাই। সুশীল যখন তাঁহার সেই ইচ্ছা কার্যে পরিণত করিতে জিদ করিল, তখন তাহার দ্বিধাই তাহাতে সর্বাপেক্ষা প্রবল আপত্তি করিলেন। তিনি বলিলেন, “ভাই, আমার পোড়া কপালে সে আশাও স্বপ্নানে পুড়িয়াছে, ও কথা আর তুলিও না। সে আশা এখন ছেঁড়া চোটাইয়ে শুইয়া লক্ষ টাকার স্বপ্ন দেখার সমান।” সুশীল কিন্তু ছাড়িল না। দ্বিধা বলিলেন, “তুমি কি পাগল ? একে এই সব ছেলে মেয়ে লইয়া তোমাদের গলগ্রহ হইয়াছি—তোমাদের অবস্থা বাহা, তাহাও ত জানি ; এখন কি আর মাসে মাসে ছই শত

তিন শত টাকা জোগান যায়।" সুশীল যেটা জিন ধরিত, সহজে সেটা ছাড়িত না ; সে হিসাব করিয়া দেখাইল, মাসে দুই শত টাকা হইলেই খরচ কুলাইবে, আর তাহাতে শেষে লাভ ব্যতীত লোকসান নাই ; কারণ, এ দেশে ডাক্তার হইতে ভাগিনেয়ের আরও চারি বৎসর লাগিবে। বিলাতে যাইলে সে দুই বৎসরে ডাক্তার হইয়া আসিতে পারিবে। সে বলিল, "তোমার বাড়ীর ভাড়া মাসে এক শত টাকা আছে, আর আমার খণ্ডরবাড়ীর এক শত টাকা আছে, ইহাতেই কুলাইয়া যাইবে।" দিদি অনেক করিয়া বুঝাইলেন, এখন আর সুধীরকে বিলাতে পাঠান সম্ভব নহে। সুশীল কিছুতেই বুঝিল ন্ত। সুধীর প্রথম পরীক্ষায় উত্তীর্ণ হইয়াছিল—তাহাকে সে এক মাসের মধ্যেই বিলাতে পাঠাইবে। সে তখনই সব ব্যবস্থা করিতে বসিয়া গেল। দিদি সংসারভুক্ত হওয়ার খরচ বাড়িয়াছে, যথাসম্ভব ব্যয়সঙ্কোচ করিতে হইবে। কোনও প্রয়োজন না থাকিলেও, পাছে বধুদিগের অসুবিধা হয়, সেই আশঙ্কায় তাহার মাতা দুই বধূর জন্য দুই জন দাসী রাখিয়াছিলেন। সেই বাছল্য কমাইয়া সুশীল ব্যয়সঙ্কোচের প্রস্তাব করিল। সেই প্রস্তাব হইতে সংসারে বিষম গোল বাধিল।

গৌরীর দাসীর কাজ কিছুই ছিল না বলিলেই হয়। কাজের মধ্যে তাহার বাপের বাড়ী সংবাদ-বহন। সে দেখিল, এইবার সে অবস্থার পরিবর্তন অবশ্যসম্ভাবী ; তাই সে নানা কথা গৌরীর 'কান ভারী' করিতে লাগিল। গৌরী তাহার কথা বুঝিল,

এই যে ব্যবস্থা হইতেছে, ইহাতে তাহার মর্যাদার হানি হইতেও পারে, অন্ত্রবিধা হইবেই।

পর দিন অপরাহ্নে গৌরী সংবাদ পাঠাইয়া বাপের বাড়ীর গাড়ী আনাইয়া মার সঙ্গে দেখা করিতে গেল। মা যখন জিজ্ঞাসা করিলেন, “আজ তাড়াতাড়ি আসিলি কেন? আজ মাসের সংক্রান্তি, আজই কিরিয়া যাইতে হইবে; যখন আসিলি, দুই দিন পরে আসিলে ত দুই দিন থকিয়া যাইতে পারিতিস।” উত্তরে গৌরী বলিল, “কাল হইতে আমার ঐ সংসারের কাজে যাইবে, আর ত আসিবার অবসর পাইব না, তাই আজ আসিলাম।” মা বিষয় প্রকাশ করিয়া জিজ্ঞাসা করিলেন, “কেন রে?” তখন গৌরী সব কথা তালিয়া বলিল। মা দীর্ঘনিশ্বাস ত্যাগ করিয়া বলিলেন, “ঠাকরুণ যে কি বুঝ বুঝিয়া এ কাজ করিয়াছিলেন।” তাহার পর তিনি বলিলেন, “আমি কাল স্নানলকে বলিব, তা হইবে না; তোর ঐ রাখিতে হইবে।” গৌরী বলিল, “না—তুমি কিছু বলিও না; কি জানি কে কি মনে করে।” মা বাক্য দিয়া বলিলেন, “কেন? আমি ত মাসে এক শত টাকা দিয়া থাকি, আমার মেয়ের একটা ঐ রাখিতে হইবে, সে কথাও বলিব না? এত ভর কিসের?”

সন্ধ্যার পর গৌরী যখন কিরিয়া গেল, তখন মার আদেশে রমা দিদির সঙ্গে যাইয়া স্নানলকে পর দিন নিমন্ত্রণ করিয়া আসিল।

মেয়ের বিবাহে যে তাহার কথা থাকে নাই, শাওড়ী আপনার

মতে কাজ করিয়াছিলেন, সে কথা গোরীর মা কখনও ভুলিতে পারেন নাই। সে বিষয়ে তাঁহার আহত অভিমান মনের মধ্যে বদ্ধ থাকিয়া, বাহির হইবার পথ সন্ধান করিতেছিল—পথ পাইতে ছিল না, কাজেই সূশীলের সঙ্গে বিরাধার কথায় তিনি রাধিয়া ঢাকিয়া কথা কহিতে পারিলেন না, কথাটা গোড়া হইতেই একটু কড়া হইল। সূশীলও এই বিষয়ে অতিরিক্ত সতর্ক ছিল; গোড়া হইতেই কথাটা একটু বাঁকা ভাবে ধরিল। শাণ্ডী যখন প্রথমে বলিলেন, “গোরীর বিকে না কি জবাব দিতেছ?” তখনই সূশীল বুঝিল, পূর্ব দিন গোরীই আসিয়া সে সংবাদ দিয়া গিয়াছে। সে দৃঢ়ভাবে বলিল, “জবাব দিতেছি না, অন্য কাজ দিতেছি।” শাণ্ডী সে ব্যবস্থায় আপত্তি করিয়া বলিলেন, “দেখ বাবা, তা হইবে না—আমার ঐ এক মেয়ে, উহার কোনও কষ্ট আমি সহ করিতে পারিব না।” সূশীল উত্তর দিল, “বাহাতে কোনও কষ্ট না হয়, সে ব্যবস্থা আমি করিয়াছি।” শাণ্ডী মাত্রা আর একটু চড়াইয়া বলিলেন, “দেখ, আমি যে মাসে মাসে এক শত টাকা দিয়া থাকি, সে তোমার ভাগিনেয় ভাগিনেয়ীর জন্য নহে, আমার মেয়ের জন্য।” সূশীল বলিল, “অনুগ্রহ করিয়া এই মাস হইতে আর টাকা দিবেন না। যত দিন সে টাকা স্নেহের উপহার ছিল, তত দিনই ভাল ছিল, এখন তাহা অনুগ্রহ হইয়াছে, সুতরাং আমার পক্ষে সে টাকা লওয়া একেবারেই নিগ্রহ।” তাহার মাসহারা যে অনুগ্রহে পরিণত হইয়াছে, ইহা সে এত দিন লক্ষ্য করিতে পারে নাই বলিয়া, সূশীল আপনাকে ধিকার দিল।

বিধাত্রী দেবীর আমলের আর বর্তমান সময়ের ব্যবস্থার প্রভেদ মুহূর্ত্তে তাহার কাছে পরিস্ফুট হইল। তিনি গোপনে তাহাকেই মাসহারার টাকা দিতেন—সে আসিতে না পারিলে দুইবার তাহার বাড়ীতে যাইয়াও দিয়া আসিয়াছিলেন; এখন আর সে আবরণ নাই। এই কথা স্মরণ করিয়া সুশীল আপনার প্রতি দিক্কারে একটু উত্তেজিত হইয়া উঠিল। শাণ্ডী বলিলেন, “আজ তাহা বলিতে পার—এখন বুঝি ‘মামুষ’ হইয়াছে—আর দরকার নাই।” সুশীল বলিল, “যে ভুল হইয়াছে, তাহা সংশোধন করা অসম্ভব, সুতরাং আমি আর কোনও কথা বলিতে চাহি না। আমি জানি, রূপে ও অর্থে যেমন জামাই আপনি চাহিয়াছিলেন, তেমন পান নাই। কিন্তু সে জন্ত আমাকে অপরাধী করিতে পারিবেন না।”

সুশীল বুঝিতে পারিল, সে আপনার বীরতা রক্ষা করিতে পারিতেছিল না; তাই সে ব্যস্ত হইয়া প্রস্থান করিল। শাণ্ডীর কাছে বিদায় লইবার সময় সে যে ব্যস্ততা প্রযুক্ত তাহাকে প্রশ্ন করিয়া আসিতে ভুলিয়া গিয়াছিল, তাহা গোরীর কাছে শুনিবার পূর্বে তাহার মনেও হয় নাই। রাত্রিকালে শয়নকক্ষে আসিয়া সে দেখিল, গোরী বসিয়া আছে। সুশীলের মনে হইত, তাহার সুন্দরী পত্নীর সঙ্গে সাগরের সাদৃশ্য অসাধারণ। গোরীর মুখে সাগরের সৌন্দর্য, নয়নে সূর্য্যকরোজ্জ্বল নীলোদ্গির দীপ্তি, হৃদয়ে সাগরবারিচ চঞ্চল্য, হাসিতে তরঙ্গলীলা, কুন্দদন্তে সাগরের ফের-শোভা। আজ সে সাদৃশ্য আরও পরিস্ফুট মনে হইল; আজ তাহার নয়নের দীপ্তি মধ্যাহ্ন দিবাকরের কিরণপ্রদীপ্ত সাগরের

তরকোচ্ছাসের মত, তাহার অধরে সাগরোর্ধ্বের কুঞ্জন। গৌরী সুনীলকে বলিল, “আমাদের বাড়ী গিয়াছিলে?” স্বরে কোমলতার লেশমাত্র ছিল না।

সুনীল বলিল, “হঁ।।”

“মাকে প্রণামেরও অযোগ্য মনে করিয়া তাক্ষীলা করিয়া আসিয়াছ!”

সুনীল বুঝিল, ইহার মধ্যেই তাহার মাতা তাহাকে সংবাদ পাঠাইয়াছেন। কিন্তু শান্তদীর সঙ্গে কথা কহিবার সময় তাহার মনের বেগ ব্যয়িত হইয়া গিয়াছিল—সে আর বিচলিত হইল না, বলিল, “আমি বড় চঞ্চল হইয়াছিলাম, তাই, বোধ হয়, ভুল করিয়াছি; ইচ্ছা করিয়া যে তাঁহাকে প্রণাম করি নাই, এমন নহে।”

সুনীল নরম হইল দেখিয়া গৌরী স্বরে আর এক পর্দা চড়াইয়া দিল—“তাঁহাতে মায় কোনও ক্ষতি হইবে না, ক্ষতি যদি কাহারও হয়, সে তোমাদেরই। মাসহারার টাকা আর লইবে না, বলিয়া আসিয়াছ?”

“হঁ।।”

“তা’র পর? এমিকে ত ভাগিনে বিলাতে পাঠাইতেছ!”

“তা’র পরের অল্প উত্ত ভাবি না। আমার ছেলে অবস্থার উপযোগী শিক্ষার সন্ধান না থাকিলে আমার পয়সায় ‘বড়মানুষ’ হইবার স্বপ্ন দেখিয়াছিলাম, সে স্বপ্ন টুটিয়া গিয়াছে, এখন আপনার অবস্থায় আপনি সন্তুষ্ট থাকিতে পারিব।”

গোবী আর কোনও উত্তর খুঁজিয়া পাইল না, কেবল বিজ্ঞপ-
বাজক স্বরে বলিল, “ওঃ—”

সে রাত্রিতে সুশীল ঘুমাইতে পারিল না। সে বুঝিল, তাহার
জীবনে দাম্পত্য স্ত্রের আশা গোবীর সে দিনের ব্যবহারের অগ্নিতে
পুড়িয়া ভস্ম হইয়াছে—কেবল তাহাকে যাবজ্জীবন বহিঃজালা সহ
করিতে হইবে। অথচ এই যাতনার কথা কাহাকেও বলিবার
নহে। সে যত ভাবিতে লাগিল, তত দারিদ্র্যের মাহাত্ম্য তাহার
শ্রদ্ধা বাড়িতে লাগিল। তাহার মনে সঙ্কল্প দৃঢ় হইতে লাগিল—
এক দিন সে ঐশ্বর্যের গর্ব পদাঘাতে চূর্ণ করিবে, তাহার সমগ্র
শক্তি অর্থার্জনে প্রযুক্ত করিয়া সে দেখাইবে, সে অর্থ ধূলির মত
পরিহার করিতে পারে। কিন্তু হায়!—জীবনের সব সুখ ত স্বপ্নের
মত বিলীন হইয়া গেল। কেবল অর্থার্জনে কি জীবন ব্যয়িত
হইবে? সঙ্গে সঙ্গে স্ত্রীরকে ব্যয়সাধ্য শিক্ষা দিবার সঙ্কল্পও সে
করিল—সে সঙ্কল্প যেন গোবীর ব্যবহারের প্রতিশোধ।

পর দিন আর একটি ঘটনা ঘটিল। সুশীল ভাগিনেয়ের যাত্রার
জন্ত আবশ্যক দ্রব্যাদি ক্রয় করিতে আরম্ভ করিল। বাজার
করিয়া ফিরিয়া সে হিসাবটা লিখিবার জন্ত আপনার বসিবার ঘরে
গেল। তাহার শয়নকক্ষ তাহার পার্শ্বেই। গোবী সেই ঘরে
ছিল, এবং সুশীলের আগমন লক্ষ্যও করিয়াছিল—তুই ঘরের
মধ্যবর্তী দ্বার মুক্ত ছিল। অলক্ষ্যে গবেই সুশীল ঘনিতে পাইল,
এক জন জীলোক গোবীকে বলিল, “কি গো, ছোট বৌদিদি, একা
ঘরে বসিয়া আছ?”

গৌরী বলিল, “এই যে তাঁতিনী! কাপড় আনিয়াছিলে?”

“না, বৌদিদি; আজ টাকা দিবার কথা ছিল, তাই আসিয়া-
ছিলাম।”

“কত টাকা?”

“এই—তত্ত্বতাবাসের কাপড়ের দ্রুণ, প্রায় এক শত টাকা
পাওনা ছিল, মাসে মাসে শোধ হয়ে আর টাকা ত্রিশ আছে।”

“আজ কত টাকা পাইয়াছ?”

“আজ টাকা পাই নাই; নাতির বিলাত বাইবার খরচ, তাই
গিন্নী-মা বলিলেন, সামনের মাসে দিবেন।”

“ছিঃ—কথার ঠিক থাকে না।”

“ও কথা বলিও না, বৌদিদি, এ বাড়ীতে কথার নড়চড় হয়
না—তবে এবার—অমন সংসার করিতে গেলেই হয়।”

“যাহার কথার ঠিক থাকে না, তাহার জীবনে থাকে কি?
কথার ঠিক না থাকিলে কেবল ত আপনানাই ইতর জানান হয়
না, যে যেখানে আছে, সবাইকেই ইতর করা হয়।”

“সে কি কথা, বৌদিদি!”

তাহার পর গৌরী তাঁতিনীকে কাপড়ের পুঁটুলী খুলিতে
বলিল—কোনও প্রয়োজন না থাকিলেও প্রায় সব কয়খানা
কাপড়ই কিনিল, এবং “ধারে আমার বড় স্ত্রী” বলিয়া আলমারী
খুলিয়া টাকা বাহির করিয়া দাম চুকাইয়া দিল।

গৌরীর এই ব্যবহারের লক্ষ্য কে, স্ত্রীলের তাহা বুঝিতে
বিলম্ব হইল না—বাতনায় যেন তাহার বুক কাটিয়া বাইতে লাগিল;

নিশ্বাস রুদ্ধ হইয়া আসিতে লাগিল। সব আশা শেষ হইয়া গিয়াছে, এখন তাহাকে নিরাশার বিস্ফোটক লইয়া জীবনে কেবল যাতনা ভোগ করিতে হইবে, ইহাই তাহার নিয়তি। কিন্তু সে কেমন করিয়া গোরীর সান্নিধ্যে থাকিবে? যে সান্নিধ্য উভয়ের পক্ষে অনন্ত সুখের কারণ হইবার আশা সে করিয়াছিল, তাহা এখন অনন্ত দুঃখের কারণে পরিণত হইয়াছে। গোরী যখন তাহাকে ঘৃণা করিতে আরম্ভ করিয়াছে, তখন সে তাহার গর্ভ লইয়াই সুখে থাকুক; সে নিষ্কল জীবনের বেদনা অনুভব করিবে না। কিন্তু সুশীল? সে কি লইয়া থাকিবে? অর্থ, যশ—এ সব কিসের জন্ত? যখন এ সকলে প্রেমাস্পদের সুখবিধান হয়, তখনই এ সব সুখের, নহিলে এ সব কেবল সময় কাটাইবার উপাদান, ব্যর্থ জীবনের বেদনা কার্যের প্রলেপে আবৃত করিয়া গোপন করিবার প্রয়াস। এই গৃহ, পিতার স্মৃতিপুত, মাতার স্নেহসিদ্ধ, স্বজনের ভালবাসায় সমুজ্জল, এই গৃহে বাসও তাহার পক্ষে কেবল কষ্টের কারণ হইয়াছে। তবে সে কি করিবে?

সুশীলের মনে পড়িল, কয় দিন পূর্বে সে তাহার এক সতীর্থের পত্র পাইয়াছে। গিরিজা ওকালতী পরীক্ষায় উত্তীর্ণ হইয়া উত্তর-পশ্চিম প্রদেশে গিয়াছে। বঙ্গদেশে উকীলের আধিক্য বিশেষ সুযোগ বা অসাধারণ প্রতিভা ব্যতীত নূতন লোকের পক্ষে অল্প দিনে সাফল্যলাভের সম্ভাবনা অতি অল্প। গিরিজার আর্থিক অবস্থা তাহার পক্ষে দীর্ঘকাল অপেক্ষা করিবার অন্তরায় বলিয়া সে 'বিদেশে' গিয়াছে। সে সুশীলকে লিখিয়াছে,

সে অল্প দিনের মধ্যেই পশার করিয়াছে। সে আরও লিখিয়াছে, তথায় সুশীলের মত প্রতিভাশালী ব্যক্তির পক্ষে সাফল্য স্থলভ। সুশীল ভাবিল, সে 'বিদেশে' যাইলেই ত সব গোল চুকিয়া যায়। সে তাহাই করিবে।

হিসাব লেখা রাখিয়া সে সুধীরকে ডাকিল, এবং বলিল, সাত দিন পরে যে জাহাজ যাইবে, সে সেই জাহাজে যাইতে পারিবে ত ? বিলাতে যাইবার যৌক সুধীরের পক্ষে নেশার মত হইয়া উঠিয়াছিল। সে বলিল, “নিশ্চয় পারিব।” তখন সুশীল যাইয়া মাতাকে সে কথা বলিল। মা বলিলেন, “তোরা, বাবা, যখন যেটার যৌক হয় ! এত তাড়াতাড়ি কেন ?” সুশীল বলিল, গিরিজার পত্র পাইয়া সে স্থির করিয়াছে, সে গিরিজার কর্মস্থানে যাইবে, তাই সুধীরকে পাঠাইয়া যাইতে চাহে। মা আপত্তি করিয়া বলিলেন, “তাহাতে কাজ নাই, আমি তোকে ‘বিদেশে’ যাইতে দিব না। সুখে হউক দুঃখে হউক, সব এক জায়গায় থাকিব।” সুশীল বলিল, “দেখ, মা, এখন টাকার দরকার বাড়িতে চলিল—আর ‘বিদেশ’ ত এক দিনের পথ।” দিদি বলিলেন, “তা কিছুতেই হইবে না।” কিন্তু সুশীলের মত বুদ্ধিমান ব্যক্তির পক্ষে স্নেহযুক্তিসম্বল ছই জন নারীকে যুক্তিতর্কে পরাভূত করা সহজসাধ্য। যদিও আপনার প্রতিভার তাহার যে প্রত্যয় ছিল, তাহাতে সে বিশেষ জানিত, সে কখনই ষ্টীমারের পশ্চাতে বদ্ধ ‘গাধা-বোটের’ মত পরের শক্তিতে চালিত হইয়া সাফল্যের গঞ্জে ভিড়িবে না, তথাপি সে বলিল, “মা, যখন

ওকালতী করিব স্থির করিয়াছিলাম, তখন ভরসা ছিল, জামাই বাবুর সাহায্য। দিন কাল বেরূপ, তাহাতে তেমন সাহায্য না হইলে, এখানে পশার করা ছুড়র। কিন্তু অল্প স্থানে এখনও সে সুবিধা আছে। তাই অনেক ভাবিয়া আমি বাইবার সঙ্কল্প করিয়াছি।” সুশীলের দাদাও তাহার যুক্তির সমর্থন করিলেন। তখন আর কোনও বাধা রহিল না। কেবল দিদির নয়নে অশ্রু শুকাইল না—তিনি কেবলই বলিতে লাগিলেন, “হার, এমন পোড়া কপাল লইয়াই জন্মিয়াছিলাম! তাই আমার—আমারই জন্ত সর্বস্বত্যাগী, বনবাসী হইতেছে।”

মা এক দিন সুশীলকে জিজ্ঞাসা করিলেন, “তোর বাইবার কথা তোর শাওড়ীকে বলিয়াছিন্?” সে কথাটার খোলসা উত্তর না দিয়া সে বলিল, “আমার যত ভয় ছিল তোমাকে। যখন তোমার মত হইয়াছে, তখন আর কাহারও মতের জন্ত ভাবনা নাই।” তাহার পর মা প্রস্তাব করিলেন, সুশীল গৌরীকে লইয়া যাইবে—“না হয়, আমি দিন কতক থাকিয়া সংসার পাতাইয়া দিয়া আসিব। তোর দিদি থাকিতে এখানে কোনও অসুবিধা হইবে না।” সুশীল বলিল, “মা, যে সাঁতার শিখিতে বাইতেছে, তাহার কোমরে ভারী জিনিস বাঁধিয়া দেওয়াটা সুবুদ্ধির কাজ নহে। সুবিধা হইবে আশা করিয়া বাইতেছি, যদি না হয়, ফিরিয়া আসিতে হইবে। এ সময় কি ব্যয়সাধ্য ব্যবস্থা করা চলে?” মা নিরুত্তর হইলেন; কিন্তু সে যে একা ‘বিদেশে’ বাইতেছে, সেটা কিছুতেই তাহার ভাল লাগিতেছিল না। বিশেষ, তাহার

এক বাগরাটা তিনি কিছুতেই ভাল মনে করিতে পারিতে-
ছিলেন না।

সুশীলের বাইবার কথা বাড়ীর মধ্যে কেবল গৌরীই জানিতে
পারে নাই। তাহার ঝি যখন তাহাকে জিজ্ঞাসা করিল,
“ছোটবাবু নাকি ‘বিদেশে’ যাইতেছেন?” তখন সে বিস্মিত
হইয়া বলিল, “কই—আমি ত কিছু জানি না!” ঝি বলিল,
“তুমি আবার জান না! বিদেশে যাওয়া কেন?”

সুশীলের বিদেশে বাইবার প্রস্তাব এমনই অপ্রত্যাশিত যে,
তাহা অসম্ভব মনে করিয়া গৌরী তাহা বিশ্বাস করিতে পারিল
না। সেরূপ ব্যবস্থা তাহার কল্পনারও অতীত, এবং ধারণারও
সীমার বাহিরে।

কিন্তু অসম্ভবই সম্ভব হইল। সাত দিন পরেই এক দিন
মধ্যাহ্নে সুধীরকে জাহাজে তুলিয়া দিয়া আসিয়া সন্ধ্যার পর
সুশীল তাহার মনোনীত কর্মস্থলে যাত্রা করিল।

৬

বিধাত্রী দেবী গঙ্গান্নানের পরই ফিরিয়া আসিয়াছিলেন—সে
দিন আর দেবদর্শনে যান নাই। সে দিন তাঁহার পক্ষে বড়
বেদনার—তাঁহার পুত্রের মৃত্যু। তাঁহার আশ্রিতারা গঙ্গান্নানের
পর শতাধিক ‘শিবে’র ‘মন্তকে’ গঙ্গাজল দিয়া মধ্যাহ্নের কিছু পূর্বে
যখন ফিরিয়া আসিল, তখন তিনি আপনার কক্ষে বসিয়া আছেন—

দুই চক্ষু ছাপাইয়া অশ্রু বরিতেছে। সম্মুখে যে পত্র পড়িয়াছিল, তাহার সঙ্গে যে তাঁহার অশ্রুপাতের কোনও সম্বন্ধ ছিল, বা থাকিতে পারে, আশ্রিতারা তাহা অনুমান করিতে পারিল না। কিন্তু সেই পত্র আজ তাঁহার পক্ষে পুত্রশোকের স্মৃতির অপেক্ষাও কষ্টকর হইয়াছিল। তিনি বারাণসীবাসে আসিবার সময় বলিয়া আসিয়াছিলেন, তিনি যেন প্রতি দিন দুইখানি পত্র পান। একখানি বৈষয়িক ব্যাপারের—দেওয়ানের সেরেস্তা হইতে সে পত্র লিখিত হইত; আর একখানি সাংসারিক—তাঁহার রমা-গৌরীর কথার—সে পত্র হয় রমাকে, নহে ত রমার মাকে লিখিতে হইত। পুত্রবধু প্রায়ই রমার উপর সে পত্র লিখিবার ভার দিয়া দায় এড়াইতেন। আজ যে পত্র বিধাত্রী দেবীকে বিচলিত করিয়াছিল, সেখানি পুত্রবধুর লেখা। স্মৃশীল মাসহারা লইবে না, বলিয়া যাইবার পর তিনি বুঝিয়াছিলেন—এ সংবাদ বিধাত্রী দেবীর কাছে গোপন করা সম্ভব হইবে না, সুতরাং, তাঁহাকে জানানই ভাল। সেই জন্ত তিনি শাণ্ডীকে সে সংবাদ দিয়া-ছিলেন, এবং পত্রে প্রতিপন্ন করিবার প্রয়াস পাইয়াছিলেন, তিনি গৌরীর ও স্মৃশীলের মঙ্গলোদ্দেশ্যে যে উপদেশ দিয়াছিলেন, স্মৃশীল তাহা অগ্রাহ্য করিয়া তাঁহাকে অপমানিত করিয়াছে—দোষ স্মৃশীলের। দোষ গুণ বিচার করিয়া অপরাধ কাহার, তাহা বিচার করিবার প্রবৃত্তি বিধাত্রী দেবীর ছিল না—পত্র পাঠ করিয়া তিনি কেবল মনে করিতেছিলেন, এ ব্যাপার—এ দুর্ঘটনা ঘটাই অন্তর্চিত। তাহা ঘটিতে দেওয়াট অসঙ্গত ভটবাহে। কিন্তু যখন

তাহা ঘটয়াছে, তখন যেমন করিয়াই হউক, তাহার প্রতীকার করিতে হইবে। মান-অপমানের কথা তাঁহার মনে স্থান পায় নাই। তাঁহার মনে কেবল আশঙ্কা জাগিতেছিল—পাছে এই ব্যাপারে কোনরূপে গোৱীর স্মৃতির পথ কণ্টকাকীর্ণ হয়। গোৱীর স্মৃতির অপেক্ষা কি মান-অপমানের বিবেচনা বড়? সেই আশঙ্কায় তিনি বিচলিত ও ব্যথিত হইয়াছিলেন।

সাধারণতঃ সরকার তাঁহার নির্দেশানুসারে পত্র লিখিত—তিনি সহি করিতেন। আজ কিন্তু সে নিয়মের ব্যতিক্রম হইল। তিনি স্বয়ং তিনখানি পত্র লিখিলেন—পুত্রবধূকে, গোৱীকে, স্মৃশীলকে। পুত্রবধূকে তিনি লিখিলেন—

“মা, এ কি করিলে? বড় আশা করিয়াছিলাম, যে কয় দিন বাঁচিব, বিশ্বেশ্বরের ও অন্তর্পূর্ণার চরণে রমা-গোৱীর মঙ্গল প্রার্থনা করিব—কাশীবাসে আসিয়া আর ফিরিব না। আজ আমাকে কাশীছাড়া করিলে! তুমি রাগ করিয়াছ—স্মৃশীল তোমার কথা শুনে নাই। আমাদের কি রাগ সাজে? তুমি আমি কি স্মৃশীলের উপর রাগ করিয়া থাকিতে পারি? আমরা যে গোৱীকে তাহার হাতে দিয়াছি। রমার উপর, গোৱীর উপর যেমন, স্মৃশীলের উপরও যে, মা, তেমনই রাগ করা আমাদের পক্ষে অসম্ভব! তুমি রাগ করিলে কেন? এ ভুল কেন করিলে? সবই আমার অদৃষ্টের দোষ।

“তুমি মনে করিয়াছ, এ অবস্থায় স্মৃশীলের পক্ষে ভাগিনেরকে বিলাতে পাঠান বুদ্ধির কাজ হইবে না। তুমি, বোধ হয়, তাহাকে

সে কথা বুঝাইয়া বলিয়াছ। যদি তাহাতেও সে না বুঝিয়া থাকে, তবে তুমি তোমার মেহগুণে তাহার জিন একটা খেয়াল বলিয়া মনে কর নাই কেন? সে ত ভাল হইবে বলিয়াই ভাগিনেরকে পাঠাইতে চাহিয়াছে—তাহা ত দোষের নহে। আর যখন সে কথা শুনিলা না, তখন তুমিই কেন তাহার ভাগিনেরের বিলাতের খরচ দিতে চাহিলে না? মাসে দুই শত টাকা—তাহাতে আমার রমা গরীব হইয়া যাইত না। গৌরী যদি মেয়ে না হইয়া ছেলে হইত, তবে সে 'ত রমার সঙ্গে সমান ভাগে সম্পত্তি পাইত। আমরা সে হিসাবে তাহাকে কি দিয়াছি? রমা যদি একটা জিনিসের জন্ত খেয়াল করে, তবে সে জন্ত যেমন, শুলীলের এই খেয়ালের জন্তও তেমনই ভাবিলে, কোনও গোলই হইত না।

“আমি যখন ছেলে দেখিয়াই গৌরীর বিবাহ দিয়াছিলাম, টাকাশাল দেখিয়া দিই নাই—তখন সে ব্যবস্থা তোমার মনের মত হয় নাই। আমি তখনই তাহা বুঝিতে পারিয়াছিলাম। তুমি যখনই টাকার কথা ইঙ্গিত করিয়াছিলে, আমি তখনই সে কথা চাপা দিয়াছিলাম। কেন তাহা করিয়াছিলাম, তাহা এত দিন তোমাকে বলি নাই। গৌরীপুর জমীদারীর আর আমার খণ্ডর বরাবরই স্বতন্ত্র রাখিতেন; বৎসরান্তে পুণ্যাহুর পূর্বে দিন হিসাব নিকাশ করিয়া আমাকে ডাকিয়া বলিতেন—“মা লক্ষ্মী, তোমার বাপের বাড়ীর আয়ে যে টাকা মজুদ, তাহা শুন।” তাহার পর তোমার খণ্ডরও কোনও দিন সে টাকা সাধারণ তহবিলে মিশান

নাই—সে টাকায় নূতন সম্পত্তি কিনিলে তাঁহার নামে কিনিবার জন্তই আমি জিদ করিব বলিয়া সে টাকায় কখনও সম্পত্তি কেনেন নাই। ভাল ভাল সম্পত্তি কিনিবার সুযোগ তিনি ত্যাগ করিয়াছেন—আমি রাগ করিয়াছি, কিছুতেই শোনেন নাই। শেষে আমরা স্থির করিয়াছিলাম, সে টাকা বাড়ীতেই থাকুক—টাকা যাহার, সে-ই বড় হইয়া হিসাব দেখিবে। কিন্তু হয়, আমার পোড়া কপালে আমাকে রাখিয়া সে—আজিকার এই দিনেই—চলিয়া গিয়াছিল। সে টাকার হিসাব আমি কখনও দেখি নাই। কিন্তু আমার অনুমান, এত দিনে সে টাকা প্রায় সাত লক্ষে দাঁড়াইয়াছে। আমি স্থির করিয়া রাখিয়াছিলাম, সে টাকার অর্দ্ধেক গৌরীকে দিব। যখন ‘মানুষ’ দেখিয়া তাহার বিবাহ দিয়াছিলাম, তখন মনে করিয়াছিলাম, না হয়, সে টাকা সবই গৌরী লইবে।

“আজ মনে করিতেছি, হয় ত আমিই ভুল করিয়াছি, তখনই তোমাকে এ কথা বলিলে ভাল হইত। তাহা হইলে তোমার মনে কোনরূপে কোনও বিরুদ্ধ ভাব, অশ্রদ্ধার ভাব স্থান পাইত না। হয় ত সেই ভাব ক্রমে সঞ্চিত হইয়া এই ঘটনা ঘটাইয়াছে ; নহিলে তুমি যা হইয়া ছেলের ব্যবহারে অপমান দেখিলে কেমন করিয়া ? কিন্তু আমি অনেক ভাবিয়া তখন সে কথা কাহাকেও বলি নাই। আমি বৌতুকের লোভ দেখাইয়া ধনীৰ ঘরে গৌরীর বিবাহ দিতে অসম্মত ছিলাম। বৌতুকের লোভে যাহারা আমার ঘরে কাজ করিবে, তাহাদের ঘরে কাজ করা আমি অপমান

পত্রগুলি পাঠাইয়া বিধাত্রী দেবী দীর্ঘশ্বাস ত্যাগ করিলেন।

সেই দিনই তিনি বলিলেন, “রমা গোরীকে দেখিতে মন বড় ব্যস্ত হইয়াছে।”

তাঁহার আশ্রিতাদিগের মধ্যে এক জন তাঁহার কাছে বসিয়া থলির মধ্যে হরিনামের মালা জপ করিতেছিলেন। তিনি বলিলেন, “তাহা আর করিবে না? বলে—ঐ দুই গুঁড়াই ত তোমার সব—উহাদিগকে লইয়াই সব ভুলিয়া আছ।”

বিধাত্রী দেবী বলিলেন, “মনে করিয়াছিলাম, মায়া কাটাইব। কিন্তু পারি কই?”

“মায়া কি কাটান যায়, মায়াবদ্ধ জীব—মায়াই সব। তা লিখিয়া দাও না কেন, বোমা একবার তাহাদের লইয়া এখানে আসুন।”

“রমার পড়ার ক্ষতি হইবে। স্কুল বন্ধ না হইলে তাহাদের আসা হয় না—আবার সে সময় বাড়ী বাইতে হয়।”

আশ্রিতা কি বলিবেন স্থির করিতে না পারিয়া কেবল বলিলেন, “তাহাও বটে।”

তখন বিধাত্রী দেবী বলিলেন, “মনে করিতেছি, একবার মাইরা ঘুরিয়া আসি।”

আশ্রিতা সাগ্রহে বলিলেন, “সে ত ভালই।”

“কালীবাসী হইয়া ফিরিয়া বাইতে ইচ্ছা হয় না—ফিরিতেও নাই। কিন্তু মন প্রবোধ মানিতেছে না—একবার বাইরা দেখিয়া আসি। তোমরা সব থাক, আমি একাই বাইব—পাঁচ সাত দিন পরেই ফিরিয়া আসিব।”

অনেকেই ইচ্ছা হইল, এই সুযোগে বাড়ী দেখিয়া আসিবেন। কিন্তু তাঁহাদের মন্মথ ইচ্ছা মনেই মিলাইল—মুখে আর ফুটিল না ; কারণ, বিধাত্রী দেবীর এই কথার পর আর কেহ সে প্রস্তাব করিতে সাহস করিলেন না।

যাত্রার আয়োজন হইল।

বিধাত্রী দেবী শঙ্কাকুল মনে কানী হইতে যাত্রা করিলেন। কিন্তু কলিকাতায় আসিয়া যখন তিনি ষ্টেশনে রমাকে দেখিলেন, তখন আনন্দে তিনি মুহূর্তের জন্য সব হুঁতাবনা বিস্মৃত হইলেন। তিনি দেখিতে পাইলেন, রমা ট্রেন স্থির হইবার পূর্বেই ব্যস্ত হইয়া তাঁহার কামরার সন্ধান করিতেছে। কামরা দেখিতে পাইয়া সে ছুটিয়া তথায় আসিল, এবং পিতামহী-কর্তৃক মুক্ত দ্বারপাশে তাহাতে প্রবেশ করিল। তাহার মুখে ও চক্ষুতে হর্ষের দীপ্তি। সে প্রণাম করিবার পূর্বেই বিধাত্রী দেবী তাহাকে বক্ষে চাপিয়া ধরিলেন—যেন বুকের জ্বালা জুড়াইল।

ষ্টেশন হইতে বাহির হইয়া গাড়ীতে বসিয়া তিনি রমাকে কত কথা জিজ্ঞাসা করিতে লাগিলেন ; রমা কত কথা বলিতে লাগিল—কত দিন সে পিতামহীর কাছে তাহার কথা বলিতে পার নাই ; কখন যে পথ অতিক্রম করিয়া গাড়ী বাড়ীর দরজায় আসিয়া স্থির হইয়াছে, তাহা হই অনেক কেহই জানিতে পারেন নাই। সহস গাড়ীর দ্বার খুলিলে জানিতে পারিলেন।

বাড়ীর কর্ত্তারীয়া ও দাস দাসীরা দ্বারের কাছেই ছিল—সকলেই আসিয়া বিধাত্রী দেবীকে প্রণাম করিল। সকলের

কুশল জিজ্ঞাসা করিয়া তিনি অন্বরে অবশ্য করিলেন, এবং পুত্রবধূর প্রণাম গ্রহণ করিয়া তাঁহাকে আশীর্বাদ করিলেন।

তাহার পরই তিনি রমাকে বলিলেন, “রমাবাবু, তুমি বাইরা দিকিকে ও জামাই বাবুকে নিমন্ত্রণ করিয়া আইস—দিদিমণির জন্ত বারটার পরই এবং জামাই বাবুর জন্ত সন্ধ্যার সময় গাড়ী বাইবে।”

বধূ বলিলেন, “স্থলীল ত এখানে নাই।”

বিস্ময়বিস্ফারিতনেত্রের দৃষ্টি বধূর মুখে স্থাপিত করিয়া বিধাত্রী দেবী জিজ্ঞাসা করিলেন, “সে কি?”

“সে পশ্চিমে গিয়াছে।”

“কবে?”

“আজ দুই দিন হইল।”

“কেন?”

“ওনিলাম, ‘বিদেশে’ রোজগারের সুবিধা হইবে বলিয়া।”

“ওনিলে! তবে কি তুমি তাহাকে কোনও কথা জিজ্ঞাসা কর নাই?”

“সে ত আর আইসে নাই।”

“কিন্তু সে বাইবে ওনিয়াও কি তুমি গোয়ীর বাড়ী বাও নাই?”

বধূ নিরুত্তর রহিলেন।

বিধাত্রী দেবী হতাশভাবে বলিলেন, “মা, এমন কাজও করিয়াছ!”

তাহার পর বধূ বতই আপনার কার্যের সমর্থনের চেষ্টা করিতে লাগিলেন, বিধাত্রী দেবী ততই ভাবিতে লাগিলেন—উপায় কি?

বধূর কথার তিনি বুঝিলেন, তিনি যে ভয় করিয়াছিলেন, তাহাই হইরাছে—বধূ উদ্ধতভাবে টাকার খোঁটা দিয়াই সর্কনাশ করিয়াছেন। এখন উপায় ?

মধ্যাহ্নের পরই তিনি গৌরীর গৃহে গমন করিলেন, এবং স্নানিলের মাতার নিকট তাহার ‘বিদেশে’ বাইবার কারণ অবগত হইলেন। স্নানিলের দিদি তাঁহার কাছেও বলিলেন, “ঠাকুরমা, আমারই ভ্রাতৃ ভাই আমার এ কষ্ট সহ্য করিতে গেল। আমি কত বারণ করিলাম, কিন্তু শুনিল না।” বিধাজী দেবী তাঁহাকে সাধুনা দিয়া বলিলেন, “এই ত ভাইয়ের মত কাজ। এ কি আর ‘বিদেশ’—কত লোকই ত অমন স্থানান্তরে যায়। তবে আমার বিশ্বাস, সে এখানে থাকিলেও পশার করিত—তাহার ব্যস্ত হইয়া ‘বিদেশে’ বাইবার দরকার ছিল না।”

ফিরিবার সময় তিনি গৌরীকে সঙ্গে লইয়া আসিলেন।

স্নানিলের বাইবার কথা যে গৌরী পূর্বে জানিতে পারে নাই, তাহাতে তাঁহার মনে নানা আশঙ্কার সঞ্চার হইতে লাগিল। স্বামীর পক্ষে এমন একটা সঙ্কল্প জীবন কাছে গোপন করা তাঁহার একান্তই অন্বাভাবিক বোধ হইতে লাগিল। ‘ভালবাসার’ যে নিষিদ্ধতা স্নানের কারণ, তাহা স্বামী জীকে পরস্পরের সঙ্কল্প জানাইতেই প্ররোচিত করে—গোপন করিতে দেয় না। তবে স্নানিল তাহার সঙ্কল্প গৌরীকে জানিতে দেয় নাই কেন ? তিনি মনে করিলেন, হয় ত গৌরী আপত্তি করিবে, এই আশঙ্কার স্নানিল তাহাকে জানায় নাই—হয় ত গৌরী সাংসারিক ব্যাপারে অনভিজ্ঞ

বলিয়া সে জানায় নাই। কিন্তু কোনও অনুমানই মনের মত হইল না।

পর দিন তিনি কথায় কথায় গৌরীর কাছে বসত কথা জানিতে লাগিলেন, তাঁহার আশঙ্কা ততই বাড়িতে লাগিল। তিনি কর্তব্য স্থির করিতে পারিলেন না।

তাহার পর দিন তিনি স্নানলের পত্র পাইলেন। তাঁহার পত্রের উত্তরে স্নানীল তাঁহাকে যে পত্র লিখিয়াছিল, তাহাই কানী ঘুরিয়া আলিল। পত্র পাঠ করিয়া তিনি স্তম্ভিত হইলেন—

“আপনার বিষয়বুদ্ধির পরিচয় আমি পদে পদে পাইয়াছি, কিন্তু আপনি কেমন করিয়া এ ভুল করিলেন? যেখানে টাকায়াই আদর, সেখানে আপনি অর্থহীনকে বরণ করিয়া আনিলেন কেন? আপনি কি আপনার বধূর ও পৌত্রীর মনের ভাব জানিতে পারেন নাই? আমি ধনী নহি, কিন্তু ধনের অপ্রাচুর্য্য যে ইতরদের নামাস্তর—এমন কথা সহ করিতে প্রস্তুত নহি। দরিদ্র ইতর নহে। আর যে স্থানে সে মৃত গৃহীত হয়, সে স্থান ত্যাগ করাই কর্তব্যের কর্তব্য। খাতুপাত্রেয় ও মৃৎপাত্রেয় পরস্পরের সান্নিধ্য মৃৎপাত্রেয় পক্ষেই বিপদের কারণ। তাই আমি স্থান ত্যাগ করিলাম। আপনি টাকা দিয়া ভুল করিয়াছেন; আমি টাকা লইয়া ভুল করিয়াছি। সে ভুলের ফল ভোগ করিতেই হইবে। ভ্রমক্রমে বিষ পান করিলে কি কখনও বিষক্রিয়া রোধ করা যায়? টাকা আমি ফিরাইয়া দিতে পারি। কিন্তু তাহাতে ত শাস্তি পাইব না। সেই অর্থে যদি কোনও উপকার লাভ করিয়া থাকি, তবে

সে উপকার ত মুছিয়া ফেলিতে পারিব না ! আর সর্বোপরি আপনার স্নেহের ঋণ ত কখনও শোধ করিতে পারিব না ! ঘৃণাকে ঘৃণা দিয়া পরাভূত করা যায় ; কিন্তু স্নেহকে কেমন করিয়া পরাভূত করিব ? আপনার স্নেহের কাছে যদি কোনও অপরাধ করিয়া থাকি, দয়া করিয়া ক্ষমা করিবেন ।”

বিধাত্রী দেবী পুনঃ পুনঃ পত্রখানি পাঠ করিলেন । তাঁহার মনে হইল, পত্রে অভিমানের বেদনার অপেক্ষা অপমানের আলা তীব্রতরভাবে আত্মপ্রকাশ করিয়াছে । অভিমানকে স্নেহে পরাভূত করা যায় ; কিন্তু অপমান বৃদ্ধি তর্কে দূরীভূত করা হুঙ্কর । এ স্থলে কি করিলে ভাল হয় ? পত্রের মধ্যে ‘ইতর’ শব্দটা লইয়া নাড়াচাড়া দেখিয়া তাঁহার সন্দেহ হইল—সে শব্দটা বধু ব্যবহার করেন নাই ত ? আর পত্রের মধ্যে গৌরীর মতের প্রতিও ইঙ্গিত বিস্তর । সমস্ত ব্যাপারটা অত্যন্ত জটিল হইয়া উঠিয়াছে । তিনি যত সহজে এই ব্যাপারের নিষ্পত্তি করিবেন, আশা করিয়াছিলেন, তত সহজে তাহা হইবে না । সুশীল চলিয়া গিয়াছে ; যাইবার কথা গৌরীকেও বলে নাই ; সে পত্রে লিখিয়াছে, গৌরীও তাহার মাতার মত পোষণ করে, এবং দারিদ্র্য ইতরতার নামান্তর, এ কথা সহ্য করিতে অসম্মত বলিয়াই সুশীল গৃহত্যাগ করিয়াছে । যে যৌবনে দ্বীপুরুষ পরম্পরকে নিকটে পাইতেই বাস্তব হয়, সেই যৌবনে সে স্থানত্যাগ করিয়াছে—গৌরী কি তবে তাহার মাতার পক্ষ সমর্থন করিয়াছে ?

তিনি বধুকে জিজ্ঞাসা করিলেন, সুশীলের সঙ্গে কথায় তিনি

কি কোনওরূপে ইতর শব্দের প্রয়োগ করিয়াছিলেন? বধু বলিলেন, “না।”—কেন না, সে শব্দ-প্রয়োগের কোনও অবসরই হয় নাই। তাঁহার কথা শুনিয়া বিধাত্রী দেবীরও তাহাই বোধ হইল।

তখন তিনি গোরীকে জিজ্ঞাসা করিলেন। গোরী বলিল, সে তেমন কোনও কথাই বলে নাই। কিন্তু তাহার সহিত এ সম্বন্ধে সুশীলের যে কথোপকথন হইয়াছিল তাহা জানিয়াই বিধাত্রী দেবী শঙ্কিতা হইলেন। কেন সে ও সব কথা বলিতে গিয়াছিল? তিনি বুঝিলেন, মাতার মতে দুহিতার মত অনুরঞ্জিত হইয়াছে—সত্য সত্যই সে ধনের গর্বে মত্ত হইয়াছে। আর সুশীল তাহার মতের স্বরূপ উপলব্ধি করিয়াছে। বিধাত্রী দেবী দুশ্চিন্তায় পীড়িত হইলেন।

তাহার পর গোরী যখন মনে করিয়া বলিল, তাঁতিনীর সঙ্গে কথায় সে ইতর শব্দের ব্যবহার করিয়াছিল, এবং সুশীল বোধ হয় তাহা শুনিতেও পাইয়াছিল, তখন তিনি গোরীর মুখে কাতর দৃষ্টি স্থাপিত করিয়া বলিলেন—“দিদিমণি, এমন সর্বনাশও করিয়াছ!” তাঁহার মনে হইল, গোরী মঙ্গল-ঘটে পদাঘাত করিয়াছে—অমঙ্গল ঘটবেই।

কিন্তু তিনি যখন দেখিলেন, তাঁহার কথায় গোরীর নয়নে ভীতিভাব ছুটিয়া উঠিল, এবং অকালজলদোদয় যেমন রবিকর আবৃত করে, অশ্রুর উজ্জ্বল তেমনই সে ভাব আবৃত করিল, তখন তিনিই আবার তাহাকে প্রবোধ দিলেন—পুরুষের ভালবাসা

সাগরের মত ; অভিমানের বাতাসে তাহাতে চাকল্যের তরঙ্গ উঠে—সমুদ্র অস্থির বোধ হয় ; কিন্তু তাহার গভীর প্রদেশে সে চাকল্য প্রবেশ করিতে পারে না—তথায় সব স্থির । সে ভালবাসা কখনও বিচলিত হয় না । সত্য বটে, স্নানীল রাগ করিয়াছে ; কিন্তু সে রাগ কখনও স্থায়ী হইবে না—কেন না, তাহাতে ভালবাসা ক্ষুণ্ণ হইবে না ।

* বিধাত্রী দেবী গোরীকে বুঝাইবার চেষ্টা করিলেন বটে, কিন্তু আপনি আপনাকে বুঝাইতে পারিলেন না । তিনি গোরীর কথা ভাবিয়া একান্ত কেননা অনুভব করিতে লাগিলেন । তবে তিনি বুঝিলেন, দিন কতক না বাইলে এ ব্যাপারের কোনও রূপ প্রতীকার সম্ভব হইবে না । তাই তিনি আবার কাশীযাত্রার আয়োজন করিলেন ।

বাইবার পূর্বে তিনি গোরীকে অনেক বুঝাইয়া গেলেন—যাহাতে তাহার মনে স্নানীলের প্রতি কোনও বিরুদ্ধভাব স্থান না পায়, সেই জন্ত বিশেষ করিয়া বলিয়া গেলেন, স্নানীল যাহা করিয়াছে, তাহা তাহার উপযুক্তই হইয়াছে । দৃঢ়তাই পুরুষের গুণ । ভাবিবে, কিন্তু মচকাইবে না, ইহাই পুরুষের স্বভাব । যে পুরুষ নত হয়, সে দুর্বল । পুরুষ দৃঢ় ও সবল হইলে তবে সে বহু জনের আশ্রয় ও পত্নীর অবলম্বন হয় । ভালবাসার কোমলতা দিয়া পুরুষের দৃঢ়তা জয় করিতে হয়—কঠোরতার সে দৃঢ়তা জয় করা যায় না । স্নানীল যে বিধবা ভগিনীর জন্ত স্বয়ং কষ্ট সহ্য করিয়াছে, সে তাহার মহত্বেরই পরিচায়ক । কম জন ভেমন

ত্যাগ স্বীকার করিতে পারে ? তাহার সেই ত্যাগের জন্য গোঁরী গর্কানুভব করিবে।

তিনি গোঁরীকে বলিয়া গেলেন; “দিদিমণি, সুশীল বাড়ী আসিলে আপনার দোষ স্বীকার করিও—বানীর কাছে আর দেবতার কাছে দোষ স্বীকার করিতে লজ্জা নাই ; তাহাতে ক্ষমার সঙ্গে আদর লাভ করা যায়। আর সুশীলের বাড়ী আসিবার সংবাদ জানিতে পারিলেই আমাকে জানাইও। আমি আবার আসিব। ঐ দিন এই ভুল সংশোধিত না হইবে, তত দিন আমি শাস্তি লাভ করিতে পারিব না।”

নূতন করিয়া বিদায়ের কাল আসিল। বিধাত্রী দেবী বেদনা-ভারাক্রান্ত-হৃদয়ে আবার কাশী যাত্রা করিলেন। তাঁহার কেবল মনে হইতে লাগিল, যদি বুকের রক্ত দিয়াও গোঁরীর এই ভুলের চিহ্ন মুছিয়া দিতে পারিতেন ! তাঁহার চক্ষু কাটিয়া অশ্রু বরিতে লাগিল—কিন্তু সেই অশ্রুও তাঁহার হৃদয়ে দৃষ্টিভ্রমের আলা প্রথমিত করিতে পারিল না।

নৌকা চলিতে চলিতে ‘মাঝ দরিয়া’র যদি তুকান উঠে, তবে কোনরূপে নৌকা বন্দরে ভিড়ানই মাঝির লক্ষ্য হয়—তাহার পর, নৌকা ভিড়াইয়া, সে নৌকার অবস্থা লক্ষ্য করে, ভবিষ্যতের কর্তব্য স্থির করে। যখন গৌরীর কথার শান্তুড়ীর কথা প্রতিধ্বনিতে আরও স্পষ্ট ও গভীর হইয়াছিল, তখন কোনরূপে দূরে যাওয়াই সুশীল কর্তব্য মনে করিয়াছিল। নূতন কর্মস্থলে আসিয়া সে ভবিষ্যতের ভাবনা ভাবিবার সময় পাইল—আপনার জীবনের অবস্থা লক্ষ্য করিবার অবসর পাইল। আপনার অবস্থা লক্ষ্য করিয়া সে যে ব্যথিত হইল, তাহা বলাই বাহুল্য। সে সুখের সংসারে জন্ম-গ্রহণ করিয়াছিল, মেহের অমৃতে বর্দ্ধিত হইয়াছিল—জীবনে সুখের ও সাফল্যের স্বপ্নই দেখিয়াছিল। সে কখনও কল্পনাও করিতে পারে নাই যে, এমন ভাবে তাহাকে সে সংসার ত্যাগ করিয়া আসিতে হইবে, সে জীবন তাহার পক্ষে অসম্ভব হইবে। কিন্তু তাহাই হইয়াছে। সহসা তাহার সব আশা অসার স্বপ্নে পরিণত হইয়াছে ; তাহার পক্ষে সংসারের খেলাঘর ঘটনার তরঙ্গে ভাসিয়া গিয়াছে। ভালবাসা, সুখ, শান্তি—এ সব হইতে বঞ্চিত হইয়া তাহাকে বার্থ জীবন যাপন করিতে হইবে। তবে কি জন্ত জীবন-যাপন ? সুশীল আপনাকে বুঝাইল, যখন সুখ শান্তি মিলিল না, তখন আর এক দিকে আপনার সকল শক্তি প্রযুক্ত করাই ভাল—সে সম্মান ও অর্থ অর্জন করিবে। তাহাতে সুখ না থাকিতে

পারে, কিন্তু জীবনের একটা উদ্দেশ্য স্থির হইবে। আর সঙ্গে সঙ্গে সে দেখাইতে পারিবে, সে অর্থ অর্জন করিবার ক্ষমতা ধারণ করে—সে হয় নহে, সে সংসারে সম্মান পাইতে পারে। তাহার প্রতিভার তাহার বিশ্বাস ছিল—সে প্রতিভার অসম্মান সে কখনই সহ্য করিবে না।

কাজেই সুশীল একনিষ্ঠ হইয়া ব্যবসারে মন দিল। ভাগ্যদেবী এক দিকে তাহাকে তাহার প্রাপ্য হইতে বঞ্চিত করিয়া বোধ হয় দুঃখিত হইয়াছিলেন, তাই আর এক দিকে প্রসন্নচিত্তে তাহাকে প্রসাদ দিয়া ক্ষতিপূরণের চেষ্টা করিলেন। এক দিকের ক্ষতি আর এক দিকের লাভে পূর্ণ হয় না। কিন্তু লাভের হিসাবে সুশীলের লাভ যেমন অতিক্রান্ত তেমনই অপ্রত্যাশিত হইল। তিন মাস না যাইতেই সে মাকে লিখিল, বিদ্বির বাড়ী ভাড়া টাকা হইতে সুধীরকে কিছু পাঠাইতে হইবে না—সেই মাসে মাসে সুধীরের খরচ পাঠাইয়া দিবে। তাহার পর সে অনেক ভাবিল; কিন্তু প্রতিহিংসা-প্রবৃত্তি প্রহত করিতে পারিল না। মাসে মাসে গোরীর জন্ত এক শত করিয়া টাকা পাঠাইতে লাগিল। মা ভাবিলেন, শওরবাড়ীর মাসহারার টাকা লইতে তাহার আপত্তি ছিল—সে কেবল দিদিশাওড়ীর অসুযোগ এড়াইতে না পারিয়া তাহা লইতে সম্মত হইয়াছিল, এখন উপার্জনক্ষম হইয়াই সে টাকা যেমন পাইতেছে, তেমনই গোরীর জন্ত পাঠাইয়া দিতেছে। কিন্তু পুত্রের এই ব্যবহার মূলে যে দারুণ মর্মান্বীড়া ছিল, তিনি তাহার বিন্দুমাত্র অনুমান করিতে পারিলেন না।

গৌরীর পত্রে বিধাত্রী দেবী গৌরীর মাসহারার সংবাদ পাইয়া দীর্ঘকাল ভাগ করিলেন—হায়, কবে স্মৃশীলের অভিমান-কৃত দূর হইবে? তিনি স্মৃশীলকে পত্র লিখিতেন। নিপুণ চিকিৎসক যেমন রোগীর নাড়ীর গতি দেখিয়া তাহার অবস্থা বুঝিতে পারে, তিনি তেমনই তাহার পত্রে তাহার মনের ভাব বুঝিতে পারিতেন—বুঝিয়া কেবল চিন্তিত হইতেন। স্মৃশীল যে দৃঢ়তাসহকারে আপনার আঘাত-বেদনাকে বক্ষে চাপিয়া ধরিয়াছিল, তাহাতে সহজে তাহা দূর হইবে না—বিধাত্রী দেবী তাহাই বুঝিয়াছিলেন। এবার তিনি গৌরীর মাসহারার কথা উল্লেখ করিয়া স্মৃশীলকে লিখিলেন,—“তুমি কেন যে গৌরীকে মাসে এক শত টাকা করিয়া পাঠাইতেছ, তাহা আমি বুঝিয়াছি। কিন্তু আমার অনুরোধ, টাকার কথা তুমি আর মনে করিও না। তোমার পক্ষে অর্ধার্জন অবহেলার হইতে পারে, তাহা আমি জানি। সে বিশ্বাস না থাকিলে আমি তোমার হাতে গৌরীকে দিতাম না। আমি আশীর্বাদ করি, তুমি চিরজীবী হও—চিরজীবী হও—তোমার সকল কামনা পূর্ণ হউক। আমার একটা কথা রাখ—গৌরী যদি অপরাধ করিয়া থাকে, বালিকার সে অপরাধ তুমি নিজ গুণে ক্ষমা কর। ইহকালে পরকালে বাহার তুমিই গতি ও আশ্রয়, তাহার অপরাধ তুমি ছাড়া আর কে ক্ষমা করিবে? সাগরের উদার বক্ষই নদীর শেষ গতি। সেই নদীর জল যদি কখনও মলিন হয়, তবে সাগর কি তাহাকে আশ্রয় দিতে কাতর হয়? সাগরের বিশাল বক্ষে মিশিলে সে জলের আর আবিলভা

থাকে না। গৌরীর অপরাধে আমিও অপরাধী। সে পিতৃহীনা—পিতার কাছে সুশিক্ষার অবসর পায় নাই। তাহাকে শিক্ষা দিবার ভার আমাকেই লইতে হইয়াছিল। সে আমার অদৃষ্টের দোষ। আমি তাহাকে সুশিক্ষা দিতে পারি নাই; তাই সে অপরাধী হইয়াছে। আমার অনুরোধ, তাহাকে ক্ষমা কর। ক্ষমা বিচার-বিবেচনার অপেক্ষা রাখে না—তুমি তাহা হইতে গৌরীকে বঞ্চিত করিও না। আর ভাবিয়া দেখ, এ শাস্তি কি কেবল তাহারই? আমাদের কথা বলিতেছি না। তোমার নিজের কথা ভাবিয়া দেখ। এই বয়সে বিদেশে—একা থাকা কি তোমার পক্ষেই সুখের? তোমার মার মনে ব্যথা দিয়া—তোমার দিদির মনে ব্যথা দিয়া, তুমি নিজের বুকে নিজে এ শক্তিশেলের ব্যথা ভোগ করিতেছ কেন? এ টাকা তুমি বাড়ীতে থাকিয়া উপার্জন করিতে পারিবে, সে ক্ষণ তোমাকে বিদেশে বাইতে হইবে না, সে ক্ষণ তুমি বিদেশে যাও নাই। আর টাকাতেই কি সুখ? স্নেহ, প্রেম, ভালবাসার বন্ধন যদি একবার শিথিল হয়, তবে সে বন্ধন আবার দৃঢ় করা বড় কঠিন কাজ। তোমাকে বুঝাইতে পারি, এমন বিজ্ঞা বা বুদ্ধি—জ্ঞীলোক আমি—আমার নাই। তুমিই বুঝিয়া দেখ। আর বুঝিয়া দেখিতে চাহ বা না চাহ, আমার এই একটা অনুরোধ রাখ।”

পত্র পাঠ করিয়া সুশীল বিচলিত হইল। তাহার যৌবনের অনাবিল ভালবাসা—বুকভরা প্রগাঢ় প্রেম—সে ত তাহাকে ক্ষমা করিতেই প্ররোচিত করিতেছিল। কেবল অভিমান-

সজ্জাত, শুদ্ধ, কঠোর যুক্তি ভালবাসাকে দৌর্য্যবলি বুলিয়া উপহাস করিতেছিল, আর সে সেই উপহাসেরই ভয় করিতেছিল। ভালবাসা যখন অভিমানের ফলে জীবনে মরুভূমি দেখাইয়া তাহাকে ক্ষমার পথে আনিতে উদ্বৃত্ত হইল, তখন অভিমান যুক্তির আশ্রয় লইয়া বলিল—এ পত্র বিধাত্রী দেবীর, গৌরী ত অনুতাপের কোনও প্রমাণই দেয় নাই। এ অবস্থায় ক্ষমা কেবল আপনার অপমানের ক্ষত আপনি গোপন করিয়া আঘাতকারীর কাছে হীনতা-স্বীকার। গৌরী হাসিবে। স্ত্রীল যুক্তির কথাই শুনি—বুঝিল না, গৌরীর মনের ভাব জানিবার কোনও পথই সে রাখে নাই—রাখিলে সে ভাব জানিতে পারিত। সে যে গৌরীর মনের ভাব জানিবার কোনও উপায়ই করে নাই, তাহার যুক্তির ঘন বিভ্রাসের মধ্যে সেই ছিদ্রটি একবারও তাহার নয়ন-গোচর হইল না। বিধাত্রী দেবীর পক্ষে যে গৌরীর মনের ভাব প্রতিবিম্বিত হইতে পারে—সে যে পিতামহীর কাছে আপনার বেদনা ব্যক্ত করিয়া থাকিতে পারে, সে কথাও স্ত্রীলের মনে হইল না।

তাঁহার পত্রের উত্তর পাইয়া বিধাত্রী দেবী আশার কোনও অবকাশই পাইলেন না। তাঁহার আরও ভয় হইতেছিল, এ কথা গোপন থাকিবে না—গোপন থাকিবার নহে; যখন স্ত্রীলের মাতা এই ব্যাপার জানিতে পারিবেন, তখন শব্দরবাড়ী যে গৌরীর পক্ষে সুখদ হইবে না, তাহাতে ত আর সন্দেহ নাই। তাঁহার বড় আদরের নাতিনী—পিতৃহীনা গৌরী কি শেষে

অনাদরে কষ্ট পাইবে? স্বামীর ভালবাসা হারাইলে নারীর জীবন ব্যর্থ হয়, তাহার উপর অবহেলা! গৌরী কি সহ্য করিতে পারিবে?

বিধাত্রী দেবী বাহা ভয় করিয়াছিলেন, ক্রমে তাহাই হইল। স্নানীর মাতা প্রথমে স্নানীর গৃহত্যাগের প্রকৃত কারণ অনুমানও করিতে পারেন নাই বটে, কিন্তু সে কারণ তাঁহার কাছে শেষে আর গোপন রহিল না। স্নানীর ‘বিদেশে’ যাওয়া তিনি কিছুতেই ভাল মনে করিতে পারিতেছিলেন না। মেয়ের বিবাহের পর বিধবা হইয়া তিনি দুইটা ছেলেকে লইয়াই ব্যস্ত ছিলেন, তাহাদিগকেই সর্বস্বজ্ঞানে জড়াইয়া ছিলেন—কখনও তাহাদের দূরে যাইতে দেন নাই। এত দিন তিনি যেন কর্তব্যবাহী পালন করিতেছিলেন। তাহাদের বিবাহ দিয়া তিনি পরম সুখ ভোগ করিবেন, আশা করিয়াছিলেন—মনে করিয়াছিলেন, এইবার নূতন করিয়া সংসার সাজাইলেন। এই সময় কন্ডার বৈধব্য তাঁহার বক্ষে শোকের শেল বিদ্ধ করিল—সে বাথা ত যাইবার নহে। তাহার পর স্নানীল চলিয়া গেল—সংসারের এক দিক যেন শূন্য হইয়া গেল। স্নানীল চলিয়া গেলে তিনি গৌরীকে অধিক দিন পিজালয়ে থাকিতেও দিতেন না; বলিতেন, “আমার ছেলে কাছে নাই, আবার তুমিও না থাকিলে স্নানীলের ঘরের দিকে আমি চাহিতে পারিব না।” স্নানীল তাঁহার কাছে থাকিবে, ইহাই তাঁহার আশা ছিল। তাহা হইয়া না—সে একা ‘বিদেশে’ গেল; যদি গেল, তবে গৌরীকে সঙ্গে লইয়া গেল না

কেন ? এই বয়সে তাহার পক্ষে এমন কঠোর ভাবে অর্থার্জনের চেষ্টা করিবারই বা কি প্রয়োজন ছিল ? তিনি যখন গৌরীকে লইয়া তাহার সঙ্গে বাইতে চাহিয়াছিলেন, তখন সে বুঝাইয়াছিল, পশার হয় কি না দেখিয়া তাহা করা সম্ভব নহে। তিনিও তাহাই বুঝিয়াছিলেন। কিন্তু তিন মাস পরে যখন সে মাসে তিন শত টাকা করিয়া পাঠাইতে লাগিল, তখন তিনি কেবলই লিখিতে লাগিলেন, তিনি গৌরীকে লইয়া তাহার কাছে বাইবেন। সে প্রস্তাবে তাহার আপত্তির যে কোনও কারণ থাকিতে পারে, মা তাহা বুঝিলেন না।

ছয় মাস পরে যখন আদালত দীর্ঘ কালের জন্ত বন্ধ হইল, তখন স্মৃশীল বাড়ী না আসিয়া কান্দুরে বেড়াইতে গেল। মা বুঝিলেন, ইহার কোনও কারণ আছে। তিনি স্মৃশীলের মা— তিনি তাহাকে যেমন জানেন, তেমন ত আর কেহই জানে না। এমন কাজ যে তাহার প্রকৃতিবিরুদ্ধ। ছয় মাস ‘বিদেশে’ থাকিবার পর ছুটি পাইয়াও সে বাড়ী আসিল না ! পুত্রের কর্তব্য, ভ্রাতার কর্তব্য, পতির কর্তব্য—সে সব অবহেলা করিল !

তখন স্মৃশীলের মা আর তাহার দিদি পরামর্শ করিলেন। যখন আর সব দিক দেখিয়া কোথাও তাহার ভাবান্তরের কোনও কারণ খুঁজিয়া পাইলেন না, তখন উভয়ে গৌরীর দিক্টার দৃষ্টিপাত করিলেন। এই ছয় মাসের মধ্যে তাঁহারা ত একবারও স্মৃশীলের নিকট হইতে গৌরীর নামে কোনও পত্র আসিতে দেখেন নাই। মা বলিলেন, হয় ত স্মৃশীল গৌরীর বাপের বাড়ীর

তাহার এই ব্যবস্থার মার চক্ষুতে জল আসিল, যে ছেলে এমন করিয়া তাঁহার আগমন প্রতীক্ষা করিয়াছে, সে কোন্‌ হুঃখে বেশভ্যাগী হইয়াছে! এ রহস্য তিনি ভেদ করিবেনই।

সেদিনও শুশীলকে একবার আদালতে বাইতে হইল, একটা অকরী মোকদ্দমা ছিল। কিন্তু সে অরক্ষণের মধ্যেই ফিরিয়া আসিল। তাহার পর মা বলিলেন, “বাবা, হয় তুই আমার সঙ্গে ফিরিয়া চল—সুখে হউক, হুঃখে হউক, এক সঙ্গে থাকিব; নহে ত বল, আমি তোমার কাছে থাকি।”

শুশীল বলিল, “মা, জানই ত কত খরচ। শূধীর ফিরিয়া না আসা পর্য্যন্ত তুমি বাস্তব হইও না—তত দিন আমাকে খরচের দিকে বিশেষ লক্ষ্য রাখিতে হইবে।”

বড় হুঃখেও মার হাসি আসিল! তিনি বলিলেন, “বাবা, আমাকে কি ভুলাইবি? আমি যে তোকে পেটে পরি রাখি। এই সাজসজ্জা, এই বাসের ব্যবস্থা, এ সব কি খরচের দিকে লক্ষ্য রাখিবার প্রমাণ?”

“ও সব দোকানদারী; আজ কাল ভেক না হইলে ভিক মিলে না।”

“ভাল, তাহাই না হয় হইল। গত মাসেও যে আমাকে পাঁচ শত টাকা পাঠাইয়াছিলি—সে কি ভিকার জন্ত ভেক, না লোকদেখান?”

শুশীল দেখিল, প্রকৃত কথা আর অধিকক্ষণ গোপন করা চলিবে না। সে বলিল, “সে ঝগড়া ত তুমি বরাবরই করিতেছ,

সে পরে হইবে। এখন যখন এত দূর আসিয়াছ, তখন এ দিকের তীর্থগুলো করিয়া যাও—আমি সব ঠিক করিয়া রাখিয়াছি।” সে রেলের কেতাব প্রভৃতি লইয়া সেই আলোচনার প্রবৃত্ত হইল।

কথাটা কম দিন চাপা রহিল। শ্রুণীল মাকে লইয়া সে অঞ্চলের তীর্থস্থানগুলিতে গেল। কিন্তু তাহার পর? ফিরিয়া আসিয়া মা যখন আবার সেই কথার উত্থাপন করিলেন, তখন ত আর উত্তর না দিবার পথ রহিল না! মা বলিলেন, “তোর উন্নতি হয়, তোর ভাল লাগে, তুই এখানেই থাক। কিন্তু আমি তোকে এমন ভাবে থাকিতে দিব না। আমি থাকি; তোর দাদা ফিরিয়া বাড়ি, ছোট বোমাকে পাঠাইয়া দিউক। সংসার পাতাইয়া আমি যাইব—কখনও তোর কাছে, কখনও কলিকাতার থাকিব।”

শ্রুণীল কিছুক্ষণ নীরস্তর রহিল; তাহার পর বলিল, “না, মা, তাহা হইবে না।”

মা জিজ্ঞাসা করিলেন, “কেন?”

“ধনীর সঙ্গে দরিদ্রের মিলন কেবল অশুভের কারণ।”

মা কাঁদিয়া ফেলিলেন, বলিলেন, “বাবা, দোষ আমারই, তুই প্রথম হইতেই বলিয়াছিলি, ‘বড়মানুষের’ ঘরে কাজ করিয়া কাজ নাই।”

“কিন্তু, মা, তুমি ত ভাল ভাবিয়াই কাজ করিয়াছিলে।”

মা অঞ্চলে চক্ষু মুছিয়া বলিলেন, “কিন্তু, বাবা, ছোট বোমা

ছেলেমানুষ—সে কি এমন অপরাধ করিল যে, তাহার জন্ত তুমি তাহার এমন শাস্তির ব্যবস্থা করিলি ?”

সুশীল বলিল, “মা অপরাধের অপেক্ষা অপরাধের ভয়কেই আমি অধিক ভয় করি। বাহাতে তাহার সম্ভাবনা না হয়, সেই জন্ত দূরে আসিয়াছি।”

এই কথায় মা যেন একটু আশার অবকাশ পাইলেন। তিনি সুশীলকে অনেক বুঝাইলেন, সে হয় ত ভুল বুঝিয়াছে—যদি সে ভুল না-ও বুঝিয়া থাকে, তবুও তাহার পক্ষে এমন কঠোর হওয়া ভাল নহে। ভালবাসা মানুষের দৌর্যল্যা ও ক্রটি দূর করে—ভালবাসার ঔষধে মানুষের হৃদয়ের যত ব্যাধি দূর হয়, তত আর কিছুতেই হয় না। সুশীল বলিল, “ভাল, দেখা যাউক কি হয়। তুমি ব্যস্ত হইও না।” মা বলিলেন, তিনি গৌরীকে বুঝাইয়া তাহার মনের ভাব পরিবর্তিত করিবেন—তিনি তাহাকে আনিবার ব্যবস্থা করিবেন, সুশীল যেন তাহাতে আপত্তি না করে। কিন্তু এ বিষয়ে তিনি কিছুতেই সুশীলকে সন্তুষ্ট করিতে পারিলেন না।

শেষে মা বলিলেন, “তবে আমি তোমার কাছে থাকি। আমরা মা ছেলে, এত দিন যেমন আমাদের আর কেহ ছিল না, না হয় তেমনই আর কেহ থাকিবে না।”

সুশীল বুঝিল, মা কাছে থাকিলে তাহার প্রতিদিনের চেষ্টায় শেষে তাহাকে পরাভব মানিতেই হইবে। সে বলিল, “মা, তাহা হইলে লোকে কি মনে করিবে ? তা কি কখনও হইতে পারে ?”

শেষে মাকেই পরাভব মানিতে হইল।

যাইবার দিন মা কেবলই কাঁদিতে লাগিলেন; বলিলেন, “বাবা, তোরা দুঃখিনীর সখল। আমাকে ত কেলিতে পারিবি না! তুই ফিরিয়া চল। এ শান্তি যে আমার—আর এ যে তোর নিজের!”

সুশীলের মনে হইতে লাগিল, সে যেন আর আপনার দৃঢ়তা অনাহত রাখিতে পারিতেছে না। এক একবার তাহার মনে হইতে লাগিল, অভিমান—অপমান—বিচার—বিবেচনা সব ভুলিয়া সে কেন ফিরিয়া যাইতে পারে না? মায় স্নেহ, পরিবারের স্মৃতিবন্ধন, পুরাতন জীবন তাহাকে আকৃষ্ট করিতে লাগিল। তাহার সঙ্গে আরও একটা আকর্ষণ ছিল, সে বুকের প্রেম। তাহা উপলব্ধি করিয়াই সুশীল ফিরিয়া দাঁড়াইল—আপনার দর্পে আপনার দৌর্জল্য দলিত করিয়া কঠোর হইল—সে ফিরিবে না। ফিরিলে সে কেমন করিয়া আপনার কাছে আপনি মুখ দেখাইবে?

মা কাঁদিতে কাঁদিতে গৃহাভিমুখে যাত্রা করিলেন—ছেলের জন্ত বুক-ভরা—বুক-ভাঙ্গা বেদনা বহিয়া লইয়া গেলেন। এ শান্তি তাহার, আর এ শান্তি তাহার।

আর সুশীল? মাকে ট্রেনে ভুলিয়া দিয়া সে যেন যন্ত্রচালিতবৎ গৃহে ফিরিয়া আসিল। তাহার শুষ্কনেত্রে অশ্রু আসিল না; কিন্তু বাতনার বহির্দাহে তাহার হৃদয় দগ্ধ হইতে লাগিল। প্রিয়জনের চিত্তানলের উপর দাঁড়াইলে যেমন হয়, তাহার তেমনই বোধ হইতে

লাগিল। জীবন মরুভূমি, আশা ভস্মাবশেষে পরিণত, এ অবস্থায় জীবন কি কেবল দুঃখের নহে? হায় ভালবাসা, তুমি মানুষকে কত দুঃখই দিতে পার! রমণীর প্রেম সাধনার ধন—কিন্তু যে সাধনার সিঁদুলিভ না করিয়া ব্যর্থকাম হয়, তাহার মুষ্টিতে স্বর্ণখণ্ড ধূলিতে পরিণত হয়, তাহার মত দুঃখ কাহার? সুশীল সেই দুঃখ ভোগ করিতেছিল। আজ মার প্রত্যাবর্তনের পর স্থিতির আলোড়নে, আলোচনার আন্দোলনে দুঃখ কেবলই বাড়িতে লাগিল। সুশীল ব্যবসায়ের কাজে মন দিয়া বহুতলাভের চেষ্টা করিল, সাফল্য লাভ করিতে পারিল না। সে দিন সেই ভাবে গেল—সে রাত্রি অনিদ্রায় কাটিল।

পর দিন সুশীল আপনাকে আপনি বুঝাইল—এমন করিয়া জীলোকের মত কাঁদিয়া লাভ কি? সুখের হউক বা দুঃখের হউক, কর্তব্য-পালনই তাহার নিয়তি। কাতর হইলে চলিবে কেন? সে তাহার সঙ্কল্পে দৃঢ় হইল—অর্থ যে তাহার করতলগত হইতে পারে, সে তাহা দেখাইবে। এইটুকু প্রতিহিংসা তাহার তৃপ্তিলাভসম্ভাবনার মূলে যে তাহার বুকভরা ভালবাসা ছিল, তাহা সে বুঝিতে পারিল কি? যে ভালবাসা সে যতন কারণ মনে করিতেছিল, সে যে কিছুতেই তাহার বন্ধন হইতে অব্যাহতি লাভ করিতে পারিতেছিল না, তাহা সে অনুভব করিতে পারিল কি?

সুশীল অধিকতর আগ্রহে ব্যবসায়ের মন দিল—সাফল্যের স্রোতে স্বর্ণের প্রবাহ তাহার আয়তাদীন হইল। কিন্তু তাহাতে কি সুখলাভ হইতে পারে?

৮

মা বতই চেষ্টা কেন করুন না, ছেলেকে দেখিতে বাইবার পূর্বে গোৱীকে যে দৃষ্টিতে দেখিতেন, ছেলেকে দেখিয়া ফিরিবার পর আর সে দৃষ্টিতে দেখিতে পারিলেন না। ঘটনার কুত্ৰাটিকায় আমাদের দৃষ্ট পদার্থের রূপান্তর হয়—মারও তাহাই হইল। গোৱী তাঁহার পুত্রের দেশভ্যাগী—গৃহভ্যাগী হইবার কারণ। এ অবস্থায় গোৱীর প্রতি তাঁহার মেহ সহানুভূতিতে পরিণত হইতে পারে, কিন্তু অবিকৃত থাকিতে পারে না। তিনি স্বভাবতঃ মেহশীল ও মৃদু—বিশেষ স্নেহীল তাঁহাকে বলিয়া দিয়াছিল, যেন গোৱীর কোনরূপ অবস্থ না হয়—কাহারও কোনও ব্যবহারে তাহার প্রতি অবহেলা প্রকাশিত না হয়, সে যদি তাহার কর্তব্য পালন করিতে না পারিয়া থাকে, তবে তাহাতে তাহার প্রতি অপরের কর্তব্য বিচলিত হইতে পারে না। কিন্তু মার ব্যবহারে কোনরূপ বিরুদ্ধ ভাব আত্মপ্রকাশ না করিলেও, সে ব্যবহারের পরিবর্তন গোৱী সহজেই অনুভব করিতে পারিল। বিশেষ তাঁহার আক্ষেপোক্তি প্রভৃতি তাহাকে বিশেষ ব্যথিত করিতে লাগিল।

এই নূতন অবস্থায় সে তাহার মাতার কাছে বিশেষ সান্ধল্য পাইল না। তিনি তখনও আপনার গর্বের লিথরে সমাসীন থাকিয়া কেবলই স্নেহীলের দোষ দেখিতেছিলেন। কত বড় বেদনার তড়ানায় সে যে আপনার জীবন ব্যর্থ করিতে বসিয়াছে, তাহা তিনি বুঝিতে চাহিলেন না—কাজেই বুঝিতে পারিলেন না।

তাহার মুখে স্নানীলের নিন্দাবাদ গৌরীর ভাল লাগিত না। তাহার ভালবাসা—বিরহের ব্যবধানে—তারাইবার আশঙ্কায় যে প্রগাঢ়তা লাভ করিয়াছিল, তাহাতে সে স্বামীর দোষও গুণ বলিয়া মনে করিতে শিখিয়াছিল। ঐ বিষয়ে বিধাত্রী দেবীর শিক্ষা বিশেষ কার্যকরী হইয়াছিল। তিনি গৌরীকে বুঝাইয়া দিয়াছিলেন, স্নানীলের যে ব্যবহার সে দোষ মনে করিয়াছিল—সে গুণেরই নামান্তর। গৌরী তাহা বুঝিয়াছিল। তাই মার মুখে স্বামীর নিন্দা তাহার ভাল লাগিত না—সেই আলোচনার ভয়ে সে বড় বাপের বাড়ী বাইতে চাহিত না। তাহার মাতা আক্ষেপ করিয়া বলিতেন, মেয়েও তাঁহাকে পর ভাবিতে আরম্ভ করিয়াছে। কিন্তু সে বাহাই কেন ভাবুক না—‘মাসী বল, পিসী বল—মায়ের বাড়ী নয়।’ এই কথার মধ্যে শান্তড়ীর প্রতি তাঁহার সঞ্চিত অসন্তোষের ইঙ্গিত বুঝিয়া গৌরী আরও ব্যথা পাইত। কেন না, এই অবস্থায় সে যে কিছু সাহায্য পাইত, সে পিতামহীর কাছে—আর স্নানীলের দিদির কাছে। পিতামহীর পত্রের ছত্রে ছত্রে সে তাহার জ্ঞাত তাঁহার বেদনার আর্তনাদ বুঝিতে পারিত।

তরুণ পিতামহী মরে। দিদি নিকটে। বৈধব্যবেদনা দিদির হৃদয়ে সহানুভূতির মন্দাকিনী-ধারা প্রবাহিত করিয়াছিল—হারাইয়া তিনি হারাইবার আশঙ্কায় কাতর হইতেন। কেহ কেহ বলেন যে, ত্রীলোকের ভালবাসার একটা পরিমাণ থাকে—তাই যখন সম্বানের প্রতি মেহে তাহার অধিকাংশ প্রযুক্ত হইয়া যায়, তখন স্বামীর জন্ত আর অধিক অবশিষ্ট থাকে না—তখন

স্বামী জীবনের কেন্দ্র হইতে ক্রমে পরিধিরেখার স্থানান্তরিত
হয়েন। দিদির কাছে কিন্তু স্বামী পুত্রকন্টার অধিক ছিলেন
—তিনি ইহকাল—পরকাল—জন্মসর্বস্ব—জীবনসর্বস্ব ছিলেন।
তঁাহাকে হারাইয়া দিদির পক্ষে জীবন কেবল কর্তব্যের
ভারমাত্র হইয়াছিল। তাই গৌরীর অবস্থা বিবেচনা করিয়া
তিনি ব্যথা পাইতেন—গৌরীর যৌবনলাবণ্যমধুর মুখে বিবাদের
ছায়াপাত দেখিয়া তিনি দীর্ঘশ্বাস ত্যাগ করিতেন। তঁাহার প্রবল
সহানুভূতির আরও একটা কারণ ছিল। তিনি এই ব্যাপারের
কারণ-সন্ধানে প্রবৃত্ত হইয়াছিলেন। গৌরী তঁাহাকে সব কথা
বলে নাই। তবুও তিনি বুঝিয়াছিলেন, অতি সামান্য কারণে এত
বড় ব্যাপার ঘটয়াছে—আর সুধীরকে বিলাতে পাঠান হইতেই
ইহার সূত্রপাত। তাই তিনি আপনাকেও কেমন একটু অপরাধী
মনে করিতেন।

দিদি অনেক ভাবিলেন, কিন্তু ভাবিয়া কোনও উপায় স্থির
করিতে পারিলেন না। শেষে এক দিন তিনি বলিলেন, “গৌরী,
স্বামীর কাছে জীবন ত পদে পদেই অপরাধ—স্বামী সব অপরাধ
ভুলিয়া থাকেন বলিয়াই আমরা স্বামীর ভালবাসা পাই—সে স্বামীর
গুণে। তুমি স্বামীলকে পত্র লেখ—আপনার ভুল স্বীকার কর।
লে রাগ করিয়া থাকিতে পারিবে না।” গৌরী সব তুলিল; ভুল
স্বীকার করিতেও তাহার আগ্রহ, কিন্তু সে ত কখনও পত্র লিখে
নাই। দিদি তাহার অবস্থা বুঝিলেন। তিনি আবার ভাবিতে
লাগিলেন।

তবুও নিশীথে গোরী পত্র লিখিতে বসিল—কত বার লিখিল, কোনও পত্রেই মনের মত হইল না—কোনও পত্রেই তাহার মনের কথা ফুটিয়া উঠিল না। সে পত্র লিখিল, আর ছিঁড়িল। সকালে দিদি আসিয়া তাহার ঘরে প্রবেশ করিতেই সে কাঁদিয়া ফেলিল। দিদি মেঝের উপর ছিন্ন পত্রের স্তূপ দেখিলেন—গোরীর আগরণ-চিহ্নাক্ত নয়নে অশ্রুধারা দেখিলেন—আপনি অশ্রুসংবরণ করিতে পারিলেন না।

মা, দিদি, গোরী—কেহই ভাবিয়া কোনও উপায় স্থির করিতে পারিলেন না।

বিধাজ্ঞী দেবীরও ভাবনার অন্ত ছিল না। তিনি পূর্বেই ভয় করিয়াছিলেন, স্মৃশীলের স্থানান্তর-গমনের প্রকৃত কারণ তাহার মাতার অজ্ঞাত থাকিবে না। তখন কি হইবে, ভাবিয়া তিনি শঙ্কিত হইয়াছিলেন। গোরীর পত্রে তিনি যখন তাহার শাণ্ডীর প্রত্যাবর্তনের কথা জানিলেন, তখন তিনি আর স্থির থাকিতে পারিলেন না—তীর্থভ্রমণ উপলক্ষ করিয়া স্মৃশীলের কর্মস্থলে গমন করিলেন। কিন্তু তিনি পূর্বে স্মৃশীলকে তাঁহার গমন-সংবাদ দিয়াছিলেন; যাইয়া দেখিলেন, স্মৃশীল চলিয়া গিয়াছে—তাঁহার অস্ত পত্র রাখিয়া গিয়াছে—“মা আসিয়াছিলেন তাঁহাকে কাঁদাইয়া ফিরাইয়াছি। সে আমার দুর্ভাগ্য। কিন্তু তাঁহার বেদনা বিগুণ হইয়া আমার বুকে বাজিয়াছে। আজ আপনাকে ফিরাই-তেছি। ইহাও আমার দুর্ভাগ্য। কিন্তু উপারান্তরবিহীনের অপরাধ ক্ষমা করিবেন। আমি স্নেহকে বড় ভয় করি—পাছে

তাহার কাছে পরামর্শ বীকার করিতে হয়, সেই ভাবে আমি পলায়ন করিলাম।”

বিধাতা দেবী প্রমাদ করিলেন—এত দিন পরিবার হইতে দূরে নিঃসঙ্গ প্রবাসের অজস্র অসুবিধাও সুশীলের সকল পরিবর্তিত করিতে পারিল না! সে যখন ক্রমে এই জীবনে অভ্যস্ত হইয়া বাইবে—যখন নূতন আশাই তাহাকে আকৃষ্ট করিতে থাকিবে, তখন তাহাকে কিরাইবার বে আর কোনও উপায়ই থাকিবে না! ভালবাসার প্রবাহ-বেগ একবার প্রতিহত করিতে পারিলে তাহাকে যে পথে ইচ্ছা লইয়া যাওয়া সম্ভব হয়।

এমনই ভাবে দিনের পর দিন ও মাসের পর মাস কাটিতে লাগিল। দুইটা সংসারে দুর্ভাবনার নিবিড় ছায়া দিন দিন প্রগাঢ় হইতে লাগিল; সে ছায়া অপমৃত্যু করিবার কোনও উপায় কেহ করিতে পারিলেন না।

এই সময়ের মধ্যে সুশীলের পরিবারে দুইটা ঘটনা পরিবারস্থ ব্যক্তিদিগকে ব্যাপ্ত রাখিল। প্রথম—সুশীলের জ্যেষ্ঠের প্রথম সন্তানের আবির্ভাব; দ্বিতীয়—তাহার তিন মাস পরে সাক্ষ্য লাভ করিয়া সুশীলের প্রত্যাবর্তন। পরিবারে এই নূতন শিশুর আবির্ভাব মাকে ব্যস্ত রাখিল। সুশীল তাহার কনিষ্ঠ সন্তান—এত দিন পরে গৃহে নূতন শিশু আসিল। বিধবা হইয়া তিনি বে দুই পুত্রকে লইয়া সংসারী হইয়াছিলেন—তাহাদেরই এক জন নূতন সংসার পাতাইল। কিন্তু আর এক জন? মা অশ্রুমোচন

করিলেন। দূরগত পুত্রের জন্ত তাঁহার দারুণ বেদনা যেন আরও দারুণ হইয়া উঠিল। তিনি কত্নাকে বলিলেন, “মা, স্নানীলকে সংসারী করিতে পারিলাম না!” কত্নাও অশ্রুমোচন করিলেন—উত্তর দিবার কিছুই নাই। গৃহে আনন্দোৎসবের মধ্যে উভয়েরই হৃদয় : স্নানীলের জন্ত বেদনা অনুভব করিতে লাগিল। গৃহে আরও এক জন অহরহঃ বক্ষে বেদনা লইয়া দিনযাপন করিতে লাগিল—সে গৌরী। যত দিন যাইতে লাগিল, ততই তাহার জীবনের ব্যর্থতা তাহার পক্ষে অসহ হইয়া উঠিতে লাগিল। তাহার অভাবের পরিমাণ ততই অধিক বলিয়া অনুভূত হইতে লাগিল। তাহার ভালবাসা ভক্তিতে রূপান্তরিত হইয়া স্বামীকে দেবতার আসনে বসাইয়া সার্থকতা-লাভের প্রয়াস পাইত বটে, কিন্তু তবু মানবের—যৌবনের ভালবাসার উচ্ছ্বাস যখন প্রবল হইত, তখন সে যেন আর আপনাকে শান্ত করিতে পারিত না। ভালবাসা যে ভক্তিতে পরিণত হয়—সে ঘটনার বা সাধনার শৈথল্যে। কিন্তু মানুষের স্বাভাবিক ব্যাকুল বাসনার—আশা-তৃষ্ণার উত্তাপে যখন সেই ভক্তি আবার বিগলিত হইয়া ভালবাসার খাতে প্রবাহিত হয়, তখন সে প্রবাহের বেগ কে রোধ করিতে পারে?

সুখীর ফিরিয়া আসিল। সে ফিরিবার পথে স্নানীলের সঙ্গে দেখা করিয়া আসিয়াছিল—কিন্তু স্নানীলের গৃহত্যাগের কারণ অস্বপ্ন করিতে পারে নাই। সে ফিরিবার পর আর একটা বিষয়ে সকলের দৃষ্টি পড়িল—তাহার বিবাহ। সুখীরের পিতা

বড় বন্ধুবৎসল ছিলেন। তিনি তাঁহার এক বন্ধুর কন্যার সঙ্গে সুধীরের বিবাহ দিবেন, বলিয়া রাখিয়াছিলেন—মেয়েটিকে বরাবরই ‘মা লক্ষ্মী’ বলিয়া ডাকিতেন। তাঁহার মৃত্যুর পর কন্যার পিতা সে বিষয়ে সুধীরের মাতার মত জানিতে চাহিয়াছিলেন—মেয়ের বাপের পক্ষে পাকা কথা নহিলে নিশ্চিত থাকার সম্ভাব্য নহে। সুধীরের মাতা সে বিষয়ে আপনার মাতার সঙ্গে পরামর্শ করিয়াছিলেন। মা বলিয়াছিলেন, “ভাল করিয়া বুঝিয়া দেখ—শেষে ছেলের মত চাহি, সে কথাও ভাবিয়া দেখ। আমাদের যে কপাল—শেষে যদি কথা দিয়া কথা রাখিতে না পারি?” মেয়ের কিন্তু সে বিষয়ে সন্দেহ ছিল না—স্বামী যে কথা দিয়া গিয়াছেন, তিনি তাহার অন্তথা করিতে পারিবেন না; তবে ছেলেকে একবার জিজ্ঞাসা করা ভাল। তিনি সুধীরকে ডাকিয়া সব কথা বুঝাইয়া বলিয়াছিলেন। সব শুনিয়া সুধীর বলিয়াছিল, “মা, আমাকে এ কথা জিজ্ঞাসা করিতেছ কেন? বাবা যে কথা দিয়া গিয়াছেন, সে কথা রাখা যদি তোমার কর্তব্য হয়—তবে তাহা কি আমারই কর্তব্য নহে? তাঁহার আমাদের পরিবর্তিত অবস্থা বিচার করিয়া দেখুন। দেখিয়া তাঁহার যদি তাঁহাদের কথার অবিচলিত থাকেন, আমরা বাবার কথার অন্তথা করিব না।” সুধীরের মাতা কন্যাপক্ষকে সেই কথাই বলিয়াছিলেন। পরিবর্তিত অবস্থার কথা বিচার করিয়াও কন্যার পিতা সেই সঙ্কল্পের পক্ষপাতী হইয়াছিলেন। কেন না, সুধীরের মত ছেলে পাওয়া সহজ নহে—বিশেষ সুধীরের মাতাকে তাঁহার

জানিতেন, মেয়ের ভেমন শাওড়ী পাইবার প্রয়োজনও সংবরণ করা তাঁহার হৃৎসাধ্য বিবেচনা করিয়াছিলেন। সুধীর করিলে তাঁহার বিবাহের দিন স্থির করিতে বলিলেন।

বিবাহে সকলেরই মত ছিল। সুশীলের জ্যেষ্ঠ এখন বাড়ীর কর্তা। তিনি বলিলেন, “এ বিষয়ে আর কথা কি? মেয়ের পক্ষের ব্যস্ত হওয়াই স্বাভাবিক। আমি সুশীলকে পত্র লিখি।” কান্নার পত্র পাইয়াই সুশীল উত্তর দিল, “মেয়ের পত্রকে অকার্য্যে আর বিলম্ব করিতে বলা ভাল দেখায় না। আমি স্থির করিয়া ফেলুন।”

বিবাহের উত্তোপ—আয়োজন হইতে লাগিল। আর ও দিদির বিশ্বাস ছিল, সুধীরের বিবাহে সুশীল না আসিয়া থাকিতে পারিবে না। তবুও দিদি তাহাকে পত্র লিখিলেন—“জ্যেষ্ঠ, তোমাকে আর কি লিখিব? তুমি আসিয়া না দাঁড়াইলে বিবাহে আমার কোনও আনন্দই হইবে না। আমার এই কথা মনে করিয়া—তোমার লিভুহীন ভাগিনেয়ের কথা ভাবিয়া, তুমি আসিবে। আমাদের এ আশার হতাশ করিও না।”

দিদির পত্র পাইয়া সুশীল বিচলিত হইল। এ আহ্বান সে কেমন করিয়া অবহেলা করিবে? কর্তব্য যে তাহাকে যাইতেই বলিতেছে। সে না যাইলে দিদি চক্ষুর জল ফেলিবেন ভাবিয়া তাহার নয়ন অশ্রুসিক্ত হইয়া উঠিল। বৃষ্টি তর্কের পাবাণ দিয়া মেহ ভালবাসার উৎস-মুখ রুদ্ধ করা তাহার পক্ষে হৃৎসাধ্য হইয়া উঠিল। তাহার মনে হইতে লাগিল—বুঝি সে পরাভব মানিল।

তাহার পর সে ভাবিল—জীবনের বে অধ্যায়ের শেষ হইয়াছে, তাহা আবার আরম্ভ করিব কেমন করিয়া? সে আপনার প্রতি করুণার আশনি দীর্ঘকাল ত্যাগ করিল।

সুশীল স্থির করিলেন যে, সে সুধীরের বিবাহে যাইবে না, কিন্তু সে কথা দিদির লিখিতে সাহস করিল না।

বিবাহের দিন-পর্যন্ত দিদির দৃঢ় বিশ্বাস ছিল, সুশীল তাঁহার অনুরোধ অতিক্রম করিতে পারিবে না। সে দিন তাঁহার সে আশা নিশ্চল হইল। তিনি দুঃখ সহ করিতে শিখিয়াছিলেন—সে কথা ব্যক্ত করিলেন না। কিন্তু যখন বর যাত্রা করিল, তখন তাঁহার সমস্ত বেদনার সঙ্গে এই বেদনাও তাঁহাকে বিচলিত করিল। এই উৎসবের মধ্যে তাঁহার স্বামি-বিরোগ-বেদনা যেন প্রবল হইয়া উঠিতেছিল। বর যাত্রা করিবার পর তিনি মাকে বলিলেন, “সুশীল আসিল না।” কত কি বেদনা বক্ষে লইয়া কাঁদ করিতেছিল, মা তাহা অন্তরে বেদনার অনুভব করিতেছিলেন। তাই আজ সুশীলের ব্যবহারে তাঁহার মনে একটু অভিমানের আবির্ভাব হইল। তিনি বলিলেন, “আমরা তাহার কাছে কি অপরাধ করিয়াছি যে, সে তোমার ব্যথাও বুঝিল না?” দিদির মনে কিন্তু অভিমানের স্থান ছিল না। তিনি বলিলেন, “মা সে-ই কি ইহাতে ব্যথা পাইতেছে না?”

গৌরী তথায় ছিল। মাতা পুত্রীর এই বেদনা যেন বৃত্তিক-দংশন-যাতনার মত তাঁহাকে ব্যথিত করিতে লাগিল। সব অপরাধ তাহার। সে কেমন করিয়া সংসার হইতে এ বেদনার চিহ্ন মুছিয়া

দিয়ে। তাহার বার্থ জীবন স্বামীর ভালবাসায় সার্থক করিবার আশা তাহার পক্ষে দিন দিন হ্রাসাশা মনে হইতেছিল। কিন্তু দিদি ত সত্যই বলিয়াছেন—“সেও কি ব্যথা পাইতেছে না? সে-ই ত যে বেদনার কারণ। সে তাহার ব্যবস্থায় কেবল আপনার জীবনই বার্থ করে নাই, স্বামীর জীবনও বার্থ ও বেদনাময় করিয়াছে।” গৌরী কঁাদিয়া ফেলিল। দিদি তাহা লক্ষ্য করিলেন—তাহার অল্প তাঁহার হৃদয়ে সমবেদনা প্রবল হইয়া উঠিল।

ও দিকে দিদি বাহা মনে করিয়াছিলেন, স্ত্রীলের তাহাই হইল। স্ত্রীরের বিবাহের দিন সে কোনও কাজেই মন দিতে পারিল না। সে আদালতে গেল না—সমস্ত দিন আপনার বক্ষে বেদনা লইয়া যাপন করিল—অপরাত্নে পাছে কেহ সাক্ষাৎ করিতে আসেন বলিয়া, নদীর কূলে চলিয়া গেল—সন্ধ্যার পর গৃহে ফিরিল।

তাহার পর সে দাদার পত্র পাইল—বিবাহ নির্বিঘ্নে সম্পন্ন হইয়াছে। কিন্তু সে না আসায় মা ও দিদি বড় দুঃখিত হইয়াছেন। দিদির কোনও পত্র সে পাইল না। দিদি যদি তাহাকে তিরস্কার করিয়া পত্র লিখিতেন—তাহা হইলে ভাল হইত; কিন্তু তিনি যে তাহাকে কোনও পত্র লিখিলেন না—তাহাতে সে তাঁহার হতাশা বেদনার পরিমাণ বুঝিয়া কষ্ট পাইল। আপনার অবস্থায় আপনার উপর তাহার বিরক্তি ও কক্ৰপা জন্মিতে লাগিল। এক একবার তাহার মনে হইতে লাগিল, স্নেহ ভালবাসার নির্দিষ্ট সরল পথ

তাগ করিয়া—বুদ্ধি-বিবেচনা-দর্শিত বক্তৃতা পছন্দ অবলম্বন করিয়া সে ভুল করে নাই ত? কে বলিবে?

সুশীল দাদাকে লিখিল, “দিদির কথা না রাখিয়া অপরাধ করিয়াছি—তঁাহাকে আর পত্র লিখিতেও আমার সাহসে কুলাই-তেছে না।” দাদা কেবল লিখিলেন—“দিদিকে তোমার কথা পড়িয়া শুমাইয়াছি।” কিন্তু দিদি শুনিয়া কিছু বলিয়াছেন কি না, সুশীল জানিতে পারিল না।

দুই মাস দিদির কথা যখন তখন সুশীলের মনে হইতে লাগিল। তাহার পর সে সুধীরের পত্র পাইল—সে আসিতেছে। সুধীরের আগমনের কোনও বিশেষ কারণ আছে কি না, সুশীল তাহার আলোচনা করিতে লাগিল। কিন্তু আলোচনার বিশেষ সময় ছিল না—কারণ পর দিনই সুধীর আসিবে।

সুশীল ভাগিনেরকে আনিবার জন্ত স্টেশনে গেল। সুধীর মনে করিয়াছিল, মামা তাহার জন্ত স্টেশনে আসিবেন—সে কামরার জানালা হইতে মুখ বাড়াইয়া ছিল—সুশীলকে দেখিতে পাইয়া ডাকিল—“ছোট মামা!” সুশীল বাইরা কামরার দ্বার মুক্ত করিল—সুধীর নামিয়া আসিল। সুশীলের ভৃত্য সঙ্গে ছিল—সে জিনিস নামাইতে কামরার উঠিল। জিনিসের মধ্যে একটা বড় বাক্স। সেটা নামান হইলে সুধীর হাসিয়া বলিল, “আরও একটা জিনিস আছে।” সুশীল জিজ্ঞাসা করিল, “কোথায়?” “এই যে” বলিয়া সুধীর কামরার প্রবেশ করিল।

সুধীরের সঙ্গে নামিয়া আসিয়া এক কিশোরী সুশীলকে প্রণাম

করিল। সুশীল বিন্মিতনেত্রে ভাগিনেয়ের দিকে চাহিলে সুধীর হাসিয়া বলিল, “মা বলিলেন, ‘আমার দৃঢ় বিশ্বাস ছিল—তোমার বিবাহে সুশীল আসিবে। সে আমার সে বিশ্বাস চূর্ণ করিয়া দিয়াছে। আমি আর তাহাকে কখনও কিছু বলিব না। তবে তোমার কর্তব্য—তুই তাহাকে বৌ দেখাইয়া আন’।”

সুশীল সনেহে কিশোরীর মস্তকে করতল স্থাপিত করিল; বলিল, “তাই ত মা, ছেলেকে দেখিতে আসিয়াছ! বড় ছুট ছেলে—না? কিন্তু কথার বলে—‘কুপুল যদিও হয়—কুমাতা কখনও নয়’। সে কথা ঠিক।” তাহার পর সে সুধীরকে বলিল, “আমাকে একটু লিখিতে হয়। মার বে বড় কষ্ট হইবে।” সুধীর বলিল, “লিখিলে কি আপনি রাজী হইতেন?”

সুশীল সুধীরকে ও তাহার বধূকে গাড়ীতে তুলিয়া দিয়া বলিল, “বাসায় যাও। আমি একটু ঘুরিয়া এখনই বাইতেছি।”

একখানা গাড়ী ভাড়া করিয়া সুশীল সন্মুখে গেল, এবং একখানি মূল্যবান অলঙ্কার কিনিয়া লইয়া গৃহে ফিরিল। সে ভাগিনেয়-বধূকে ডাকিয়া অলঙ্কার দিল। সুধীর বলিল, “এই জন্ত বৃথা ঘুরিয়া আসিলেন?” সুশীল উত্তর দিল, “তোমার যেমন বুদ্ধি! শুধু হাতে কি বৌ দেখিতে আছে। দেড় বৎসর বিলাতে থাকিয়া তুই যে একেবারে মোচাকে ‘কলার ফুল’ বলিতে শিখিয়াছিল!”

তাহার পর সুশীল বধূকে বলিল, “মা, আমার এ তাগুতে রান। মা একবার আসিয়াছিলেন—তাহাকে সব শুধাইয়া লইতে হইয়াছিল। তুমি আসিয়াছ—তোমাকেও তাহাই করিতে হইবে।

তবে বিরক্ত হইতে পারিবে না—এ সব ছেলের উপর মেহের অস্ত্র মার শাস্তি।” প্রকৃতপক্ষে কিন্তু সে-ই সব শুছাইয়া দিল, এবং যত্নের আতিশয্যে বধূকে প্রাণিত করিয়া দিল।

সেই দিন অপরাহ্নেই সুধীর তাহার সঙ্গে আসল কথার আলোচনায় প্রবৃত্ত হইল। এইবার দিদি তাঁহার গৃহে ফিরিয়া যাইতে চাহেন। সুধীর বলিল, “এখন পশার করাই কঠিন ; কেন না—গলিতে গলিতে ডাক্তার। কিন্তু পশার হইলে সে পাড়া ছাড়িয়া যাইলে কতি অনিবার্য। তাই আমি একেবারে বাড়ীতেই বসিতে চাহি।” উভয়ে অনেক তর্ক বিতর্ক হইল। শেষে সুশীল বলিল, “তুই যাহাই কেন বলিস না, আমি তোর কথায় রাজী হইতে পারিব না। দিদি চলিয়া গেলে মার বড় কষ্ট হইবে। সেই যখন কেবল আমরা দুই ভাই আর মা বাড়ীতে ছিলাম, ভেমনই হইবে। দাদার ছেলেকে লইয়া মা ব্যস্ত হইলেও না হয় হইত। দাদা লিখিয়াছেন—সে তাহার পিসীর কোল দখল করিয়াছে। এখন তোর বাওরা হইবে না। এ যুক্তি নহে—তর্ক নহে, ইহাই আমার মনের কথা।”

তাহার পর সুশীল মার কথা—দিদির কথা—সংসারের কত কথা জিজ্ঞাসা করিল।

সুধীর দুই দিন পরে বাইবার ব্যবস্থা করিয়া আসিয়াছিল। সুশীল বলিল, “তাহাও কি কখন হয় ! তোর কি—তুই মাত সন্তান পায় হইয়াছিস, তোর সব সন্তান হয়। মার বে কষ্ট হইবে—আরও দুই দিন বিশ্রাম করিয়া পরে বাইবার কথা।” সে আপনি

মস্কো বাইরা ভাগিনের-বধূকে সব দ্রষ্টব্য স্থান দেখাইল। আর
বাহীর সকলের মস্ত কত জিনিসই কিনিতে লাগিল। সুধীর
বলিল, “আপনি কি সহরের সব দোকান উজাড় করিবেন?”

দুই দিনের পর দুই দিন—তাহার পর আরও দুই দিন
গেল। তখন সুশীল আর সুধীরকে রাখিতে পারিল না।

‘ভাগিনেরকে ও ভাগিনের-বধূকে ট্রেনে তুলিয়া দিয়া সুশীল
বখন ‘সুখহীন ভবনে’ ফিরিয়া আসিল, তখন তাহার মনে
তাহার দূরস্থ পরিবারের চিত্র কি মনোরম বর্ণেই ফুটিয়া
উঠিতে লাগিল! সে কি কেবল দূরত্বের ব্যবধান-হেতু? না—
তাহার তৃষ্ণা—তাহার বাসনা বিচিত্র বর্ণলেপে সে চিত্র চিত্তাকর্ষক
করিতে লাগিল? কে বলিবে? কিন্তু তাহার মনে হইতে
লাগিল—গত দুই বৎসরের জীবন যদি সত্য সত্যই স্বপ্নমাত্র হইত!
যদি সে জাগিয়া দেখিত, দুই বৎসর পূর্বে সে যে স্থানে ছিল,
এখনও সেই স্থানেই আছে! যার সেই স্নেহ—দিদির সেই
ভালবাসা—ভাগিনের ভাগিনেরীদিগের প্রতি সেই স্নেহ।
আর—!

সুশীলের নিকট হইতে ফিরিয়া আসিয়া সুধীর মামার বাড়ীর প্রবেশদ্বারের পার্শ্বে প্রাচীরে আপনার উপাধিসম্বলিত নামাক্তিত পাথর বসাইয়া পশারের জন্ত অপেক্ষা করিতেছিল। ডাক্তারীর পশারে একটু বৈশিষ্ট্য আছে—তাহা সর্বতোভাবে লোকের বিশ্বাসের উপর নির্ভর করে এবং সে বিশ্বাস অনেক সময় একটা সামান্য ঘটনার উৎপন্ন হয়—এক বাড়ীতে একজন রোগীর আরোগ্য-ব্যাপারে ডাক্তারের পশার জমিতে পারে। সুধীরের পশার জমে নাই—তবে সে আত্মীয়-স্বজন বন্ধু-বান্ধবের বাড়ী “বিনা ডাকে” ডাক্তারী করিয়া বিচার চর্চা রাখিতেছিল। সেইরূপ ডাক্তারী সারিয়া সে যখন মধ্যাহ্নের একটু পূর্বে বাড়ী ফিরিল তখন দ্বারেই টেলিগ্রাফ পিয়নের সঙ্গে তাহার দেখা হইল—সে সুশীলের দাদার নামে একখানা টেলিগ্রাম আনিয়াছিল। সুধীর সেখানা হাতে লইয়া বসিবার ঘরে গেল এবং দুইবার নাড়াচাড়া করিয়া খুলিয়া ফেলিল। পড়িয়াই সে ব্যস্ত হইয়া ঘরের বাহিরে আসিয়া চাকরকে বলিল, “ছুটিয়া আস্তাবলে, যাও—গাড়ী ফিরাইয়া আন।” উপরে তাহার মা সে কথা শুনিতে পাইয়া বলিলেন, “কিরে, সুধীর ?”—“আসিয়া বলিতেছি”—বলিয়া সুধীর আবার ঘরে প্রবেশ করিল এবং আফিসে বড় মামাকে টেলিফোন করিল—“গিরিজাবাবু টেলিগ্রাফ করিয়াছেন—ছোটমামার প্রেগ হইয়াছে।” আপনি আসুন। আমি প্রতিষেধক রোগরস আনিতে চলিলাম।” সে বাহির হইয়া গেল।

সুশীল কাছারীতেই অর অসুস্থ করে এবং বাড়ী ফিরিয়া
 * অরের প্রাবল্য সন্দেহ করে—তাহার প্লেগ হইয়াছে। তখনই সে
 গিরিজাকে পত্র লিখে—তাহার প্লেগ হইয়াছে ; সে হাঁসপাতালে
 বাইতেছে। গিরিজা যেন তাহার বাড়ীতে সংবাদ না দেয়। পত্র
 পাইয়া গিরিজা ব্যস্ত হইয়া আসিয়া দেখে, সুশীল হাঁসপাতালে
 বাইবার উত্তোগ করিতেছে। গিরিজা বলিল, “তুমি হাঁসপাতালে
 বাইতেছ কেন ?” সুশীল উত্তর করিল, “এই সব চাকর কি কখন
 প্লেগের রোগীর কাছে থাকিবে ?” গিরিজা বলিল, “না থাকে—
 আমি ডাক্তার—শুশ্রূষাকারী আনিতেছি। তুমি হাঁসপাতালে
 বাইতে পাইবে না।” সুশীল বলিল, “সে হইবে না। আমি
 বাড়ী থাকিলে—তুমি আসিবে।” গিরিজা বলিল, “সেজন্ত ভয়
 করিও না। আমি প্রতি বৎসরে এ সময় প্লেগের টীকা লইয়া
 থাকি—একরঙ লইয়াছি।” গিরিজার নির্দ্বন্দ্বাতিশয়ে সুশীল
 বাড়ীতেই থাকিল ; কিন্তু বিশেষ করিয়া বলিল, গিরিজা যেন
 তাহার বাড়ীতে সংবাদ না দেয়। বলা বাহুল্য গিরিজা সে কথা
 রাখে নাই। ডাক্তারও শুশ্রূষাকারী আনিতে বাইবার পথেই সে
 টেলিগ্রাফ করিত ; কিন্তু যদি অর—কেবল অরই হয়, দেখিবার
 জন্ত পরদিন প্রভাত পর্যন্ত অপেক্ষা করিয়াছিল। প্রভাতে যখন
 ডাক্তার বলিলেন—প্লেগ—সে তখনই সুশীলের দাদাকে টেলিগ্রাফ
 * করিয়াছিল। তখন প্রবল অরে সুশীল অজ্ঞান হইয়াছে—জীবনের
 সঙ্গে মৃত্যুর সংগ্রাম আরম্ভ হইয়াছে।

সুশীলের দাদা ফিরিয়া আসিয়া দেখিলেন, সুখীর ফিরিয়া

আসিয়াছে। উভয়ে পরামর্শ করিলেন—তাহার পর মাকে ও দিদিকে সংবাদ জানান হইল। সুধীর বলিল, “চল—আমি তোমাদের লইয়া বাই; কিন্তু সকলকেই প্রেগের টাকা দিতে হইবে।” মা প্রস্তরমূর্তির মত বসিয়া রহিলেন—মুখে কথা সরিল না। দিদি উঠিয়া গোরীর ঘরে গেলেন; বলিলেন, “গোরি, সর্বনাশ উপস্থিত। সুশীলের প্রেগ হইয়াছে—আমরা বাইতেছি—তুমি চল।” গোরী উত্তর দিল না। দিদি দেখিলেন, তাহার মুখে পাণ্ডুবর্ণ ব্যাপ্ত হইয়া পড়িল। তিনি মুচ্ছিতা গোরীকে ধরিয়া মেঝের উপর শোয়াইয়া তাহার চক্ষুতে জলের বাপুটা দিতে লাগিলেন। অল্পক্ষণেই তাহার চেতনা সঞ্চার হইল। দিদি বলিলেন, “তুমি উঠিও না। আমি তোমার ছইখানা কাপড় শুছাইয়া লইতেছি।”

তাহার পর সুধীর আপনি টাকা লইয়া মাকে, দিদিকে ও গোরীকে টাকা দিল। সুধীরের দাদা বলিলেন, “আমাকে টাকা দিলি না?” সুধীর জিজ্ঞাসা করিল, “আপনিও যাইবেন?” তিনি বলিলেন, “যাইব না?” সুধীর বলিল, “বাড়ীতে কেহ থাকিবে না।” তিনি উত্তর করিলেন, “সর্বস্বের অপেক্ষাও ভাই বড়।” বাস্তবিক হইে ভ্রাতার স্নেহবন্ধন অসাধারণ দৃঢ় হইবার বিশেষ কারণ ছিল—উভয়ে ভ্রাতা ও বন্ধু—উভয়ে উভয়ের সাহচর্য্যে কখন বন্ধুর অভাব অনুভব করেন নাই। সুধীর তাঁহাকেও টাকা দিল।

গোরীর মা সংবাদ পাইয়া আসিলেন। তিনি গোরীকে বলিলেন, “তুই বাইয়া কি করিবি? তুই ত রোগীর সেবা করিতে

পারিস্ না—বিশেষ তোর কষ্ট সহ করা অভ্যাস নাই।” গৌরী
মা’র কথার কোন উত্তর দিল না—মা’র কাছ হইতে বাইরা
শান্তডীর কাছে বসিল—তথায় সমবেদনার মোন সাধনা ছিল।
কিছুক্ষণ থাকিয়া—মামুলী সতর্কতার ও আশার কথা বলিয়া তাহার
মা যখন বিদায় লইলেন, তখন গৌরী তাঁহার সঙ্গে দ্বার পর্যন্ত বাইরা
বসিল, “আমি ঠাকুরমা’কে পত্র লিখিতে পারিলাম না। তুমি
তাঁহাকে সংবাদ দিও।” মা একটু বিব্রতভরে বলিল, “আচ্ছা।”
মা চলিয়া গেলেন—মেয়ে মনে করিল, ঠাকুরমা’কে সে সংবাদ
দিলেই ভাল হইত—কিন্তু সে কিছুতেই পারিয়া উঠিল না। তাহার
বুকের মধ্যে প্রবল যাতনা তাহাকে স্থির হইতে দিতেছিল না।
এমন যাতনা সে আর কখন অনুভব করে নাই। মানুষ যতই কেন
হতাশ হউক না তাহার হৃদয়ে আশার স্থান লুপ্ত হয় না—যখন
সেই আশার বিলোপাশঙ্কায় মানুষ কাতর হয়, তখন তাহার যাতনা
বুঝি মৃত্যু-যাতনার অপেক্ষাও প্রবল বলিয়া অনুভূত হয়।

আশঙ্কায়—বেদনায়—অনাহারে—অনিদ্রায় দীর্ঘ পথ অতিক্রম
করিয়া বিপন্ন পরিবার যখন শঙ্কা-কম্পিত-হৃদয়ে স্ত্রীলোকের গৃহে
উপনীত হইলেন তখন স্ত্রীলোক অজ্ঞানাবস্থায় জীবনমৃত্যুর সম্মুখ
গিরিজা তাঁহাদের আগমন প্রতীক্ষায় বারান্দায় বসিয়াছিল—গাড়ী
আসিতে দেখিয়া গাড়ীর কাছে আসিল—কেহ কোন প্রশ্ন পরিবার
পুর্বেই বলিল, “অবস্থা সমান।” কেহ কোন কথা বলিলেন না—
আর সকলকে তাহার সঙ্গে বাইতে বারণ করিয়া স্ত্রীলোক গিরিজার
সঙ্গে রোগীর কক্ষে প্রবেশ করিল। বাহারা বাহিরে অপেক্ষা

করিতে লাগিলেন তাঁহাদের কাছে সময় কত দীর্ঘ বলিয়াই বোধ হইতে লাগিল। আশঙ্কা কালের পরিমাণ দীর্ঘ করিয়া তুলে। তাই রোগীর নিঃশব্দ গৃহে দিন যেন আর বাইতে চাহে না—দিনের হিসাব ঘণ্টার এবং ঘণ্টার হিসাব মিনিটে করিতে হয়।”

ডাক্তারের সঙ্গে কথা বলিয়া সুধীর কিরিয়া আসিল এবং তাহার মাতাকে বলিল, “মা, এমন ভাবে যদি থাকিবে, তবে আসিলে কেন? রোগীর সেবা করিতে আসিয়াছ, সে কথা মনে কর—যাও স্নানাহার কর, তাহার পর আমি সময় ভাগ করিয়া দিব—এক জনের পর এক জন রোগীর কাছে থাকিব।” মা বলিলেন, “সুধীর, আমাকে একবার দেখিতে দিবি না?” সুধীর বলিল, “দিদিমা, চল—কিন্তু ঘরে গোল করিও না।”

মা সুধীরের সঙ্গে সুশীলের শয়নকক্ষে প্রবেশ করিলেন। গোঁরী কাতর-দৃষ্টিতে দিদির দিকে চাহিল। দিদি তাহার হাত ধরিয়া সেই ঘরে লইয়া গেলেন। গোঁরীর মাথার কাপড় সরিয়া পড়িয়াছিল—সে টানিয়া দিতে ভুলিয়া গেল,—যন্ত্র-চালিতবৎ দিদির সঙ্গে গেল—তাহার সমস্ত বৃত্তি যেন দৃষ্টিতে পরিণত হইয়া রোগ-শয্যা শয়ান স্বামীকে দেখিল। তাহার পর দিদিই তাহার হাত ধরিয়া ঘর হইতে লইয়া আসিলেন। সে কেবল দেখিতেছিল—তাহার জীবনমন্দিরের দেবমূর্তি যেন দারুণ ভূমিকম্পে বেদী হইতে পতিত হইয়াছে—বজ্রাহত স্বর্ণশৃঙ্খের মত তাহা ভূমিতে লুপ্তিত।

তাহার পর সুধীর সময় ভাগ করিয়া কে কখন রোগীর কাছে থাকিবেন—স্থির করিয়া লইল। হুই জন ডাক্তার, সুশীলের

তাহার পর সে চক্ষু মুদিল—কিন্তু চক্ষু মুদ্রিত করিবার পূর্বে আর একবার দেখিল তাহার পদের কাছে গৌরী বসিয়া আছে—তাহার মুখ স্নান, শুষ্ক—কিন্তু নয়নে আশার আলোকদীপ্তি। গৌরী তাহার সেবার সময় আসনখানি স্নানিলের পাশ্বে হইতে টানিয়া চরণের কাছেই বসিত।

স্নানিল বুঝিল, তাহার বারণ না মানিয়া গিরিজা তাহার গৃহে সংবাদ দিয়াছিল। কিন্তু সে কিছুতেই গিরিজার উপর রাগ করিতে পারিল না। পর দিন প্রভাতে গিরিজাকে সে যখন বলিল, “তুমি কেন খবর দিয়াছিলে?” তখন গিরিজা বলিল, “বেশ করিয়াছিলাম। এই সেবাসুত্রে ভাড়াটিয়া লোকের দ্বারা হইত?” স্নানিল আর কোন কথা কহিল না—হাসিল।

তাহার পর শ্রোত ফিরিল—আরোগ্যের গতি দিন দিন দ্রুত হইতে লাগিল, স্বাস্থ্য আপনার অধিকার ফিরিয়া লইতে লাগিল। সঙ্গে সঙ্গে স্নানিল ভাবিতে লাগিল।

গৌরীর অক্লান্ত ও আন্তরিক সেবা স্নানিল লক্ষ্য না করিয়া পারিল না। দিদি সময় সময় একটু কৌশলে সে দিকে তাহার দৃষ্টি আকৃষ্ট করিতে প্রয়াস পাইতেন—গৌরীর নির্দিষ্ট সময়ের অবসানপূর্বেই আসিয়া তাহাকে বলিতেন, “তুমি যাও—আমি বসিতেছি। তোমার অভ্যাস নাই—এই রাত্রি জাগরণ—এই উদ্বেগ—শেষে অস্থখে পড়িবে?” কিন্তু তাহার কোন প্রয়োজন ছিল না। অল্প কোন কাজের অভাবে স্নানিলের তীক্ষ্ণ দৃষ্টি গৌরীর ভাব লক্ষ্য করিত। সে লক্ষ্য করিত—আর ভাবিত।

ক্রমে তাহার মনে হইতে লাগিল—তাহার বেদনাতপ্ত হৃদয় যেন স্নিগ্ধ হইয়া আসিতেছে। সে ভাবিল, পুরাতন ক্ষতমুখে শোণিত-ধারা নির্গত হইয়া তাহার হৃদয় প্রাবিত করিতেছে। কিন্তু সে ভাল করিয়া দেখিয়া বুঝিল—তাহা নহে; তাহার বহু চেষ্টায় রক্ত-মুখ ভালবাসার উৎস আবার উৎসারিত হইতেছে—সে তাহারই স্নিগ্ধ সলিলের সঞ্চায় অনুভব করিতেছে। সে ভয় পাইল। দেহ দুর্বল—মনও দুর্বল। যদি সে সে ধারার মুখ রক্ত করিতে না পারে?

দশ দিনের মধ্যে সুশীল অনেকটা সুস্থ হইল—আর তেমন সেবার প্রয়োজন রহিল না, তবে সুধীরের নির্দেশক্রমে একজন করিয়া তাহার কাছে থাকিবার ব্যবস্থা হইল—যদি কোন দরকার হয়। বিশেষ কোন দরকার হইত না—কেন না, সুশীল স্বভাবতঃ সেবাগ্রহণে অনিচ্ছুক ছিল। তাই সে জিন করিতে লাগিল, সকলে কলিকাতার ফিরিয়া যাইবেন। দাদার কাজের ক্ষতি হইতেছে—সুধীরের পক্ষে এ সময় কর্মস্থল ছাড়িয়া থাকা অকর্তব্য—বাড়ীতে কেহ নাই—এইরূপ নানা যুক্তি সে দিতে লাগিল। শেষে মা বলিলেন, “ভাল তোম দাদা, দিদি আর সুধীর ফিরিয়া যাউক—আমি আর ছোট বোমা থাকি।” সুশীল কিছুতেই সন্মত হইল না। মাও যাইতে সন্মত হইলেন না।

সুশীল সর্বপ্রথমে গৌরীর প্রতি তাহার প্রবল ভালবাসা অতিক্রম করিবার ব্যর্থ চেষ্টা করিতে লাগিল। কাজেই গৌরীর সেবা সে তাহার প্রাপ্য বিবেচনা না করিয়া সেজন্য কৃতজ্ঞতার

ভাণ করিতে লাগিল—আপনাকে আপনি বুঝাইয়া প্রতারিত করিতে প্রয়াস পাইল। সে গৌরীকে বলিল, “তুমি ফিরিয়া বাইবার পূর্বে তোমাকে আমার একটা কথা বলিবার আছে। তুমি আমার অসময়ে যে সেবাশ্রয় করিয়াছ, সে জন্ত আমি তোমার কাছে চিরকৃতজ্ঞ রহিব। আমার জন্ত এত কষ্ট করিবার কোনও প্রয়োজন ছিল না।”

এত দিন সুশীল যে তাহার সঙ্গে কোন কথা কহে নাই, তাহাতে গৌরীর দুঃখ হয় নাই; বরং সে যে সেবা করিতে পাইয়াছে—তাহাতেই সে পরম তৃপ্তি অনুভব করিতেছিল। আজ সুশীলের কথায় তাহার সকল বেদনা নুতন হইয়া উঠিল—তবে সে স্বামীর কাছে বত দূরে ছিল—তত দূরেই রহিয়াছে! তাহার আশার ঝালুর ঘর সেই কথার তরঙ্গে অদৃশ্য হইয়া গেল। সে কি বলিবে ভাবিয়া পাইল না; শেষে বহু চেষ্টায় বলিল, “মা বলিতেছেন, আমি এখন বাইব না।” তাহার কথা যেন দূরগত—গ্রামো-ফোনের কথার মত—তাহা অস্বাভাবিক ও ঈষৎ কল্পিত।

সুশীলের তार्কিক বুদ্ধি ছিল ধরিবার জন্ত প্রস্তুত হইয়াই ছিল। লজ্জা যে গৌরীকে বলিতে দেয় নাই—“আমি বাইব না—আমাকে আর ফিরাইয়া দিও না”—তাহার কথায় গৌরী যে সে কথা বলিতে আরও সঙ্কোচ বোধ করিয়াছে, সুশীল তাহা বুঝিল না। “মা বলিয়াছেন”—তবে গৌরীর আকাঙ্ক্ষার ত কোন পরিচর নাই! সে যে তাহার মতের পরিবর্তন করিয়াছে তাহার প্রমাণ কি?

সুশীল ভাবিতে লাগিল, বহুদিন পূর্বে শ্রুত একটা গল্প তাহার মনে পড়িল—এক গৃহস্থের সঙ্গে এক সর্পের বন্ধুত্ব জন্মিয়াছিল। গৃহস্থ প্রতিদিন সন্ধ্যাকালে দুধ লইয়া বিবরের কাছে বাইরা ডাকিলে সর্প আসিয়া সেই দুধ পান করিত এবং প্রতিদানে একটা মোহর দিত। এই ব্যবস্থার গৃহস্থ বিশেষ উপকৃত হইত। কিছু দিন পরে কস্তার বিবাহের সম্বন্ধ করিতে গৃহস্থকে গ্রামান্তরে যাইতে হইল। বাইবার সময় সে পুত্রকে সব কথা বলিয়া সর্পের জন্য দুধ লইয়া যাইতে ও মোহর আনিতে বলিয়া গেল। বুদ্ধিমান পুত্র পিতার ব্যবস্থা ভাল নহে মনে করিয়া স্থির করিল, সর্পকে মারিয়া তাহার বিবর হইতে সব মোহর এক দিনে আনিবে। সন্ধ্যাকালে সর্প দুধপান করিতে আসিলে বালক তাহাকে লগুড়াঘাত করিল। কিন্তু আঘাত সর্পের মস্তকে না লাগিয়া কোমরে লাগিল—সর্প ফিরিয়া বালককে দংশন করিল—তাহাতেই বালকের মৃত্যু হইল। গৃহে ফিরিয়া গৃহস্থ সব শুনিল—বালকের জন্য বিলাপ করিল এবং সন্ধ্যাকালে যথাপূর্ব্ব দুধ লইয়া বাইরা সর্পকে আহ্বান করিল। সর্প গর্তের বাহিরে আসিয়া বলিল, ‘তোমার সহিত আর আমার পূর্ব্বের সম্বন্ধ থাকিতে পারে না। তুমিও পুত্রশোক বিস্থিত হইতে পারিবে না—আমিও আঘাত বেদনা ভুলিতে পারিব না।’ বহুক্ষণ চিন্তা করিয়া সুশীল বলিল, “মা বাহা বলিয়াছেন, তাহা হইবে না। গত ছই বৎসরের স্মৃতি তুমি মুছিয়া ফেলিতে পারিবে না। স্মরণ্য পূর্ব্বের ব্যবহার আর কাজ নাই।”

গৌরীর মনের মধ্যে যে কথা ফুটিয়া বাহির হইবার জন্ত তাহাকে পীড়িত করিতেছিল—মুখে সে কথা বাহির হইল না। সে বলিতে পারিল না—তোমাকে আমি কেমন করিয়া বুঝাইব—অনুতাপের, আত্মগ্লানির অনলে আমার অতীত—আমার ভুল পুড়িয়া ছাই হইয়া গিয়াছে; আমার ভবিষ্যৎ তোমার—তুমি তোমার প্রেমে তাহা ধ্বংস কর। তোমার প্রেম-মন্দাকিনীর ধারা ব্যতীত আমার দগ্ধ আশার উদ্ধার সাধিত হইবে না। আমাকে ভুল বুঝিও না—আমাকে ফিরাইও না। তোমার ভালবাসা ছাড়া আমার কামনার ও সাধনার আর কিছুই নাই। তুমি আমাকে অবসর দাও—আমি আমার ভালবাসা দিয়া তোমার স্থান চিহ্ন মুছিয়া দিব।

গৌরী কোন কথা বলিতে পারিল না। তাহার বক্ষের বেদনা এমনই অসহ্য বলিয়া মনে হইতে লাগিল যে, তাহার মনে হইতে লাগিল—সে আর রোদন সংবরণ করিতে পারিবে না। সে উঠিয়া চলিয়া গেল—বারান্দার বাইরা আকাশের দিকে চাহিয়া নিরাশার দীর্ঘশ্বাস ফেলিল। তাহার হৃদয় চকুতে অশ্রুর উৎস উথলিয়া উঠিল।

স্বামীর কাজের সত্যসত্যই ক্ষতি হইতেছিল। তাই তাহাকে বাইতে হইল। সুখীর কিছুতেই গেল না; বলিল, “কত কষ্টে একটি জ্বর রোগী পাইয়াছি—আমি কি ছাড়িয়া বাইতে পারি?” স্বামীর সঙ্গে দ্বিধা গেলেন। স্বামীর ও গৌরীর অবস্থানে সুখীল তখন আর তত আপত্তি করিল না। তাহার কারণ, সে বিদীর

প্রত্যাবর্তনের জন্তই বিশেষ ব্যস্ত হইয়াছিল। মা'র দৌর্য্য সে জানিত—তিনি ছেলেদের কথার বিরুদ্ধে জিদ করিতে পারেন না। কিন্তু দিদির সঙ্গে তর্কে তাহার ভয় ছিল। সে যাহাই কেন বলুক না, তর্কে তাহার পরাভবের সম্ভাবনা তাহার অবিদিত ছিল না।

দাদার ও দিদির যাইবার কয় দিন পরেই সে বলিল, “মা, আমি দিন কতক পাহাড়ে বেড়াইয়া আসি। শরীর শীঘ্রই সুস্থ হইবে।” মা বলিলেন, “বাড়ী চল।” সুশীল পাহাড়ে যাইবার সুবিধা বিশেষ করিয়া বুঝাইয়া দিল। মা বুঝিলেন, সে তাঁহাদের ফিরাইয়া দিতেই ব্যস্ত। কিন্তু বুঝিয়াও বিশেষ কিছু বলিতে পারিলেন না—সে স্বাস্থ্যলাভের জন্ত যাইতে চাহিতেছে, তিনি কি আপত্তি করিতে পারেন? সুধীর একবার বলিল, “ডাক্তারের সঙ্গে থাকা দরকার।” কিন্তু সে রহস্ত করিয়া।

তাহার পর সুশীল বড় দ্রুত তাহার পাহাড়ে যাইবার—অর্থাৎ মা'র ও গৌরীর কলিকাতার ফিরিবার দিন নির্দ্ধারিত করিয়া ফেলিল। তত তাড়াতাড়ির জন্ত মা—প্রস্তুত ছিলেন না।

ফিরিবার দিদি গৌরী তাহার ঠাকুরমা'র এক পত্র পাইল। গৌরী যে সুশীলের কাছে থাকিল, সেই সংবাদ পাইয়া তিনি লিখিয়াছেন :—

“এই সংবাদে যে কত আনন্দ পাইলাম, তাহা আর কি বলিব। বিশ্বের এত দিনে সুখ তুলিয়া চাহিয়াছেন। আমাদের

পদে অপরাধ—আমরা অপরাধ করিতেই জন্মগ্রহণ করি।
কথায় বলে—

‘পুড়ে মেয়ে উড়ে ছাই

তবে মেয়ের গুণ গাই।’

অপরাধ স্বীকার করিয়া লইয়া সুশীলের সঙ্গে এমন ব্যবহার
করিও যে ইহার পর এক দিন তোমার উপর রাগ করিয়াছিল
বলিয়া সে যেন লজ্জা পায়। কিন্তু এই আনন্দে যেন ঠাকুরমা’কে
ভুলিয়া যাইও না। তোমাদের সব সংবাদ পূর্বের মত আমাকে
দিও। মরিবার পূর্বে একবার সুশীলকে আর তোমাকে দেখিতে
যাইব—আশা করিয়া আছি।”

ফিরিবার সময় ট্রেনে বসিয়া গৌরী সেই পত্রের কথা ভাবিল।
তাহার ব্যর্থ জীবনের বেদনা যেন আর সহ করা যায় না। আর
সেই মেহশীলা ঠাকুরমা—তিনি এ সংবাদে কত কষ্টই পাইবেন।
সে কেমন করিয়া তাহার কাছে মুখ দেখাইবে? গৌরীর মনে
হইতে লাগিল, তাহার পক্ষে জীবনের আলো নিবিয়া গিয়াছে—
সে নিরাশার অন্ধকারে কেবল হৃৎকের পথেই অগ্রসর হইতেছে।

বিধাত্রী দেবী গৌরীর প্রত্যাবর্তনের সংবাদ পাইলেন; গৌরীকে লিখিলেন, “আমি এ ব্যাপারটা ভাল বুঝিতে পারিলাম না। তোমার এ হুঃখ ত আর সহ্য করিতে পারি না। আমি কলিকাতায় বাইতেছি—সেই পথে একবার শুলীলকে দেখিতে যাইব। রমা অনেক দিন হইতে একবার আমার কাছে আসিতে চাহিতেছে। পড়ার ক্ষতি হইবে বলিয়া আমি বারণ করিয়াছি; তাই আমার উপর রাগ করিয়াছে। আজ তাহাকে লিখিয়া দিলাম—সে আসিয়া আমাকে লইয়া যাইবে।”

পত্র পাইয়া গৌরী লিখিল, “আপনার আর সেখানে বাইরা কাজ নাই। আমার অদৃষ্ট মন্দ—নহিলে মন্দিরের পূজারী হইয়াও দেবসেবার অধিকারে বঞ্চিত হইব কেন? নহিলে—যিনি পরের হুঃখ সহ্য করিতে পারেন না, তিনি কি কেবল আমার হুঃখ বুঝিতেই অসমর্থ হইতেন? সেবা করিবার অধিকার—সে অধিকারেও আমি বঞ্চিত হইয়াছি—আমার আর আশার অবকাশ নাই।”

এদিকে ঠাকুরমা’র পত্র পাইয়াই রমা ছুটিয়া মা’র কাছে গেল,—“আমি আজ চলিলাম।” মা জিজ্ঞাসা করিলেন, “কোথায় রে?” রমা বলিল, “ঠাকুরমা দিদিকে দেখিতে আসিবেন (আমাকে নহে) তাই আমাকে বাইরা তাহাকে লইয়া আসিতে লিখিয়াছেন। আমি বাইরা খুব ঝগড়া করিব।”

মা তাহার কাপড় প্রভৃতি গুছাইয়া দিতে প্রবৃত্ত হইলে রমা বলিল, “একটা হাতব্যাগে দুইখানা কাপড় আর একটা জামা দাও। আর কিছু দিতে হইবে না।” মা বলিলেন, “অমন করিয়া যাইলে তিনি রাগ করিবেন।” ঠাকুরমা তাহার উপর রাগ করিবেন, এই অসম্ভব কল্পনার রমার এমনই কৌতুক বোধ হইতে লাগিল যে সে যাইবার সময় ব্যাগটি ফেলিয়া গেল। তাহার টেলিগ্রাম পাইয়া সরকার ষ্টেশনে উপস্থিত ছিল। রমা নামিলে সে জিজ্ঞাসা করিল, “জিনিসপত্র কোথায়?” রমা উত্তর দিল, “জিনিসপত্রের মধ্যে আমি।” সরকার যাইয়া বিধাত্রী দেবীকে জানাইল—“বাবু একবস্ত্রে আসিয়াছেন—সঙ্গে কোন জিনিস আনেন নাই।” বিধাত্রী দেবী বলিলেন, “ভালই করিয়াছে—ছেলেমানুষ জিনিসপত্র লইয়া কি আসিতে পারে?” তিনি তাহার জন্ত বস্ত্রাদি আনিতে দিলেন; রমাকে বলিলেন, “আমি তোরা একপ্রস্থ কাপড়চোপড় এখানে রাখিব; আসিলে কোন অমুবিধায় পড়িবি না।” রমা খুব হাসিয়া বলিল, “তুমি সব মাটি করিলে। মা বলিয়াছিলেন, আমি অনেক কাপড়চোপড় না আনিলে তুমি রাগ করিবে। তাই—তুমি আমার উপর কেমন রাগ করিতে পার দেখিবার জন্ত আমি ব্যাগটা ইচ্ছা করিয়া ফেলিয়া আসিয়াছি। অথচ তুমি মোটেই রাগ করিলে না!” বিধাত্রী দেবীও হাসিলেন। তিনি বলিলেন, “এবার রাগ করিলাম না বটে; কিন্তু যখন বৌ লইয়া আসিবি তখন যদি এমন ভাবে আসিস্ তবে খুব রাগ করিব; বৌদিদিকে তোরা কাণ দিয়া দিতে বলিবি।”

পরদিন বিধাত্রী দেবী কলিকাতায় যাত্রা করিলেন।

কলিকাতায় আসিয়া বিধাত্রী দেবী গৌরীর কাছে সব কথা শুনিলেন; বলিলেন, “দিদিমণি, তবুও মুখ ফুটিয়া মনের কথা বলিতে পার নাই? ভাল—আমিই বলিব।”

গৌরী বলিল, “তুমি আবার যাইবে?”

“যাইব বই কি, দিদিমণি? আমি কি স্থির থাকিতে পারিতেছি?”

গৌরীর প্রতি দিদির স্নেহের কথা গৌরী ঠাকুরমা’কে বলিয়াছিল। তিনি এ সম্বন্ধে দিদির সঙ্গেও পরামর্শ করিলেন। সুশীল যে ভাবে পুনঃপুনঃ মা’কে ফিরাইয়াছিল, তাহাতে এবং গৌরীর প্রতি তাহার ব্যবহারে দিদি বড় ব্যথা পাইয়াছিলেন। এবার মা’কে ও গৌরীকে সুশীলের কাছে রাখিয়া ফিরিবার সময় তিনি মনে করিয়াছিলেন, গৌরীর যে অক্লান্ত সেবায় তিনি মুগ্ধ হইয়াছিলেন—অন্ততঃ তাহাতে সুশীলের মত পরিবর্তিত হইবে। গৌরীর এক দিনের কথার ভুল যে ক্ষমার অযোগ্য তাহা তিনি কল্পনাও করিতে পারিতেন না। তাহার পর তাঁহার আশঙ্কা ছিল, পাছে ছেলেকে হারাইয়া গৌরীর প্রতি মা’র মনে বিরক্তির বা বিদ্বেষের সঞ্চার হয়। এই সব মনে করিয়া দিদিও ভাবিতে-ছিলেন, তিনি একবার সুশীলকে বুঝাইয়া দেখিবার চেষ্টা করিবেন। সুতরাং বিধাত্রী দেবী যখন বলিলেন, তিনি সুশীলের কাছে যাইবেন, তখন তিনিও বলিলেন, তিনি যাইবেন। বিধাত্রী দেবী হাসিয়া বলিলেন, “ভালই হইল—‘একা না বোকা’। আমায়

হই বহিন এক হইলে স্মৃশীলকে হারি মানিতেই হইবে।” তিনি একটা বাগা ঠিক করিবার জন্য লোক পাল্টাইলেন ; কিন্তু বলিয়া দিলেন, স্মৃশীল কোন সংবাদ না পায়। তিনি পাহাড় হইতে স্মৃশীলের প্রত্যাবর্তনের জন্য অপেক্ষা করিতে লাগিলেন। অধিক দিন অপেক্ষা করিতে হইল না। কেন না, পাহাড়ে একা স্মৃশীলের ভাল লাগিল না। তথায় কোন কাজ নাই—সুতরাং কেবল ভাবনা—স্মৃশীল আপনার ভাবনার তাড়না হইতে উদ্ধার পাইবার আশায় কর্মস্থলে ফিরিয়া আসিল। সে সংবাদ পাইয়াই বিধাতী দেবী দিদির লইয়া যাত্রা করিলেন।

উভয়ে ষ্টেশন হইতে বরাবর স্মৃশীলের বাসায় গেলেন। স্মৃশীল তখন মক্কেলের কাগজ দেখিতেছিল। ভৃত্য বাইরে সংবাদ দিল—কলিকাতা হইতে “মাজী” আসিয়াছেন। বিধাতী হইয়া সে বাহিরে আসিল—দেখিল, বিধাতী দেবী ও দিদি গাছের তলে বসিয়া আছেন। উভয়কে প্রণাম করিয়া স্মৃশীল দিদির কাছে আসিয়া বসিল, “দিদি, তুমি ?” দিদি প্রথম হইতেই যুদ্ধের ভাব লইয়া, “হ্যাঁ—ভাই, আমি আসিয়াছি। তবে তুমি ভয় পাইও না, তোমাকে বিব্রত করিব না ; ঠাকুরমা’র সঙ্গে আসিয়াছি। কেবল তোমাকে একটা কথা বলিব—কখন তোমার অবসর হইবে জানিয়া বাইব।”

বিধাতী দেবী বলিলেন, “আমরা বাসায় বাইতেছি—তুমি বিব্রহরে আসিয়া তথায় আহার করিও।”

স্মৃশীল বলিল, “আপনাকেও আমার বাসায় নামিতে বলিতে পারি কি ?”

“জান ত, দাদা, আমাদের অনেক হাঙ্গামা। বাসার সব ঠিক আছে। তুমি আসিও।” তাঁহার আদেশে কন্ঠচরী বাসার ঠিকানা বলিল।

শুশীল বলিল, “আমায় আদালতে যাইতে হইবে।”

বিধাত্রী দেবী কোন কথা বলিবার পূর্বেই দিদি বলিলেন, “ভাল—যখন তোমার আদালতই বড়, তখন তুমি আদালতেই যাইও। আমার কথায় টাকা পাইবার সম্ভাবনা নাই; শুনিবার অবসর হইবে কি? যখন অবসর হয়, আমি তখনই আসিব।”

“তুমি নামিবে না?”

“না।”

শুশীল দেখিল আর এড়াইবার উপায় নাই। সে বলিল, “আমি মধ্যাহ্নেই যাইব।”

দিদি আর কোন কথা বলিলেন না।

বিধাত্রী দেবী বলিলেন, “তবে আমরা এখন আসি।”

গাড়ী চলিয়া গেলে শুশীল যাইয়া মক্কেলের কাগজ দেখিতে বসিল; চিত্ত এমনই চঞ্চল যে মনোনিবেশ করিতে পারিল না, বলিল, “আজ আমার কাজ আছে, কাল কাগজ দেখিব।”

মক্কেলকে বিদায় দিয়া সে মুহূর্ত্তকে ডাকিয়া বলিল, “আজ আমি আদালতে যাইব না; আজ সকালে আর কাহারও কাগজও দেখিব না।” সে ভাবিতে লাগিল। কিন্তু আজ ভাবিয়া কর্তব্য সম্বন্ধে কোন সিদ্ধান্তেই উপনীত হইতে পারিল না। শেষে সে স্থির করিল, অবস্থা বুঝিয়া যে হয় ব্যবস্থা করিবে।

যথাকালে চিন্তাকুলহৃদয়ে স্মৃশীল বিধাত্রী দেবীর বাসার বাইরা উপস্থিত হইল।

তাহার আহার শেষ হইলে বিধাত্রী দেবী বলিলেন, “আমার একটা কথা তোমাকে রাখিতে হইবে।”

সে কথা কি বুঝিতে স্মৃশীলের বিলম্ব হইল না। সে বলিল, “আপনি কেন আবার আসিলেন?”

বিধাত্রী দেবী বলিলেন, “কেন আসিলাম, সেই কথাই তোমাকে বলিব। রমা-গৌরীর শুভাশুভ বাহার দেখিবার সে থাকিলে আমি আসিতাম না। কাশীবাসী হইয়া কাশী ছাড়িয়া আসা মহাপাপী নহিলে কাহাকেও করিতে হয় না। আমাকে তাহাই করিতে হইতেছে। কিন্তু কি করিব? গৌরীর এ হুঃখ দেখিয়া আমি সে কাশীতেও শাস্তিতে মরিতে পারিব না! তাহার পর তাহার এই পত্র পাইয়া আমি কি স্থির থাকিতে পারি?” তিনি অঞ্চলে বহু গৌরীর শেষ পত্র লইয়া স্মৃশীলকে দিলেন।

স্মৃশীল পত্রখানি পড়িল; কিন্তু তাঁহাকে ফিরাইয়া না দিয়া ভুলিয়া আপনার পকেটে রাখিল। বিধাত্রী দেবী ভাবিলেন, ভালই হইল।

তাহার পর তিনি বলিলেন, “আমি জ্বীলোক—তুমি পুরুষ, বিদ্বান্, বুদ্ধিমান—তোমার সঙ্গে তর্ক করিব এমন যোগ্যতা আমার নাই। তাহাতে আমাদের অধিকারও নাই। আমাদের অধিকার ঘেহ দিতে, সেবা করিতে, অনুরোধ বা অনুন্নয় করিতে। আমার অনুরোধ—তুমি বাড়ীতে ফিরিয়া চল। গৌরী অপরাধ করিয়াছে

কি না—করিয়া থাকিলে তাহা উপেক্ষার যোগ্য কি না, তাহার বিচার আমি করিতে পারি না। কেন না, তাহার দোষও আমি উপেক্ষাই করিব। কিন্তু সে যদি এমন অপরাধই করিয়া থাকে যে তুমি—তাহার স্বামী, তাহার ইহকাল পরকালের জন্ত দায়ী—তাহা ক্ষমা করিতে পার না, তবে আমি তাহা ক্ষমা করিতে বলিতে পারি না। ক্ষমা অনুরোধে হয় না—আপনার মন না বুঝিলে আর কেহ বুঝাইয়া ক্ষমা করাইতে পারে না। আমার অনুরোধ—তুমি এমন করিয়া আপনি কষ্ট পাইও না—তোমার মা'কে, দিদি'কে—সকলকে কষ্ট দিও না—বাড়ী ফিরিয়া চল। আমার আর কোন কথা নাই। আশীর্বাদ করি, চিরশুখী হও।”

সুশীল কোন উত্তর দিল না—ভাবিতে লাগিল।

সে দিদি'কে বলিল, “দিদি, তুমি কি বলিবে বলিতেছিলে?”

বিধাত্রী দেবী বলিলেন, “এখনও দিদির আমার খাওয়া হয় নাই—গত দিন ত রেলের গিয়াছে।”

সুশীল লজ্জিত হইয়া বলিল, “আমি অপেক্ষা করিতেছি।”

দিদি বলিলেন, “তোমার কি কোন বিশেষ কাজ—আদালতের কাজ আছে?”

সুশীল বলিল, “না।”

“তবে তুমি এখন বাসায় যাইবে?”

“হঁ।”

“তুমি বাসায় যাও—আমি সেখানে যাইব। তুমি, সম্বন্ধ হিঁড়িতে চাহিলেও আমি বলিব—তুমি আমার ভাই। তোমাকে

আমার যাহা বলিবার তাহা আমি হয় তোমার বাড়ী—নহে ত আমার বাড়ী বলিতে পারি। আমি তোমার বাসায় যাইব।
—তুমি যাও।”

“আমি যাইয়া ঘণ্টাখানিক পরে গাড়ী পাঠাইয়া দিব”—বলিয়া
শুশীল বিদায় লইল।

গাড়ীতে বসিয়া শুশীল পকেট হইতে গোরুর পত্র বাহির করিল
—বার বার পড়িল। তবে কি সে ভুল বুঝিয়াছে? এতদিন এক-
বারও তাহার মনে হয় নাই—সে হয় ত ভুল বুঝিয়াছে। আজ
তাহাই মনে হইল; চিন্তার স্রোত প্রবাহিত হইবার নূতন পথ
পাইল। তাহার পর বিধাত্রী দেবীর কথা—সে কথার যুক্তি সে
কেমন করিয়া খণ্ডন করিবে? মা’র প্রতি, দিদির প্রতি, দাদার
প্রতি, ভাগিনেয়-ভাগিনেয়ীদিগের প্রতি তাহার কর্তব্যে কি টাকা
ছাড়া আর কিছুই নাই? যে অর্থ সে তুচ্ছ বলিয়া মনে করিয়াছে—
যে অর্থের গর্ভেই গোরুর প্রতি তাহার বিরক্তির কারণ—সেই অর্থ
দিয়ে সে ত স্নেহ-ভালবাসার ঋণ শোধ করিবার চেষ্টা করিতেছে!
আপনার ব্যবহারে পরস্পর বিরোধ দেখিয়া লজ্জিত হইল। যে
বিচার-বুদ্ধিতে তাহার অবিপ্রত্যয়ে সে কখন সন্দেহ করিতে পারে
নাই—সেই বিচার-বুদ্ধিতে তাহার বিশ্বাস বিচলিত হইল। আর
কেবলই তাহার মনে হইতে লাগিল—গোরুর ভুল কি এমন কঠোর
শাস্তিরই উপযুক্ত? তাহার যুক্তিতর্কের ভারকেন্দ্র সরিয়া গেল—
সব নূতন করিয়া ভাবিয়া দেখা প্রয়োজন হইল। যদি সেই ভুল করিয়া
থাকে? তবে সে ভুল সংশোধন করিবার সাহস তাহার থাকিবে ত?

যখন সে এইরূপ নানা ভাবনায় বিচলিত হইতেছিল, তখন দিদি আসিয়া উপস্থিত হইলেন। সুশীল টেবলের কাছে চেয়ারে বসিয়া ভাবিতেছিল। দিদি আর একখানা চেয়ার টানিয়া লইয়া টেবলের অপর দিকে সুশীলের ঠিক সম্মুখে বসিলেন।

কিছুক্ষণ দুই জনের কেহই কথা কহিলেন না। সুশীলের মনে ভয় হইতে লাগিল—এ স্তব্ধতা ঝটিকার পূর্বলক্ষণ। তাহার হৃদয়েও ঝড় বহিতেছিল।

দিদিই প্রথম কথা পাড়িলেন, “এখন তোমার আমার কথা শুনিবার অবসর হইবে কি?”

সুশীল প্রথমেই নত হইল, “দিদি, তুমি আমার সঙ্গে এমন ভাবে কথা কহিতেছ কেন?”

সুশীলের কথার কাতরতায় দিদির স্নেহ উখলিয়া উঠিতেছিল। কিন্তু তিনি আজ প্রস্তুত হইয়া আসিয়াছিলেন। তিনি দৃঢ় হইয়া বলিলেন, “সেই কথাই বলিতে আসিয়াছি।”

তাহার পর দিদি বলিলেন, “তোমার ব্যবহারে সংসারে আমার বিতৃষ্ণা জন্মিয়াছে। আমার আর সংসারে থাকিতে ইচ্ছা নাই। সুধীর তাহার সংসারের ভার বুঝিয়া লউক—আমি বিদায় লই।”

“আমি কি করিয়াছি, দিদি?”

“তুমি কি করিয়াছ! আমার দুই ভাইকে লইয়া আমার বড় গৰ্ব্ব ছিল। তুমি সে গৰ্ব্ব চূর্ণ করিয়া দিয়াছ। বিজ্ঞান—শিক্ষা—বুদ্ধিতে যে শ্রদ্ধাভক্তি আমি বাবার কাছে ও স্বামীর

কাছে লাভ করিয়াছিলাম তাহা তোমার ব্যবহারে নষ্ট হইয়াছে। তুমি বিদ্বান্, তুমি বুদ্ধিমান্, তুমি সুশিক্ষিত—কিন্তু তোমার ব্যবহারের বিষয় একবার বিচার করিয়া দেখিয়াছ কি? তুমি তোমার স্ত্রীর—বালিকার একটা সামান্য কথার ত্রুটি ক্ষমা করিতে পার না। যে ভালবাসায় ক্ষমা করিবার যোগ্যতাও নাই—সে ভালবাসা কি ভালবাসা? তুমি তাহার দণ্ডের ব্যবস্থা করিয়াছ—স্বামী না হইয়া বিচারক হইয়াছ। কিন্তু একবার বুঝিতে পারিয়াছ কি—সে দণ্ড কে ভোগ করিতেছে? সে দণ্ড ভোগ করিতেছ তুমি—আর ভোগ করিতেছেন তোমার মা। তাঁহার অপরাধ—তিনি তোমার মা, তোমার প্রতি তাঁহার স্নেহ বিচারবুদ্ধি বিচলিত বা বিকৃত করিতে পারে না। তুমি আপনার সুখের জন্য এত ব্যস্ত যে, যে মা'র তোমরা ছাড়া স্নেহের অন্য অবলম্বন নাই, সেই মা'কে কাঁদাইতেছ। অথচ যে বুদ্ধির গর্বে তুমি গর্ভিত সেই বুদ্ধির দোষে বুঝিতে পারিতেছ না, যাহা তুমি সুখ বলিয়া মনে করিতেছ—তাহা দুঃখ ব্যতীত আর কিছুই নহে; বুঝিতে পারিতেছ না—তুমি মৃগতৃষ্ণিকার মোহিত হইয়াছ! তুমি আপনার জিদই এত বড় মনে কর যে, সুধীরের বিবাহে উপস্থিত হইবার জন্য আমার অনুরোধও রাখ নাই!”

দিদির চক্ষু অশ্রুতে পূর্ণ হইয়া আসিতেছিল—তাঁহার কণ্ঠস্বর বেদনায় কম্পিত হইতেছিল। এদিকে তাঁহার ভীত তিরস্কারে শূন্যের মন্তক ক্রমে নত হইতেছিল। সে আর তাঁহার মুখের দিকে চাহিতে পারিতেছিল না।

অঞ্চলে চক্ষু মুছিয়া দিদি বলিলেন, “আমার আক্ষেপ, তোমার স্বভাবের এই পরিচয় আমি পূর্বে পাই নাই। পাইলে, দুর্দশায় পড়িয়া—তোমাদের গলগ্রহ হইয়া—তোমাদের আশ্রয় লইতাম না। তখন বুঝিতে পারি নাই—বাবার সঙ্গে বাপের বাড়ীতে সব অধিকার গিয়াছে, মা’র স্নেহ কতাকে সে অধিকার দিতে পারিবে না। তখন মনে করিয়াছিলাম, তোমরা ভাই—আমি ভগিনী, তোমরাই আমার পিতৃহীন পুত্রকন্তার অভিভাবক। তখন স্নেহে বিশ্বাস করিয়াছিলাম। ভুল করিয়াছিলাম। তখন তোমার প্রকৃতি-পরিচয় পাইলে, আমি কখন সুধীরকে তোমার অর্থ সাহায্য লইতে দিতাম না। আজ আমি কেমন করিয়া তাহাকে সেই স্নেহশূন্য—দয়াদন্ত সাহায্যের অপমান হইতে মুক্ত করিব? আমি তাহার মা হইয়া তাহার এই অপমানবেদনার কারণ হইয়াছি। এই দুঃখ যে আমি কিছুই ভুলিতে পারি না!”

সুশীলের মস্তক নত হইয়া টেবলের উপর পড়িল। দিদির কথায় দারুণ বেদনা তাহার স্নৈর্য্য, ধৈর্য্য, দৃঢ়তা—সব নষ্ট করিয়াছিল। প্রবল বাতায় সাগরসলিলের মত তাহার হৃদয় তীব্র যাতনায় চঞ্চল হইয়া উঠিয়াছিল। সে আর আপনাকে সংযত রাখিতে পারিল না।

সুশীল যখন মুখ তুলিল, তখন তাহার হই চক্ষু ছাপাইয়া—
হুই গগু বহিয়া অশ্রু বরিতেছে—তাহার মুখভারে বেদনা ফুটিয়া উঠিয়াছে।

দিদিও কাদিতেছিলেন।

মুশীল বলিল, “দিদি, আজ ছেলেবেলার এক দিনের কথা আমার মনে পড়িতেছে। আমরা তিন ভাই ভগিনী এক দিন বাবার সঙ্গে বেড়াইতে গিয়াছিলাম। বাবা আমাদের লইয়া বাজারে খেলানার দোকানে গিয়াছিলেন। তুমি সকলের বড়। বাবা তোমাকে একটা খেলানা পসন্দ করিতে বলিয়াছিলেন। তুমি বাছিয়া লইয়াছিলে। সেটা মূল্যবান। তোমার হাত হইতে আমি তাহা দেখিতে লই। আমার হাত হইতে সেটা পড়িয়া ভাঙ্গিয়া যায়। বাবা বিরক্ত হইয়া বলেন, আমি সে দিন কোন খেলানা পাইব না; আমার খেলানার বদলে তিনি তোমাকে আর একটা খেলানা কিনিয়া দিবে। তাহা শুনিয়া তুমি বলিয়াছিলে—‘ও ইচ্ছা করিয়া ফেলিয়া দেব মাই। আমার আর খেলানা চাহি না—উহাকে দিউন।’ সেদিন যেমন প্রসন্নচিত্তে তুমি তোমার ছোট ভাইটীর অপরাধ ক্ষমা করিয়াছিলে, আজ তেমনই প্রসন্নচিত্তে তাহার সকল অপরাধ ক্ষমা কর। সে দিন যেমন স্নেহে তুমি আমাকে দাবাধিকার হইতে রক্ষা করিয়াছিলে আজ তেমনই স্নেহে আমাকে আমার বুদ্ধি-বিবেচনার হাত হইতে রক্ষা কর। তোমার সকল বুদ্ধিতে যে পথ আমার কর্তব্য-পথ বলিয়া বিবেচিত হয়, তোমার হাত ভাইকে হাতে ধরিয়া সেই পথে লইয়া যাও।”

দিদির স্নেহ উথলিয়া উঠিল। তিনি ধোলাইয়া বাসিন্দা লাগিলেন।

স্থির হইয়া দিদি বলিলেন, “বাড়ী চল। তোমার গুড়াইয়া লইতে যে কয় দিন লাগে, আমি তোমার কাছে থাকিব।”

তাহার পর দিদি বিধাত্রী দেবীকে সংবাদ দিতে গেলেন।

বিধাত্রী দেবী গোরীকে লিখিলেন, “আমার ফিরিতে কয় দিন বিলম্ব হইবে। কারণ, তোমার হারানিধি কুড়াইয়া পাইয়াছি—অঞ্চলে বাঁধিয়া লইয়া যাইব।”

পর দিন দিদি সূশীলের বাসায় আসিলেন। তিনি জানিতেন, সূশীলের পক্ষে একটা দারুণ মানসিক সংগ্রাম আরম্ভ হইয়াছে, তাহার পক্ষে এখন তাহার কাছে থাকাই কর্তব্য। সূশীলও ভাবিল, ভালই হইল। মানুষের মনকে সে আর বিশ্বাস করিতে পারিতেছিল না। সে আর কর্তব্যাকর্তব্য স্থির করিতে পারিতেছিল না—সব যেন সংশয়ের কুজ্জাটিকায় অম্পষ্ট হইয়া গিয়াছিল।

দিদি বলিলেন, “এখন বাড়ী চল। সকলে বসিয়া বিবেচনা করিব—বদি তোমার এখানে আসাই ভাল বোধ হয়, আবার আসিও। বাসা এমনই থাকুক।”

পাছে তাহার মত পরিবর্তন হয়, সে ভয় দিদির ছিল।

* * * *

সাত দিন পরে কলিকাতায় ফিরিয়া বিধাত্রী দেবী গোরীকে বলিলেন, “দিদিমণি, আমরা দুই বসিবার পলাতক পাখী ধরিয়া আনিয়াছি। এবার বসিবার খুলিয়া রাখ, তবে কিন্তু আমরা আর ধরিতে পারি না।”

সুশীলের প্রত্যাবর্তনে গৃহে সকলেরই আনন্দের অবধি রহিল না। কিন্তু সুশীল আপনি সে আনন্দের অংশ গ্রহণ করিতে পারিল না। দিগ্বির তীব্র তিরস্কারে সে যে ভাবের উচ্ছ্বাসে তাঁহার উপর সম্পূর্ণ নির্ভর করিয়াছিল সে ভাবের উচ্ছ্বাস হইতে পাত্রে না। তাহা অপনীত হইতে না হইতে তাহার ক্ষমণে অসংশয়ের বালু বিস্তার লক্ষিত হইয়াছিল। সে ভাবিতে-
না, ভাল করিলাম ত? যে আগ্রহে সে দিগ্বির বিচারে নির্ভর করিয়াছিল,—সে আগ্রহের অবদানে আবার তাহার তাত্ত্বিক বুদ্ধি নানা তর্কের উদ্ভাবন করিতেছিল। সে নির্ভর করিয়া নিশ্চিত হইতে পারিতেছিল না। কিন্তু সে যে শান্তি ও দিগ্বির প্রতি আপনার কর্তব্যে অবহেলা করিয়াছিল, সে কথা সে বুঝিয়া-
ছিল। তাই সে আপনাকে আপনি খুঁসাইতেছিল, সে ফিরিয়া যদি কেবল সেই কর্তব্যচ্যুতির প্রায়শ্চিত্ত করিয়া থাকে, তবে সেও পরম সন্তোষ; সে কেন সেই লোভের দ্বারা বাকিতে পারিতেছে না? কিন্তু সে শান্তি লাভ করিতে পারিতেছিল না—কেন না, তর্কের শেষ হইতেছিল না।

দীর্ঘ দিন কাটিয়া গেল। সন্ধ্যাকালে সুশীল আপনার পরিচিত শরদককে বাইরা একখানা নূতন আইনের পুস্তক খুলিয়া বসিল। কিন্তু পাঠে তাঁহার বিরোধী মন আত্মনিয়োগ করিল না। কক্ষের সঙ্গে কত স্বর্জি বিজড়িত! এই কক্ষে শরদ

করিয়া সে ভবিষ্যতের কত স্বপ্ন দেখিয়াছে—কল্পনার তুলিকার
কত চিত্র অঙ্কিত করিয়াছে। তাহার মধ্যে সবই কি স্বপ্নমাত্র,
রহিয়া গিয়াছে? তাহা নহে। কিন্তু যে স্বপ্ন সকল হয় নাই—
তাহাই যে অনন্ত বেদনার কারণ। এই কক্ষে সে গৌরীর
ভালবাসার জীবন সুখময় ও সার্থক করিবার স্বপ্ন দেখিয়াছে।
হায়—সে স্বপ্ন! দোষ কি তাহার? সে কথা সে স্বীকার
করিতে পারে না। কিন্তু তাহার হৃদয়ভরা ভালবাসা তাহাই যে
তাহাকে পীড়িত করিতেছিল! সে যে বুঝিতে পারে নাই—
গৌরীর উপর তাহার বিরক্তি, বিরক্তি নহে—কেবল অভিমান।
তাহার ভালবাসা যে গৌরীর ‘অপরাধ’ অনেক দিনই মুছিয়া
দিয়াছে—তাহার বুদ্ধিই সে আঘাতের চিহ্ন স্থায়ী করিতে
প্রয়াস পাইয়াছে। গৌরী ক্ষমা চাহে নাই। কে বলিতে পারে?
ক্ষমা কি কেবল কথা কহিয়া চাহিতে হয়? সে যাক্কা কি
নয়নের কান্তর দৃষ্টিতে, সেবার আন্তরিকতার আত্মপ্রকাশ করিতে
পারে না? বিধাতী দেবীকে গৌরী যে পত্র লিখিয়াছিল, তাহা
সুশীলের কাছেই ছিল। এ কয় দিনে সে কতবারই সে পত্র
পাঠ করিয়াছে! সে পত্রখানি বাহির করিয়া আবার পাঠ করিল।
এই পত্রের ভাবে কি কেহ কোনরূপ সন্দেহ করিতে পারে?
বিধাতী দেবী বলিয়াছেন, গৌরীর এই পত্র পাইয়া তিনি স্থির
থাকিতে পারেন নাই। গৌরী তাঁহার ‘আপনার’। কিন্তু
গৌরী কি তাহার আরও ‘আপনার’ নহে? গৌরী কি তাহার
প্রোণ, শিকুর মহনোড়ূতা নহে? বিবাহাবধি সে ভবিষ্যতের যত

কল্পনাই করিয়াছে গোঁরী যে সে সকলেরই কেন্দ্র ছিল ! সে কি তাহাকে কেন্দ্রচ্যুত করিতে পারিয়াছে ? পারিলে সে যে শাস্তিলাভ করিতে পারিত। দিদি বলিয়াছেন, সে ভালবাসায় ক্ষমা করিবার যোগ্যতাও নাই, সে ভালবাসা ভালবাসাই নহে। তাহার ভালবাসা ত ক্ষমা করিতেই ব্যর্থ। কিন্তু—কিন্তু গোঁরী কি ভাবে তাহার ক্ষমা গ্রহণ করিবে ? সে কেমন করিয়া গোঁরীকে বুঝাইয়া দিবে, সে ক্ষমা করিল ?

সুশীল যখন এইরূপ চিন্তায় চঞ্চল হইতেছিল তখন গোঁরী কক্ষে প্রবেশ করিল। সেও সারা দিন ভাবিয়াছে—আজ তাহার ভবিষ্যৎ নির্দ্ধারিত হইবে। কিন্তু সে ভাবিয়া কিছু স্থির করিতে পারে নাই। তবে সে মনকে সান্ত্বনা দিয়াছিল—সুশীল যে ফিরিয়া আসিয়াছে সে-ই তাহার পরম লাভ। সে যে তাহার সান্নিধ্য লাভ করিতে পারিয়াছে—সে-ই তাহার পরম সুখ। তাহার ভালবাসা নারীর ভালবাসা। তাহা স্বভাবতঃ সংযমশীল—শাস্ত—ভক্তিতে পরিণতি লাভের অল্প ব্যাকুল। সে ভালবাসা শাস্ত হইতে অনন্তে ব্যাপ্তি লাভ করিতে পারে। গোঁরী সেবার ভাব লইয়াই স্বামীর কক্ষে প্রবেশ করিল। তাহার বলিবার কোন কথা সে খুঁজিয়া পাইল না। হৃদয়ের ভাব যখন দেবতাকে নিবেদন করিতে হয়, তখন সেজন্ত কি কথার কোন প্রয়োজন হয় ?

সুশীল পুস্তকের দিকে দৃষ্টি নিরুদ্ধ করিতে প্রয়াস পাইল। কিন্তু তাহার পূর্বেই একবার স্বামী-স্ত্রীর চারি চক্ষু মিলিত হইল।

গৌরীর নেত্রে যে শান্ত দৃষ্টি স্মীল লক্ষ্য করিয়াছিল পুস্তকের পত্রে সে যেন কেবল তাহাই দেখিতে লাগিল।

গৌরী ধীরপদে স্মীলনের দিকে অগ্রসর হইল—তাহার পর নত হইবা তাহার চরণে প্রণাম করিল।

স্মীল ভাবিল, এখন কোন কথা বলা—কুশল জিজ্ঞাসা করা কর্তব্য নহে কি ?

স্মীল তাহার চরণে দুই বিন্দু অশ্রুপাত অনুভব করিল। গৌরী কাদিতেছে। যুক্তিতর্কের—সংশয়-সঙ্কোচের সব বাঁধ ভাঙ্গিয়া তাহার রুদ্ধ ভালবাসার প্রবল স্রোত গৌরীর দিকে প্রবাহিত হইতে লাগিল—সে আর তাহার গতি রোধ করিতে পারিল না।

তাহার পর স্মীল তাহার চরণে গৌরীর ওষ্ঠাধরের স্পর্শ অনুভব করিল। স্পর্শ-মণির স্পর্শে লৌহও যেমন স্বর্ণে পরিণত হয় স্মীলের সব সঙ্কোচ তেমনই ভালবাসার প্রাবল্যে পরিণতি লাভ করিল। সে যে তখনও কুমার কথা মনে করিয়াছে—সে যে তখনও অবিচলিত ছিল তাহা মনে করিয়া সে আপনাকে ধিকার দিল। কমা!—যে ভালবাসা আপনাকে সার্থক করিবার জন্য এমন দীনতা স্বীকার করিতে পারে সে ভালবাসা কুমার যোগ্য, না—প্রজ্ঞার যোগ্য ? যে ভালবাসা অভিমান পরিহার করিতে পারে—অপমানের আঘাত-বেদনা বিস্মৃত হইতে পারে—সে ভালবাসার তুলনার তাহার আপনার ভালবাসা কত দূর স্মীল মুহূর্তে তাহা বুঝিল। সে দুই বাহু বিস্তৃত করিয়া গৌরীকে

তাহার বক্ষে তুলিয়া লইল—তাহার অশ্রু-প্লাবিত গণ্ডে ও ওষ্ঠাধরে চুষন করিল। স্বামীর বাহুপাশবদ্ধা গৌরী কঁদিল। সে ক্রন্দন স্নেহের, কি হুঃখের, কি অভিমানের তাহা সে আপনিই বুঝিতে পারিল না।

সাত দিন পরে বিধাজী দেবী কাশীতে ফিরিয়া যাইবার আয়োজন করিলেন। তিনি একবার যাত্রাপুরে যাইয়া গৃহ-দেবতাকে প্রণাম করিয়া আসিলেন—তথা হইতে একবার গৌরীপুরেও যাইলেন। সকলকে বলিলেন, “শেষ দেখা।”

যাত্রার দিন মধ্যাহ্নে তিনি স্নানীলের গৃহে আসিয়া তাহাকে বলিলেন, “দাদা, আর দেখা হয় কি না সন্দেহ। আমার শেষ উপহার এইবার তোমার হাতে দিয়া যাই।” তিনি যাহা দিলেন—তাহা প্রায় তিন লক্ষ টাকা।

স্নানীল বিস্মিত হইয়া জিজ্ঞাসা করিল, “এ কি?”

“আমার পৈতৃক সম্পত্তির আর আমার স্বপ্ন ও তোমার দাদাশ্রমের বরাবরই স্বতন্ত্র রাখিতেন। তাহা কমিয়া যে টাকা হইয়াছিল, তাহা আলাহিদা তহবিল। আমি কাশীতে যে মন্দির ও সত্র প্রতিষ্ঠা করিয়াছি তাহার ব্যয়ের জন্য সেই তহবিলের লক্ষ টাকা দিলাম—দলিল লিখা হইলে তোমার কাছে পাঠাইব,

তুমি দেখিরা দিলে দলিল সম্পন্ন করিব। অবশিষ্ট টাকার
অর্দ্ধেক রমার, অর্দ্ধেক তোমার। এই তোমার টাকা।”

“এ টাকা লইয়া আমি কি করিব?”

বিধাত্রী দেবী হাসিয়া বলিলেন, “তুমি কি করিবে, তাহা
তোমার ভাবনা। আমি দিয়া ভাবনামুক্ত হইলাম।”

“কিন্তু—”

“না, দাদা, আমি আর কোন কথা শুনিব না। রমার ও
গৌরীতে আমি কোন প্রভেদ করিতে পারিব না।”

গৌরীকে তিনি বলিলেন, “দিদিমণি, এইবার হাসিমুখে
ঠাকুরমা’কে বিদায় দাও।” গৌরীর চক্ষু অশ্রুভারাক্রান্ত হইতে-
ছিল দেখিয়া তিনি বলিলেন, “ছিঃ দিদিমণি, কাঁদিতে আছে?
আমি এইবার পরম আনন্দে আনন্দভূমি কাশীতে যাইতেছি।
সুশীলকে বলিয়া যাইব, তোমার যখন ইচ্ছা তোমাকে লইয়া
আমাকে দেখিতে যাইবে। কিন্তু বুড়ীকে আর মায়ায় জড়াইও
না; আর কাশী ছাড়া করিও না।”

গৌরী বলিল, “কিন্তু তোমাকে আর একবার আসিতে
হইবে।”

“ও কামনা আর করিও না। আমি আর আসিব না।”

“রমার বিবাহেও না?”

“সে উৎসবের মধ্যেও যদি তোমাদের ঠাকুরমা’কে মনে পড়ে,
তোমরা আমাকে বো দেখাইয়া আনিও।”

ঠাকুরমা’কে ত্রৈণে তুলিয়া দিয়া রমা বলিল, “ঠাকুরমা, তোমার

আসিতে ইচ্ছা না হয়, তুমি আসিও না। কিন্তু আমার যখন ইচ্ছা আমি যাইব—বারণ করিতে পারিবে না। আমাকে সেই অনুমতি দিয়া যাও।”

বিধাত্রী দেবী রমার মস্তক বক্ষে চাপিয়া ধরিয়া বলিলেন, “আমার কাছে তোর আর কোন অনুমতি চাহিবার অপেক্ষা করিতে হইবে না। কিন্তু আমার অনুমতি আর কয় দিন? যখন বৌদিদির অনুমতি লইতে হইবে তখন?”



—প্রাচীন প্রবীত কুতন উপন্যাস—

দক্ষ হৃদয়

মূল্য—দেড় টাকা।

স্থলের সব উপকরণ থাকিতে মানুষ কেন দুঃখ পায় ;
যে শিক্ষায় সংযম-সাধন হয় না সে শিক্ষা কিরূপ ব্যর্থ ;
অতিমানে মানুষ কিরূপ অন্ধ হয় ; ভালবাসা কত সাধনার
—তাহাই এই গার্হস্থ্য উপন্যাসে দেখিতে পাইবেন।

